

گوجری ادب کی سنہری تاریخ منجمو حصو جدید گوجری غزل

جدید گوجری غزل

تحقیق و تالیف:

ڈاکٹر رفیق اعجم

پیشکش:

جموں و کشمیر اکیڈمی آف آرٹ کلچر اینڈ لینگویجس سرینگر

جملہ حقوق محفوظ

	جدید گوجری غزل	:	نام کتاب
9419054203	ڈاکٹر رفیق انجم	:	تحقیق و تالیف
9419422770	راشد انجم	:	کمپوزنگ
9419705664	شبیر احمد	:	کمپیوٹرائزنگ
	۲۰۰۶ء	:	اشاعت
	۵۰۰	:	تعداد
		:	قیمت
	جے کے آفسیٹ نئی دہلی	:	پرپریس

ناشر

جموں و کشمیر اکیڈمی آف آرٹ کلچر اینڈ لینگویجس سرینگر

- پتہ:
- ۱۔ کتاب گھر، کنال روڈ جموں
 - ۲۔ کتاب گھر مولانا آزاد روڈ سرینگر
 - ۳۔ ایڈیٹر گوجری
- جموں و کشمیر اکیڈمی آف آرٹ کلچر اینڈ لینگویجس سرینگر
لال منڈی سرینگر، کنال روڈ جموں

انتساب

گوجری غزل کو سوچ
سچاتے سُچا جذباں کا شاعر
مُخلص وجدانی
کے ناں

گوجری ادب
کی
سنہری تاریخ

۲۰۰۰ء	مختصر تاریخ (خلاصہ)	پہلو حصو:	I
۲۰۰۵ء	قدیم گوجری ادب	دو جو حصو	II
۲۰۰۵ء	جدید گوجری ادب	تیسرے حصو	III
۲۰۰۶ء	جدید گوجری شاعری	چوتھے حصو	IV
۲۰۰۶ء	جدید گوجری غزل	پنجمے حصو	V
۲۰۰۶ء	گوجری نعت تے گیت	چھٹے حصو	VI
۲۰۰۶ء	گوجری افسانہ نگاری	سٹھو حصو	VII

☆☆☆

ترتیب

۸	صفیہ	ڈاکٹر جاوید رائی	اداریو:
۱۰		عرش صہبائی	پیش لفظ
۱۳		ڈاکٹر رفیق انجم	جدید گوجری ادب
۴۲		ڈاکٹر رفیق انجم	گوجری غزل کو سفر
			گوجری غزل کا شاعر:

نال	دورے مقام	کتاب	صفحہ
۱۔ محمد اسرار نیل اثر	1916	لمبیدی راجوری	۶۳
۲۔ فتح علی سروری کسانہ	1927	1987 گوجرنگر جموں	۶۹
۳۔ رانا فضل حسین	1931	پروڑی راجوری	۷۲
۴۔ ڈاکٹر صابر آفاقی	1933	گوباڑی مظفر آباد	۷۹
۵۔ غلام نبی شاہ ہباز	1940	بہروٹ راجوری	۸۶
۶۔ اقبال عظیم	1940	وانگت کشمیر	۸۹
۷۔ ڈاکٹر غلام حسین انظہر	1941	بھمبر 2004 بالاکوٹ	۹۷
۸۔ سرور حسین طارق	1942	توں راجوری	۹۹
۹۔ نسیم پونچھی	1942	گورسائی پونچھ	۱۰۳
۱۰۔ پروفیسر محمد رفیق بھٹی	1943	ساج راجوری	۱۰۹

- ۱۱۲۔ عبدالغنی عارف 1944 وانگت کشمیر چھمڑ چھاں
- ۱۱۵۔ مُخلص وجدانی 1944 گوہاڑی مظفرآباد ریرا، سانجھو کھلاڑو
- ۱۲۱۔ طرب احمد صدیقی 1946 کالا گجراں، جہلم
- ۱۲۲۔ صابر مرزا 1947 بہرٹ راجوری
- ۱۲۶۔ نذیر حسین فدا 1947 سانج راجوری
- ۱۲۸۔ خوش دیوینی 1947 پونچھ
- ۱۳۲۔ پروفیسر یوسف حسن 1950 جہلم پاکستان
- ۱۳۳۔ احمد شناس 1951 شاہدرہ شریف راجوری
- ۱۳۵۔ منیر حسین چوہدری 1952 پروڑی راجوری
- ۱۳۷۔ محمد امین بانہالی 1953 جموں
- ۱۳۹۔ غلام سرور چوہان 1955 کالا بن مہنڈر پونچھ نین کٹورا
- ۱۴۲۔ انور حسین انور 1955 فتح پور ڈنہ راجوری
- ۱۴۵۔ ابرار احمد ظفر 1956 تون 1998 گھمن گھیر
- ۱۴۸۔ سرور صحرائی 1956 پروڑی راجوری سحری سویل
- ۱۵۱۔ اشتیاق احمد شوق 1956 وانگت کشمیر
- ۱۵۵۔ محمد منشاء خاکی 11/1959 کالا کوٹ لخت لخت
- ۱۵۸۔ گلاب دین جزا 1960 تلیل گریز
- ۱۶۰۔ ارشاد احمد قمر 3/1960 وانگت کشمیر

- ۲۹۔ ڈاکٹر رفیق انجم 1962 کلانی، پونچھ دل دریا، سوغات ۱۶۳
- ۳۰۔ نور محمد مجروح 1965 گول گلاب گڑھ لہوکا اتھروں، سحری یاد ۱۷۸
- ۳۱۔ طارق فہیم 1967 لمپیڈی راجوری ۱۸۲
- ۳۲۔ خاقان سجاد 1967 بھلیس ڈوڈہ ۱۸۳
- ۳۳۔ ریاض احمد صابر 1970 مڑھوٹ پونچھ ۱۸۶
- ۳۴۔ ڈاکٹر جاوید راہی 1970 چنڈک پونچھ ۱۸۸
- ۳۵۔ جان محمد حکیم 1972 بھلیسہ ڈوڈہ ۱۹۲
- ۳۶۔ چوہدری یونس ربانی 1972 سانج راجوری ۱۹۵

متفرق شاعراں کی چنام گوجری غزل:

۱۹۷-۲۰۸

حضرت میاں نظام الدین لاروی، احمد الدین عمر، ملکھی رام کشان
 نذیر احمد نذیر، منظور گلشن، خلیل احمد بجاڑ، گلاب دین طاہر، عبداللطیف فیاض
 عبدالرشید شبنم، فضل حسین کوثر، عبدالرشید فدائی، شیخ ظہور احمد
 نریندر سنگھ آوارہ، رفیق سوز، پرویز ملک، ادلیس شاد، ایاز احمد سیف

۸
پہلی گل

ڈاکٹر جاوید راسی

”جدید گوجری غزل“

گوجری ادب میں اضافہ

عرش صہبائی

اس سے پہلے میں ڈاکٹر رفیق انجم صاحب کو ایک اُردو کے شاعر کے طور پہ جانتا تھا۔ جب انکے شعری مجموعہ ’کاش‘ کا مسودہ میری نظر سے گذرا تو اس پہ اظہارِ خیال کرتے وقت مجھے انکی ادبی صلاحیتوں کا اندازہ ہوا۔ انکے کلام میں فنی رکھ رکھاؤ نے مجھے اپنی طرف زیادہ متوجہ کیا۔ مجھے قطعی یہ علم نہیں تھا کہ ڈاکٹر انجم نے گوجری ادب کی نشوونما کے لئے اس قدر کام کیا ہوا ہے کہ وہ بجا طور پر اس پر فخر کر سکتے ہیں۔ موصوف اب بھی اس میں مصروف ہیں، اس کا انکشاف اس وقت ہوا جب انکی ایک کتاب گوجری گرائمر کی رسمِ رونمائی کا اہتمام جموں میں ایک ادبی تقریب کے دوران کیا گیا۔ اسے میں اپنی خوش قسمتی تصور کرتا ہوں کہ کہ اس محفل میں مجھے بھی کچھ کہنے کی دعوت دی گئی، حالانکہ میں اس کے اہل نہیں تھا۔ میں نے ڈاکٹر انجم صاحب کے بارے میں کہا تھا:

ہمارے ہاں بیشتر ادیبوں اور شاعروں کے کئی چہرے ہیں جن کی پہچان بہت مشکل ہے۔ لیکن ڈاکٹر انجم صاحب کا شمار ان مخصوص ادیبوں اور شاعروں میں کیا جاسکتا ہے جن کا چہرہ ایک ہے اور شخصیتیں کئی۔ میں نے ایسا انکے ادبی کام کے پیش نظر کہا تھا۔ یہ بات حقیقت پر بھی مبنی ہے۔ ڈاکٹر انجم صاحب نے گوجری ادب کے لئے جتنا کام کیا ہوا ہے اسکی فہرست طویل ہے۔ اسکی تفصیل کا بیان سورج کی کرنیں گننے والی بات ہوگی۔

اس وقت جدید گوجری غزل کا مسودہ میرے سامنے ہے۔ جسکی تحقیق و تالیف کی ذمہ داری ڈاکٹر انجم صاحب نے نبھائی ہے۔ اس میں گوجری کے ۲۵ شعراء کرام کا کلام شامل ہے۔ اس سے ایک بات نمایاں ہے کہ محقق نے بڑی ایمانداری سے اس کام کو سرانجام دیا

ہے۔ انہوں نے تحقیق کے کام کی تقدیس کو برقرار رکھا ہے۔ ورنہ ایسے کاموں میں محقق کی ذاتی پسند تخلیق کاروں کی تخلیقات کے انتخاب پر غالب آجاتی ہے اور وہ تحقیق کے ساتھ انصاف نہیں کر پاتا۔ میری ذاتی رائے میں کوئی ادیب یا شاعر جس کی زندگی ادب کی خدمت کے لئے وقف ہو وہ ایسی سطحی باتوں سے دور رہتا ہے۔ اور صحافی ایمانداری کا دامن نہیں چھوڑتا۔ یہی وجہ ہے کہ تاریخ ایسے ادیبوں اور شاعروں کو فراموش نہیں کر سکتی۔ وہ اپنے کام کی وجہ سے زندہ جاوید رہتے ہیں۔ اور یہ انکی طویل ریاضت کا ثمر ہوتا ہے۔

قارئین اس بات کا بخوبی اندازہ لگا سکتے ہیں کہ زیر نظر مجموعہ میں شامل شعراء کے بارے میں انکے ذاتی حالات اور کلام حاصل کرنے میں محقق کو کن مراحل سے گذرنا پڑا ہوگا۔ اس سلسلہ میں انکی محنت کسی تعریف سے مبرا ہے۔ تحریر اور اسکے اندازِ بیاں سے اس بات کا اعتراف کرنا پڑتا ہے کہ ڈاکٹر انجم صاحب کو گوجری زبان پر دسترس حاصل ہے۔ اس سے انکی مشاقی کی بھی تصدیق ہوتی ہے۔ کسی حد تک یہ اُردو زبان کی دین بھی ہے۔ تحقیق و تالیف کا کام بڑا محنت طلب اور صبر آزما ہوتا ہے اسکے باوجود یہ خوش اسلوبی سے نبھایا گیا ہے۔ میں نے مجموعہ میں شامل مختلف شعراء کرام کا کلام بڑی دلچسپی سے پڑھا ہے اور اس سے محظوظ ہوا ہوں۔ چونکہ سارا کلام غزلوں پہ مشتمل ہے اس لئے مونوٹری ہے۔ غزل کا اپنا جاؤد ہے، وہ کسی زبان میں بھی ہو۔ غزل کہنا آسان نہیں لیکن گوجری شعراء نے نہایت خوبصورت ڈھنگ سے غزل کی عظمت کو برقرار رکھا ہے۔ انتخاب کے سلسلے میں ڈاکٹر انجم صاحب کی بھی داد دینا پڑتی ہے۔ ایسا محسوس ہوتا ہے کہ اکثر گوجری شعراء اُردو زبان سے واقفیت رکھتے ہیں۔ یہی وجہ ہے کہ انکی غزلوں میں موسیقی اور نغمگی کا عنصر ہے۔ اس سے ایک خاص معیار قائم ہوتا ہے۔ یہ امتیاز پیدا کرنا کہ مجموعہ میں شامل کون شاعر اچھا ہے اور کون بہتر، غلط ہوگا۔ اس سلسلے میں یہی عرض کرونگا:

ع ہر گلے رارنگ و بونے دیگر است

اس سے انکار نہیں کیا جاسکتا کہ شامل شدہ غزلوں میں جدت بھی ہے اور ندرت بھی۔ ورنہ اردو شاعری میں جدت کے معنی بے ہنگم اور بے ربط کلام ہے۔ میں ڈاکٹر انجم صاحب کے علاوہ ان شاعروں کی خدمت میں بھی مبارک باد پیش کرتا ہوں جنہوں نے ایسا خوبصورت مجموعہ منظر عام پر لانے میں تعاون دیا۔ دعا گو ہوں کہ ڈاکٹر انجم صاحب ادب کی زیادہ سے زیادہ خدمت کریں اور اپنی صلاحیتوں کا پورا پورا فائدہ اٹھائیں، چاہے وہ گوجری ادب ہو چاہے اردو ادب۔

عرش صہبائی

۱۰ فروری ۲۰۰۶ء

۵۳، ریشم گھر کالونی، جموں ۱۸۰۰۰۱

جدید گوجری ادب

ڈاکٹر رفیق اعجم

جدید گوجری ادب کی ابتداء بیسویں صدی کے نان ہی ہوئے اس دور ماں سیاسی سماجی معاشی تے علمی پس ماندگی کے نان نان سرکاری ڈاہی نہ ہون کی وجہ تیں گوجری بولن آلا مہذب دنیا کے سامنے آتاں یا گوجری بولتاں شرمناویں تھا۔ اس طرح قوم کی ترقی کے نان ہی زبان ناوی بڑو خسار و دیکھن پو، لہذا اس دور ماں سب توں اہم تے ضروری عمل پوہ تھو، جے اس قوم ماں سیاسی تے تعلیمی بیداری پیدا کی جائے۔ یا ہی ضرورت محسوس کرتاں مخلص گجر ہنماواں کو ایک قافلہ باندے آوی۔ جس نے سماجی تے تعلیمی بیداری پر زور دے کے بالواسطہ طور پر گوجری زبان تے ادب کی ترقی واسطے راہ پدھری کی۔ اس قافلہ ماں پونچھ کا مرحوم چودھری غلام حسین لسانوی، راجوری کا چودھری دیوان علی، ریاسی کا حاجی اسرائیل کھٹانہ، جموں کا چودھری عبداللہ، بریڈنیر خدا بخش تے سروری کسانہ تے کشمیر تیں میاں نظام الدین لاروی کی قربانی کدے نہیں بھلائی جاسکتیں۔

اس طرح بیسویں صدی کا آغاز توں ہی گجر لکھاڑیاں نے اردو تے پنجابی کے نان نان اپنی ماں بولی گوجری ماں وی لکھن شروع کر لیو تھو، دیہاتی بسبب تے علمی پس ماندگی کی وجہ تیں مچ شاعران کو کلام یا تے لکھن ہی نہیں ہو یو یا ضائع ہو تو گیو تے انھاں بچوں اکثر کی تاریخ پیدائش یا وفات تیں وی دنیا نا واقف ہے تے محض حالات و واقعات کی بنیاد پر انداز لایا جاسکتیں۔

اک اہم گل یاد رکھن کی یاہ ہے جے قدیم گوجری ادب کی طرح بیہوں صدی کا

گوجری ادب کو وہی تقریباً سارا کو سارا مواد شاعری کی صورت ماں ہے تے نثر آنے پاسے بڑی گھٹ توجہ ہوئی ہے گوجری نثر غالباً جموں کشمیر کلچرل اکیڈمی ماں گوجری شعبہ کا قیام توں بعد ہی لکھی جان لگی ہے۔

اس طرح بیہویں صدی کا آغاز ماں جن گوجری شاعراں کو کلام لکھے، اُن ماں نوَن پونچھی، عبدل پونچھی، سائیں قادر بخش، میاں فتح محمد درہالوی، خدا بخش زار تے علم دین بن باسی موہرے سئی لکھیں اِن شاعران کو اکثر کلام سی حرفی تے باراں مانہہ کی صورت ماں ہے۔ تے تصوف تے عشق کا مضمون نمایاں ہیں جدکہ بن باسی تے مولانا مہر الدین قمر کی شاعری ماں نظم تے انقلابی شاعری وی شامل ہے اِن کے نان نان ہی دو جو قافلو جہڑو شامل ہو یو اس ماں میاں نظام الدین لاروی، مولانا محمد اسماعیل ذبیح، ڈاکٹر صابر آفاقی، سوز ہزاروی، مولانا اسرائیل مہجور، سروری کسانہ، شمس الدین مہجور پونچھی، حاجی حسن دین حسن گوری، اسرائیل اثر تے سید حاکم شاہ قمر، سائیں فقر الدین جیاناں آنویں۔ ان حضرات کی شاعری ماں وی سی حرفی تے باراں مانہہ نمایاں ہیں۔ پراسے دور ماں انقلابی نظم تے نعت وی تصوف تے عشق کی کیفیات نان شامل ہوتی گئی ہیں۔

اس دور ماں نثر لکھن کی جہڑی کوشش ہوئی ہیں۔ اُن ماں غلام احمد رضا کا ڈرامہ ”مہارو پیر“ توں علاوہ مولانا مہر الدین قمر، چودھری دیوان علی، سروری کسانہ تے وزیر محمد ہکٹہ کی تحریری کوشش شامل ہیں۔ جہڑیں بھانویں زیادہ نہیں پر بنیادی حیثیت ضرور رکھیں۔ یہ کوشش اجاں جاری تھیں کہ تقسیم ملک کو حادثہ پیش آ یو تے یوہ سنجیدہ تے مخلص گجر رہنماواں کو قافلو کھنڈ پھٹ گیو، سیاسی تے سماجی طور پر قوم نا نقصان ضرور ہو یو۔ پر گوجری لکھن آلاں نے ہار نہ منی تے ویہ جت جت تھا اپنی صلاحیتاں تے توفیق کے مطابق گوجری ادب کی خدمت کرتا رہیا۔

اجاں قوم نے ساہ وی پوری طرح نہیں پھنڈ یو تھو کہ ۱۹۶۵ء کی ہند پاک جنگ نے دو جو سوٹو مار یو تے گوجری لکھن آلاں کا دو پھاڑ کر چھوڑ یا۔ اس عرصہ ماں کچھ نواں لکھن آلا وی بانہہ کنج کے ادب کا میدان ماں آ گیا تھا۔ جن ماں رانا فضل حسین راجوروی، اقبال عظیم تے نسیم پونچھی کا ناں نمایاں ہیں۔

اس طرح نواں تے پرانا لکھاڑیاں بچوں جہڑا لوک پاکستان ہجرت کر گیا۔ اُن ماں ذبیح صاحب، قمر راجوری، رضا صاحب موہرے تھا جد کہ جموں و کشمیر ماں رہ جان آلاں ماں میاں نظام الدین لاوری، خدا بخش زار، اسرائیل اثر، شمس دین مہجور پونجھی، سروری کسانہ حسن دین حسن گوری، اقبال عظیم تے نسیم پونجھی کا ناں قابل ذکر ہیں۔

پاکستان جان آلاں نے اپنی علمی تے ادبی کوششاں کے نان نان سیاسی کوشش جاری رکھیں، تے ریڈیو مظفر آباد توں گوجری پروگرام شروع کران کے سنگ گوجری ادب کی ترقی واسطے کئی تنظیم تے بورڈوی بنایا۔ جن ماں گوجری ادبی بورڈ تے ادارہ ادبیات کا ناں نمایاں ہیں۔ اس طرح اپنا علاقہ ماں گوجری بولن آلاں کے نان ہی گوجری لکھن آلاں کی وی حوصلہ افزائی کو سلسلو شروع ہو یو تے ان ادبی تنظیمیاں کے ذریعے مچ سارا شاعراں کو کلام وی کتابی صورت ماں چھپو اس عرصہ ماں ڈاکٹر صابر آفاقی، احمد دین عنبر، قمر، ذبیح، مہجور تے رانا فضل کے سنگ جن دو جا لکھاڑیاں کو قافلوشامل ہو یو اُن ماں، پروفیسر یوسف حسن، رفیق بھٹی، مخلص وجدانی، سرور حسین طارق تے سرور صحرائی قابل ذکر ہیں۔ جن لوکاں نے روایت کے نان نان گوجری ادب ماں نواں تجربا وی کیا ہیں۔ آج توڑی اس موتیاں کا ہارو چوں کئی منکا کر یا تے کئی موتی پرون ہو یا ہیں۔

پاکستان کا گوجری ادبیاں وچوں اہم ترین ناں صابر آفاقی، قمر، ذبیح تے رانا فضل حسین کا ہیں جہاں نے گوجری ادب کی بہہ مضبوط کی ہیں۔ اس دور ماں سی حرفی کے نان نان گوجری غزل، نظم گیت، نعت، تے دوہا وی لکھن ہو یا ہیں۔ ان ماں مہجور کی نظم مخلص کی غزل تے آفاقی کی رباعی تے مسدس، قمر کا منظوم خط تے رانا فضل کا ڈراماں سمیت ہر صنف ماں کمال انھاں ہی کا بس کو کم ہے۔ اک وار پھر اس پاسے توجہ دو ان کی ضرورت ہے جے اس دور ماں وی رضا مرحوم تے رانا فضل کا ڈرامہ تے چٹھیاں توں علاوہ گوجری ادب کو زیادہ حصو شاعری کی صورت ماں ہی ہے۔ پاکستان کا گوجری ادب کی جہڑی کتاب آج توڑی شائع ہوئی

ہیں۔ اُن ماں قمر راجوروی کی 'گوجری ادب' علاوہ ذبیح کی 'انتظار'، رانا فضل کی 'پانہلن بانہلن' پانی، مہجور کی 'نغمہ'، کھسار، مخلص کی 'رپرا'، صابر آفاقی کی 'پھل کھیلی'، احمد دین عمر کی 'گوجری گیان' تے سرور صحرائی کو شعری مجموعہ 'سجری سویل' شامل ہیں۔

جموں و کشمیر ماں آزادی توں بعد گوجری ادب کی ترقی واسطے جہودی منظم کوشش ہوئیں اُن ماں پہلورواں اخبارات تے رسالاں کو ہے۔ جن ماں "الانسان"، "احسان"، "نوائے قوم" تے "گوجر دیش" کا ناں نمایاں ہیں۔ یہ اخبار تے رسالاں اردو زبان ماں گجراں کا سیاسی تے سماجی مسائل کی پیروی کریں تھ، پر کجھ صفحہ گوجری تحریریاں واسطے مخصوص تھ۔ اس طرح ان رسالاں کے ذریعے گوجری لکھاڑیاں کی خاطر خواہ ہمت افزائی ہوئی۔

سیاسی، سماجی تے ادبی تنظیمیاں ماں اس پاسا کی کوششاں ماں "گجراصلحی کمیٹی تے انجمن ترقی گوجری ادب" کا ناں نمایاں ہیں۔ ان تنظیمیاں نے رانا فضل حسین کی دیکھو دیکھی سیاسی کوشش شروع کیں تے ان تمام کا مجموعی نتیجہ کا طور پر ریڈیو کشمیر سرینگر ۱۹۶۹ء تیں گوجری پروگرام شروع ہویا تے ۱۹۷۵ء ماں ریاستی کلچر اکیڈمی ماں گوجری شعبہ وی کھول دو گیا۔

ان اداراں کے نال ہی گجرا قوم کا گجرا لکھاڑیاں کی حوصلہ افزائی شروع ہوگئی۔ نواں نواں لکھاڑی باندے آیا۔ گوجری لوک ادب کی شیرازہ بندی کے نال نال اکیڈمی کی طرفوں سہ ماہی شیرازہ کی اشاعت کے نال ادب کا میدان ماں نواں نواں تجربا ہون لگا۔ سرکاری تے نجی طور پر کتاباں کی اشاعت شروع ہوئی قابل ذکر گل یاہ ہے جے اس عرصہ ماں وی گوجری ادب کو زیادہ خصوصاً شعری ماں تخلیق ہو، تے گوجری نثر تقریباً سارے کلچرل اکیڈمی ماں گوجری شعبہ کا قائم ہون توں بعد کی پیداوار ہے۔ سرور سی کسانہ، نسیم پوچھی تے اقبال عظیم کی سرپرستی ماں گوجری ڈکشنری ترتیب دتی گئی۔ ہر سال گوجری کلچرل کانفرنس ہون لگیں، گوجری زبان و ادب تے تاریخ پر تحقیقی کم ہون لگا تے ادب ماں نواں اضافا ہوا۔

نواں لکھن آلاں ماں چودھری قیصر الدین عبدالغنی عارف، امین قمر، فیض کسانہ، غلام

حسین ضیا، محمد حسین سلیم، سکندر حیات طارق، خوشد یومینی، غلام رسول آزاد، کرم دین، چو پڑہ، مختار الدین تبسم، آصف کرامت اللہ سہراب، شریف شاہین، محمود رانا، غلام سرور چوہان، برکت علی باکڑی، ڈاکٹر نصیر الدین بارو، عبدالحمید کسانہ تے اشتیاق احمد شوق، ابرار احمد ظفر تے ڈاکٹر رفیق انجم شامل ہوا۔ تمام گوجری لکھاڑیاں کا ناں گنوانوں میر و مقصد نہیں ہاں اس پاسے توجہ ضرور دواؤں گو کہ گوجری شاعری ماں جدت کے ناں نال گوجری نثر وی لکھن ہون لگی۔ شاعری ماں سی حرفی تے بارہ ماہہ کی روایت کے سنگ غزل، نظم گیت تے دو ہاوی لکھن ہو یا تے سچی پچھیں تاں آج سی حرفی کی جگہ غزل نے مل گئی ہے۔

اسے طرح گوجری نثر ماں مقالاں کے ناں نال افساناں تے کہانیں، ڈراماں طنز و مزاح ”انشائیہ“ تے چھٹی لکھن کا سلسلا شروع ہوا۔ جہذا تعداد ماں گھٹ سئی پر معیار کا اعتبار ناں حوصلہ افزا ہیں۔ کسے نا یقین نہ آوے تے ائین تہر تے نسیم پونچھی کی چٹھیں پڑھ کے انداز و لایو جہزا میرے نزدیک گوجری ادب کا بہترین شہ پارا ہیں۔

اس عرصہ ماں جموں و کشمیر ماں جہزی گوجری کتاب شائع ہوئیں۔ ان ماں کلچرل اکیڈمی کی گوجری ڈکشنری، گوجری لوک گیت، گوجری لوک کہانیں تے مہارادب کا خصوصی شماراں توں علاوہ نجی طور پر چھاپی جان آئی کچھ اک کتاب قابل ذکر ہیں۔ جھاں نا اکیڈمی کی طرفوں مالی امداد یا اپوار ڈوی حاصل ہو یا ہیں۔

ان ماں سب توں پہلی کتاب نسیم پونچھی کی ”نین سلکھنا“ ہے ان توں بعد کی کتاباں ماں اسرائیل اثر کی ”دھکھتیں آس“ اقبال عظیم کی ”ریجھ کولیں“ عبدالغنی عارف کی ”چھم چھاں“ قاسم بجران کی ”تاہنگ رنگیلی“ حسن الدین حسن کی ”پیام حسن“ غلام رسول اصغر کو ناول ”آخری سہارو“ سہراب کارٹیڈیائی ڈراماں کو مجموعہ ”چون“ شامل ہیں۔

بیہویں صدی کا گوجری ادب کو جائز و لین واسطے مناسب سمجھوں کہ صنف کا اعتبار نال ہر ایک صنف کو الگ الگ جائز و لیو جائے نوں تے اس کم واسطے کئی کتاباں کو مواد بن

سکے پر کوشش کی گئی ہے کہ ہر ایک صنف کا مختصر جائزہ نان گوجری کا عام قاری واسطے بنیادی مواد فراہم کیو جائے۔ جس پر آن آلا پیا تفصیلی تے تحقیقی کم کرتا رہیں گا۔ آئندہ صفحات ماں گوجری قصیدہ مرثیہ، سی حرفی، بارہ ماہ، نعت، غزل، گیت، نظم، طنز و مزاح تے نثری ادب کو ذکر موجود ہے۔

۱۔ قصیداتے مرثیہ:

جدید گوجری ادب ماں مثنوی قدرے گھٹ لکھن ہوئی ہیں، جد کہ قدیم گوجری ادب مانھ یوہ رواج عام تھو جس کی اک مثال امین گجراتی کی یوسف زلیخا ہے۔ سے طرح نویں گوجری ماں قصیداتے مرثیہ کافی تعداد ماں لکھن ہوا ہیں پر اس سلسلہ ماں کسے منظم کوشش کے تحت یہ چیز کتے اکٹھی ہو کے شائع نہیں کی جا سکیں۔ سی حرفی تے بارہ ماہ ماں قصیدوں کو موضوع لاروی دربار ہی رہیو ہے جد کہ مرثیہ مانھ کئی شاعراں کی وفات لکھن آلاں کے مد نظر رہی ہے۔ جد کہ قدیم گوجری ادب مانھ کریلاً تے شہادت حسینؑ بدستور نمایاں موضوع ہے۔ جدید گوجری شاعراں مانھ سب توں زیادہ مرثیہ وی رانا فضل ہوراں نے لکھیا ہیں۔ جن مانھ بابا نظام الدینؒ تے چوہدری فیض حسین انقلاب کی وفات پر لکھی وی رانا ہوراں کی تحریر پڑھن سنن جوگی ہیں۔

۱۔ ۳ شوال نابا نظام الدین لارویؒ کی وفات پر رانا ہور لکھیں:

لہو لہو عید

بول پیاریا عید کا چنا	اوہ دکھیاریا عید کا چنا
تیں رکت میرو میت چھپا یو	موتاں ماریا عید کا چنا
لہو لہو عید خوشی تیں کر کے	درد ابھاریا عید کا چنا

۲۔ چوہدری فیض حسین انقلاب کی وفات پر رانا ہورنوں لکھیں:

تیری یاد رے فیض حسین آوے تیری خو خصلت یارا بھلتی نہیں
تیرا دُکھ نے کھسیا سَکھ مہارا کہڑی اکھ جہڑی اج ڈُلتی نہیں
کھیتی میاں حبیب کی نسری تھی باڑی گجراں کی اسی بھلتی نہیں
لال گودڑی مانھ کدے چھپتا نہیں کھری بست نیلام تیں تلتی نہیں
تیری قبر اُپر کدے فضل آتوراہ بند یارا گلی کھلتی نہیں

۳۔ خدا بخش زار صاحب کی وفات پر اسرائیل اثر صاحب لکھیں۔

سدا راز نیاز کا کاج مکا سنچو چھوڑ دنیا فانی زار چلیا
قلم اُٹھ ہن ماتھی رنگ بھر لے گیا قافلاں کی یادگار چلیا
سخن گو تے سخن شناس گیا نظم بزم کا کہیں معمار چلیا
بلبل پونچھ کا باغ میں اڈ چلیا، شعر سخن کا سوچ وقار چلیا
قادر بخش تے باغ حسین برکت، عبدل، شاہ حبیب کا یار چلیا
فتح محمد تے قمر کا ہم عصر وصل میل آلا بو ہو مار چلیا

۲۔ سی حرنی

جدید گوجری ادب کی چڑھت کے نال سب توں پہلاں باندے آن آئی
صنف سی حرنی ہے۔ جہڑی بلاشبہ پنجابی توں گوجری ماں داخل ہوئی ہے۔ اس
کی وجہ یاہ وی ہے کہ گوجری کا پہلی صف کا لکھاڑی پہلاں پنجابی شاعر کریں
تھا۔ تے گوجری ماں بحر کھلن نال اُنھاں نے ویہی جذبات اُسے صنف ماں
گوجری ماں لکھنا شروع کیا۔ بیہویں صدی کا شروع توں لے کے تقریباً سٹھ
سال توڑی گوجری شاعر پر سی حرنی کی حکمرانی سئی لگے۔ تے اُس توں بعد کی
ہجری گوجری شاعری ماں اِس ناواہ مقبولیت نہیں رہی۔ جہڑی غزل نا حاصل

ہو گئی ہے۔

بیت کا اعتبار نان سی حرفی ”الف“ توں ”ے“ توڑی ہر اک حرف نان شروع ہون آلا اک ہی بحر ماں لکھیا و اچار چار مصرعاں کا بیت وھیں جن ماں ہجر و فراق تے تصوف کا مضمون اکثر نسوانی کردار کی زبانی بیان کیا جائیں۔ بحر تے مضمون کا لحاظ نان سی حرفی بارہ ماںہہ کے نیٹرے تیرے ہے۔ نواں لکھاڑیاں وچوں اکثر نے سی حرفی لکھن کی کوشش کی ہیں۔ لیکن غزل، گیت تے نثری ادب کی چڑھت نان سی حرفی لکھن آلا دھیاڑا توں دھیاڑا گھٹتا جائیں لگاوا۔ نالے نویں سی حرفیاں ماں وہ معیار، جذبات تے اظہار کی پہنچکی نہیں رہی وی، جہڑی کدے سی حرفی کی شان تے جان تھی۔ سی حرفی کا نمائندہ شاعر ماں نون، قادر بخش، فتح محمد، ذبیح، زار، سوز، مجور، راجوروی، مجور پونچھی تے اسرائیل آثر نمایاں ہیں۔

خ:

خلق دیکھوں سارو ملک دیکھوں نظر نہیں آ تو وہ چکار مناں
ہر روز دیکھوں تھارا راہ بیٹھو، اکھ دکھ گئی ہیں گن گن بار مناں
آیا زور اس پونچھ ماں ولی بن کے قسم رب کی نہیں اعتبار مناں
عبدل زور ڈٹھا شکل دار بندا مھلتو نہیں وہ لار کو یار مناں

عبدل پونچھی

ح:

حکم تیرو گھر بار تیرو میری جان قربان بساریے نہ
منوں نہ بساریے جان گھولی مرتادم توڑی قولوں ہاریے نہ
جس کو سنگ کرئیے اس کے سنگ مرئیے دغودے پردیس ماں ماریے نہ
نون سدے جے تنا غلام تیری رانجھا آ مھیسیں بھانویں چاریے نہ

نون پونچھی

ج:

جی ہے جھنگ سیالاں کی توں، کھیڑاں نالن کے ہے تیر و ساک ہیرے
 جد گن فیکون کا قول ہوا، تیرے نالن ہوا میرا باق ہیرے
 کراما کاتین دوئے شاہد میرا ہو یو عقد جد روز میثاق ہیرے
 فتح محمد ہزارہ تین جھنگ آہو، تائیں سد یو ہوں تیر و چاک ہیرے
 فتح محمد در ہالوی

ت:

نگ تدا سٹیا سنگ جد کا سٹیو کھوہ اندر سینے لامتا
 ہوئی جان حیران ویران میری لگی ہر اک آن بلا متا
 ڈنگا زخم ہو یا کالجا ماں کاری لگے نہ کائے دوامتا
 قادر دل کھیا میری جان دکھیا درد کا لہ گو گویو کھامتا
 سائیں قادر بخش

ج:

حال ملال کو کہوں کس نا بہتا تک کے عیب بسارتیہ نہ
 اپنا نیناں کی قسم ہزار تتا سروں ماریئے تے دلوں ماریئے نہ
 ہن کو ہجڑی تک کے کیوں تھے پہلیں آپ لائیں ہن باریئے نہ
 بار بار زاری میر زارا یکارا نجھا آمھیسیں بھانویں چاریئے نہ
 خدا بخش زار

ج:

جسم میرو پاکستان بے روح وطن کی ماہلیاں ماہلیاں ماں
 پھرے جان رنجان حیران میری شنگراں اچیاں خالیاں خالیاں ماں
 مھل مھل بوٹے بوٹے دل بے پتر پتر تے ڈالیاں ڈالیاں ماں
 ذبح رہے خیال ہر حال میرو اپنا دیس کی نالیاں نالیاں ماں
 ذبح راجوروی

ش:

شام تیں لے کے صبح توڑی ہوئی، نچ نہ رون ہے کم میرو
 رہیو چھڑو قلبوت ہے ہڈیاں کو سکو جسم کو ماس تے چم میرو
 دے کے واسطو رب کو کہوں تنہاں دیکھ آ کے دم ماں دم میرو
 تنہا نہیں مجھ پر واہ میری، دس ہوئے کو کہڑا ناغم میرو
 اسرائیل مجھو

الف:

اُجڑ کے ہوئی آباد بٹیں، کیا دل ویران آباد کس نے!
 جہو ایا نے منوں بسا چھڑیا، رکھی انھاں کی دلاں ماں یاد کس نے
 پچھے کون نصیب کی ہاریاں نا، سنی انھاں کی کوک فریاد کس نے
 درد مند کوئے اثر کا درد جانے، دکھیا دل ات کیا فرشا کس نے
 اسرائیل اثر

ک:

کد توڑی کوئے ظلم جھلے، کد تک رہوں گوہوں کھڈیاں بن کے
 کچر تک جھلے ہوں ڈنڈول تیرا، کد توڑی میں برھنوسیاں بن کے
 کچر دوہلتا ہا سائیں سر میرے، کچر رہنوں میں تیرو بھیاں بن کے
 خوابوں جاگ پرواز ہن لو ہوئی، سنکلیا پھر نہ ایویں خیال بن کے
 لعل حسین پرواز

الف:

آتوں صلح سلوک کر لے، نہیں تے کوٹ ماں تیرو چلان ہوئے گو
 سیشن جج وی تیرا تیں او پرو ہے، تیرو دردی ات کون انسان ہوئے گو
 اُنکا پیشگی اُنکا وکیل کوئے نہیں، اڑیا دس فر کیڈ حیران ہوئے گو
 آخر کے نذیر جواب دینو، ات فیصلور ژے میدان ہوئے گو
 نذیر احمد نذیر

۳۔ گوجری باراں ماہ

باراں ماہ نہ بھانویں شاعری کی باقاعدہ صنف نہیں، پر اس کے باوجود پنجابی تے گوجری کا اکثر شاعراں نے باراں ماہ لکھیا ہیں۔ ہییت کا اعتبار نان باراں ماہہ کی بحر ہییت تے سی حرفی آئی وھے۔ جس ماں سارا سال ماں محبوب کا ہجر و فراق کی واردات نسوانی کردار کی زبانی بیان کی جائیں۔

قدیم گوجری ماں سب توں پہلاں باراں ماہہ کی مثال مولانا داؤد کا کلام ماں لکھے۔ جہڑی کے ۱۳ء کی تحریر ہے تے پھر مولانا افضل پانی پتی نے اپنی مشہور ”بکت کہانی“ ماں باراں ماہہ کو استعمال کیو ہے۔ جدید گوجری ادب ماں کیونکہ سب توں پہلاں گوجری لکھاڑیاں کو پہلو قافلہ کافی عرصہ پنجابی ماں شاعری کرتو رہیو ہے۔ لہذا خدا ہوئی گل یاہ ہے۔ جے جدید گوجری ادب ماں باراں ماہہ کی روایت قدیم گوجری ادب کے بجائے پنجابی وچوں آئی وی ہے۔

بیہویں صدی ماں پہلا دور کا اکثر شاعراں نے سی حرفی کے نان نان باراں ماہہ وی لکھیا ہیں۔ جد کہ سچرا گوجری ادب ماں (۱۹۵۰ء تیں بعد) نویں نویں صنفوں کی چڑھت نان باراں ماہہ کو رواج گھٹتاں گھٹتاں ہن تقریباً مک ہی گیو ہے۔ گوجری باراں ماہہ لکھن آلاں ماں، خدا بخش زار، ذبیح، پھورتے اسرائیل اثر کا ناں نمایاں ہیں۔

اسرائیل اثر تے سرور صحرائی ہوراں نے روایتی باراں ماہہ ماں ہییت کا اعتبار نان کجھ تبدیلی تے نواں تجربا کیا ہیں جد کہ موضوع کا اعتبار نان باراں ماہہ کی روایت ہجر و فراق کے چو فیرو پھرتی سئی لگے۔

چڑھیو چیت تیرو بھیلو نہیں چیتو، تیری قسم بساکھ بسار یو نہ
جیٹھ، ہاڑ کی دھپاں ماں کھلن دیکھوں، ساون بھادرے وی بوہو مار یونہ

اسواکھ پھر کے کتک کد آوے، کہڑی گھڑی میں کاگ اڈا ریونہ
 منگھر، پوہ تے مانہہ ماں رات جاگوں، مہکن زار آ پو بو ہو مار پونہ
 خدا بخش زار

چڑھیو چیت تے بھیلوسب چیتو رہی سروں نہ کوئے حواس مٹا
 وطن یارا حباب تیں دور رہ کے آوے چیت بہار کدر اس مٹا
 صبح شام پردیس کی زندگی ماں کرے ہو بہار اداس مٹا
 آ پو چیت مہجور تے سجنا کو ہو پو دل ماں سخت احساس مٹا
 اسرائیل مہجور

جیٹھوں جیٹھ دیور دلوں تنگ دسیں جھلوں طعناں سخت جھٹانیاں کا
 کریں روز ننان گھسان ڈاہڈ و صبح و شام ہیں حال ویرانیاں کا
 بچوں کولن تے ڈھول ناکھول دسوں قصہ سب سر برتی کہانیاں کا
 خدا بخش نماں نماں نم ڈوہلوں بیلا یاد کر کے مہربانیاں کا
 خدا بخش زار

چیت مڑن کا چیتا بھلیا، آ پو بساکھ تے نہیں گل ملیا
 کوک رہی سو وار نہیں آیا، ڈیکوں پئی دلدار نہیں آیا
 جیٹھ سیاپا ہو گیا دونا ہاڑ ماں ہاڑ اُس تیں چوننا
 سک رہی غم خوار نہیں آیا، ڈیکوں پئی دلدار نہیں آیا
 اسرائیل آثر

۴۔ حمد تے نعت

گجر طبعی طور پر سادہ، امن پسند تے خدا پرست لوک ہونیں، شاید یا ہی وجہ ہے کہ
 گوجری ادب کا نمونہ جتنا مرضی پرانا دھیں۔ اُن ماں خدا پرستی تے تصوف کو رنگ نمایاں

ہے۔ بلکہ قدیم گوجری ادب ماں تے عشق حقیقی تقریباً سارا لکھاڑیاں کو پسندیدہ موضوع رہیو، تے یاہ روایت جدید گوجری ادب ماں وی بیہویں صدی کا ادھ توڑی واضح دے۔ بے شک شاعری کی صنف بدلتی رہی وھیں کاروبار کا اعتبار نان وی گجر زیادہ تر جنگلاں پہاڑاں تے قدرتی نظاراں کے قریب رہن کی وجہ تیں شہراں تے مغربی تہذیب کی ذہنی آلودگی تیں دور رہیا ہیں۔ شاید اس وجہ تیں ماڈرن اُجاں توڑی گجراں پر یا گوجری ادب پر غالب نہیں آسکی۔ اک ہو روجہ یاہ وی ہو سکے جے گجر ادبیاں کو تقریباً سارا کو سارو قافلو مسلماناں کو رہیو ہے۔ بھانویں واہ دسویں صدی کی گل وھے یا بیہویں صدی کی اکثر شاعر صوفی شاعر ہو یا ہیں۔ قدیم گوجری ادب ماں مثنوی کی صورت ماں تصوف کا مسائل بیان ہو یا ہیں ات تک کہ گوجری لوک ادب ماں وی خوشی غمی کا مختلف موقعاں پر گایا جان آلا گیت موضوع تے خلوص کا اعتبار نان نعتیہ شمار کیا جاسکیں۔ بیہویں صدی کا شروع کے نان جدید گوجری ادب ماں جہڑی تازہ روح پھوکن ہوئی ہے اُس ماں بلاشبہ حضرت بابا جی صاحب لاروی رحمۃ اللہ علیہ کی تعلیمات کو اثر سب توں زیادہ ہے۔ اس مواحد تے پابند شریعت صوفی شاعر کی شخصیت تے تعلیمات تے مستفید ہون آلا اکثر گوجری ادبیاں کی شاعری کو موضوع عشق حقیقی تے تصوف ہی رہیو ہے بھانویں کجھ شاعراں نے اپنا جذبات کو اظہار مجازا پردہ نان کیو دے۔

بیہویں صدی کا پہلا نصف ماں ان جذبات کا اظہار واسطے سی حرفی تقریباً سارا شاعراں کی پسندیدہ صنف رہی ہے۔ جد کہ نظم کی صورت ماں حمد تے نعت لکھن کو رواج سجا گوجری ادب ماں یعنی ۱۹۵۰ء تیں بعد ہی کی گل ہے۔ گجر بھانویں آج توڑی اکثر کم پڑھیا لکھیا ہیں۔ پر خدا تے رسول ﷺ کا ناں پر ہر وقت اپنو سب کجھ قربان کرن نا تیار رہیں۔ ادب کیونکہ زندگی تے سماج کو ترجمان وھے۔ لہذا قدرتی طور پر ان جذبات کو چھاملو گوجری ادب ماں قدرتی طور پر نظر آوے۔ عشق کی شدت کسے وی پیمانہ نان نہیں منی جاسکتی تے خاص کر عشق خدا تے عشق رسول ﷺ کا سلسلہ ماں اللہ آپ ہی جانی جان ہے۔ ہو سکے کسے نے دکھاوا

واسطے زیادہ نعت لکھی وہیں تے کہے کی زندگی بھر کی خلوص نال لکھی وی اک ہی نعت اللہ کے نزدیک مچ ہی پیاری وھے۔ بہر حال جدید گوجری کا تقریباً سارا شاعراں نے نعت لکھن کی کوشش کی ہیں۔

جت تک ہوں سمجھ سکیو ہاں کجھ اک نعتاں نا چھوڑ کے باقی ساراں کوزوراک ہی گل پر رہیو ہے ”ربا لے چل مکہ مدینہ ماں“ تے جتنا وی ذاتی تے صفاتی پہلو ہیں، حضور پاک ﷺ کی زندگی مبارک کا انھاں پر ضرورت توں گھٹ لکھن ہو یو ہے۔ تعداد کا لحاظ نال غالباً حسن دین حسن تے رانا افضل ہوراں نے سب توں زیادہ نعتیہ شعر لکھیا ہیں تے نعتاں کو پہلو مجموعہ وی ”گوجری نعت“ کا ناں نال انھاں نے ہی چھاپیو تھو۔ فراس تیں بعد شائع ہون آلی تمام کتاباں ماں حمد تے نعت شامل ہی رہی ہیں۔ پیش ہیں کجھ اک گوجری نعتاں کا چنیا وا شعر جہاں توں گوجری ادب ماں نعت کار حجان تے معیار کو انداز کوئے وی سخن ورلا سکے۔

انور حسین

حمد

سارا عالم کو بادشاہ توں ہے	حمد لائق بس اے خدا توں ہے
ہم تیری صفت کے بیان کراں	ساری صفتاں کی انتہا توں ہے
ہر مصیبت مانھ توں ہی یاد آوے	ہر کسے درد کی دوا توں ہے
کول اتنو کہ دل مانھ ہے موجود	دور اتنو کہ لاپتا توں ہے
زندگانی ہے اک سفر یارب	توں ہی منزل ہے راہنما توں ہے

نعت:

اُس ذات پر ہوویں سلام لکھ لکھ، رب نے کیا اچا اختیار جس کا
شافع امتاں کو، حامی عاصیاں کو، احسان ہیں بے شمار جس کا
جس کا باغ رضوان تے حوض کوثر، جنت باغ تحت الانھار جس کا
جس نا قاب قوسین کو شرف حاصل، درجہ عرش عظیم تیں پار جس کا
قمر راجوروی

نعت:

جمیو نہیں نہ جے گو کدے جگ ماں نبی پاک جیہود ہور انسان کوئے
 ہوئی نہیں نہ ہوے گی ایڈ ہستی اتنی محترم ایڈ ذی شان کوئے
 اتنا بڑا اخلاق کو ہور دو جو جمیون کون ہے بچ جہان کوئے
 اتنا ظرف کو کون بے دشمنان پر کرے ایڈ عظیم احسان کوئے

حسن دین حسن

سروری کسانہ

نعت:

نبیاں کا سردار نبی میں دکھیو لاچار نبی
 میں گردائیں ڈبن لگو لاؤ بیڑو پار نبی

چڑھتل چنان چائن چائن لایا سارے
 لاٹ سچی لو روشن روشن روشن عرش منارے
 کفر کی بند مٹھی ماں گپیپس کلمو پڑھتی بولیں
 لاج غریباں کی رکھ چھوڑی رب نے صدقے تھارے

رانافضل حسین

ہوں نظر کم کی بھکھ لیول ڈری پردہ ناسر کا چھوڑو
 میر آس امید کا حیلہ ہیں کتے بنے بنے لا چھوڑو
 ہر قول تھارا کو قائل ہوں میرو صدق یقین قرآن آقا
 یوہ درس ہدایت تھارو ہے میرو پتو دین ایمان آقا

منشاخاکی

لے جاتا کدے مٹاں حالات مدینہ ماں
 ہوں وی تے گزار آتو ایک رات مدینہ ماں
 روضہ کی جالی نا اکھیاں سنگ لا آتو
 اپنی وی بدل جاتی اوقات مدینہ ماں

فاروق انوار

چت رونق سب بزا راں کی جے بھیڑ لگیں دلداراں کی
 فریاد ہووے مسکیناں کی واہ دھرتی پاک مدینہ کی
 اشرف پردیسی

سرکارِ مدینہ میرے پر اک نظر عنایت کر چھوڑو!
 دیدار کراؤ روضہ کا نالے ملہم دل پر دھر چھوڑو
 بدکار ہاں بھانویں ہوں آقا پر تھارا در کو سواہی ہاں
 تم اپنی رحمت کے صدقے جاوید کی جھوٹی بھر چھوڑو
 جاوید راہی

۵۔ گوجری نظم

گجراں ماں سیاسی بیداری آن کے نال ہی سماجی ظلم تے زیادتیاں کے خلاف آواز
 بلند ہوئی شروع ہو گئی تھی کیونکہ اس ویلا کا اکثر لکھاڑی پہلاں پنجابی ماں لکھیں تھاس واسطے
 ان انقلابی جذبات کو اظہار وی پنجابی ماں شروع ہو یوحس کی پہلی مثال مولانا مہر الدین قمر
 راجرووی کا ویہ منظوم خط ہیں جن ماں انھاں نے اپنی قوم کی حالت حضرت میاں نظام الدین
 لاروی کے باندے رکھی تے انھاں نا قوم کی مہار پکڑن کی دعوت دتی۔

اُن توں بعد آن آلاں نے اپنا جذبات کو اظہار سدھو گو جری ماں کیو ہے ظلم تے شاید
 انسان کو ازلی تے ابدی سنگی ہے۔ اس گلوں ہر دور کا شاعراں نے اپنی نظماں ماں انقلابی
 جذبات ظاہر کیا ہیں۔ گو جری کی اکثر نظم انقلابی ہیں، جد کہ دو جامو موضوعات پر وی خاطر خواہ
 نظم لکھی گئی ہیں۔ لیکن چند اک جذباتی نظماں نا چھوڑ کے باقی نظم نا گو جری ماں اتنی زیادہ
 مقبولیت نہیں مل سکی جتنی سی حرفی توں کیت تے غزل نا حاصل ہوئی ہے۔ گو جری نظم لکھن آلاں
 ماں علم دین بن باسی، مہجور راجوری، مہجور پونچھی، رانا فضل حسین، خدا بخش زار، اقبال عظیم، نسیم
 پونچھی، فضل مشتاق، نور محمد نور تے خادم حسین قمر قابل ذکر ہیں۔

بزدلی نا چھوڑ غیور یاں ماں اے قوم میر نا گوار اٹھو
 نکلو وچ میدان جوان جنگی لے کے نواں نواں ہتھیار اٹھو
 ویوسٹ لباس جہالتاں کا برجس پہن کے چھ پلپار اٹھو
 چھوڑ دیکھ قرض اُن سودیاں کو تم آپ ہو کے شاہوکار اٹھو

مہجور پونچھی

نظم ۱: قمر راجوری

ہم گوجر گجراتوں آیا، گذر کراں شاہانی
 شاہی پتر چوہان کھشتری، مہاری بڑی نشانی
 متھرتے اجمیر، بدایوں میرٹھ تے ریواڑی
 ان تھاہیاں کا بڑا بڈیرا، تھا سارا دریانی
 تاج تخت کا مالک تھا کل، جہڑا راج دلارا
 اچ نحوست ان کو حصو، رسوائی عریانی

مشرق جاگیو، مغرب جاگیو، جاگیو گل جہان
جاگیو ہر اک قوم قبیلو، جاگیو ہر انسان

توں وی قوم کیا فرزند الہ تو آپ سیان

مہجور را جوروی

میری اکھ ہمیشاں دیکھیں تیری یاہ بربادی
دھی کی قیمت پوت کی کھٹی سب کھڑ پیچ نے کھاہدی
تیری اس دنیا ماں توں دس کے شادی نا شادی
قرضو اپنی جا ماں رہیو، سود نے عمر کھاہدی

اقبال عظیم

چہر و چن تے چاننی ہا ساند چمکتا تارا
تن مکھن من دوہلو دوہلو چال لھکتا آرا
دل دلیر شیرتی ہاروں پھرے یاہ ماہلی ماہلی
بول رسیا کوئل ہاروں متک چکوراں آلی

”گجرانی“ سکندر حیات طارق

پیریں پون تے گل ماں انگی	زندگی تھاری روتاں لنگھی
ستی ایڈ نہیں ہوتی چنگی	کدے نہ نکلی تھاری تنگی
تاں ہووے گو کم سہلو	ہمت کر کے مارو ہلو
فضل مشتاق	”ہمت کر کے مارو ہلو“

پتو نہیں ان پہاڑاں اندر کیونکر قسمت مہاری ہے
 مچ کماواں بھکھا بھانا کھان کی قسمت تہاری ہے
 اک ہی دھرتی اُپر بیٹھا جدا جدا مقسوم ہیں مہارا
 انگا پھٹا کپڑا، لاناواں انگا باغ بہاری ہے
 خادم حسین قمر

۶۔ گوجری گیت

گوجری لوک ادب کو اکثر حصول لوک گیتاں کو ہے۔ تعداد تے مٹھاس کا لحاظ نان پنجابی توں بعد گوجری لوک گیتاں کو ہی نمبر آوے۔ جنہاں نے موجودہ تحریری ادب توں پہلاں سینہا سیدہ صدیاں توڑی دلاں پر حکمرانی کی ہے۔ شاید یا ہی وجہ ہے کہ موجودہ صدی ماں تحریری ادب کو شروعات ماں سی حرفی توں بعد گیت ہی شامل ہو یا ہیں۔ تے شروع ماں لکھیا جان آلا اکثر گوجری گیت، گوجری لوک گیتاں کی طرز پر ہیں۔ مثلاً ماہیا، قینچی، درشی وغیرہ، پھر آہستہ آہستہ گیت کاراں نے نویں نویں طرز ماں پروی لکھنو شروع کیو تے آج گوجری گیتاں کو کافی خزانو موجود ہے۔ جہد و صدا بند تے تحریری صورت ماں ریڈیو اسٹیشناں تے کلچرل اکیڈمی کی کتاباں ماں موجود ہے۔ اس توں علاوہ آج توڑی نجی طور پر وی جتنی کتاب گوجری ماں چھاپی گئی ہیں ان ماں تقریباً سب ماں گیت وی شامل ہیں۔

بیہویں صدی کا لکھاڑیاں ماں جنہاں نے گوجری گیت لکھیا ہیں۔ یا گیت لکھن کو حق ادا کیو ہے ان ماں اسرائیل اثر، نسیم پونچھی، رانا افضل حسین، اقبال عظیم، مہجور پونچھی سروری کسانہ، فیض کسانہ تے کشن سمیل پوری شامل ہیں۔ مثال کا طور پر کجھ اک گوجری گیتاں کا مکھڑا شامل ہیں جن توں گوجری گیتاں کی خوبصورتی تے مٹھاس کو اندازہ ہو سکے۔

اتر پہاڑوں آئیے تو یے
منوں درد سنائیے تو یے سرورمی کسانہ

اُج کر مناں دُکھیاں میرو ماہی چلیو
اُٹھ چلیو میرو یار میرو ماہی چلیو ”مہجور پونجھی“
اُج نہیں ہے قرار مناں دکھ گیا ہیں مار مناں
کیو گیو ہے بسار مناں پردیسا مل جائیے
مہجور راجوروی

چناں تیری چاننی ماں پینا نا بلاؤں گی
سدھراں سلونیاں کا گھنگھرو بجاؤں گی
اثر

خوشیاں نا چھوڑ کے تے سکھ نا بسار کے
پیار تیرو جھپو میں زندگی نا ہار کے
اثر

ٹر چلیو تھو غم لا کے،
فرحال وی نہیں چھپو پر دیسا تیں آ کے
کوٹھا پر داناں تھا،
چنگی بھلی جنڈی نا یہ روگ نہیں لاناں تھا
اقبال عظیم

کنگھی پھیروں تے دُکھیں میرا بال نی ماے
اماں ہوویں تے پھیروں درداں نال نی ماے
فیض کسانہ

۷۔ گوجری غزل

گوجری غزل کی تاریخ نظم میں خاصی مختصر ہے تے اکثر گوجری غزل ۱۹۶۵ء توں بعد کی پیداوار ہیں۔ گوجری ماں غزل کو رواج کڈھن آلاں ماں اسرائیل اثر صابر آفاقی، اقبال عظیم تے رانا فضل حسین موہرے سئی لگیں۔ سحر گوجری ادب ماں غزل سب توں زیادہ لکھی جان آلی تے ترقی یافتہ صنف ہے۔ تے نال ہی اردو ہاروں غزل گوجری شاعری کی وی جان ہے۔ گوجری غزل ماں تغزل توں ہٹ کے وی نواں نواں موضوع شامل ہو یا ہیں تے معیار تے تحلیل کا اعتبار نال گوجری غزل اردو کے نال موٹھو جوڑن کی صلاحیت رکھے۔ تے اک چنگو شگون یوہ ہے جے گوجری غزل نے شروعات اُس حقیقت پسندی کا مقام میں کی ہے جت اردو غزل صدیاں توڑی میخانہ ماں در بدر ہون میں بعد بچی ہے۔

پہلا پور کا غزل لکھن آلاں ماں مولانا ذبیح راجوری، میاں نظام الدین لاروی، مہجور، تے اثر شامل ہیں پر حقیقت یاہ ہے جے انھاں وچوں صرف اسرائیل اثر ہوراں نے باقاعدہ غزل لکھی ہیں جد کہ باقی ساراں نے محض طبع آزمائی واسطے اکا دکا غزل لکھی ہیں۔

گوجری غزل لکھن آلاں کا دو جا پور کی اگوائی اقبال عظیم، ڈاکٹر صابر آفاقی تے رانا فضل حسین کرتا سئی لگیں جن کی پیروی کریں نسیم پونجھی، مخلص وجدانی، اشتیاق شوق، سرور صحرائی، منیر چودھری، غنی عارف، خوشد یو مینی، ابرار ظفر، صابر مرزا، منشا خاکی، انور حسین انور تے امین بانہالی۔

گوجری کا نواں لکھاڑیاں وچوں، ڈاکٹر رفیق انجم کی غزل کو اسلوب کئی نواں لکھن آلاں پر غالب سئی لگے جن ماں نور محمد مجروح، خاقان سجاد، جان محمد حکیم، جاوید راہی، یونس ربانی تے ریاض صابر، غزل کا پیارا شاعر ہیں۔ گوجری غزل کا معیار تے مزاج نا اچھن واسطے اقبال عظیم، مخلص وجدانی، کے ڈی مینی، منشا خاکی تے ڈاکٹر رفیق انجم کا کلام کو مطالعہ ضروری

تے مناسب لگے۔ ساراں کاناں گنونا ممکن وی نہیں تے ضروری وی۔ کجھ ایک شعر نمونا کا طور پر درج ہیں۔ جہاں تیں گوجری غزل کا موضوعات کی وسعت تغزل تے تنخیل کی بلندی کو انداز و بخوبی ہو سکے۔

۔ ویہ پتھروی دھویئے تے بیلا وی چھپئے

(اثر) متا تھائیں بجنا کی جت جت نشانی

	فن کی جڑماں ٹپو ٹپو خون چوانو پوئے گو
صابر آفاق	آپے جھڑو ڈیو اس نے بیڑو دتو تار غزل گو
	تیرا خیال نے جے پسایو تے ہس پیو
اقبال عظیم	ہوں اونہی بے بسی ناغماں نابساں کے
	اپنا نے تیرے نان جو کیو بروکیو
سیرم پونجھی	کچا گھڑانا فرتیریں ہتھیں تھما گیا
	سام سمیٹ بھیلٹ رکھی تھی ایویں اک بے گانی شے
رانا فضل حسین	میرو ہی دل تھو ہور کسے گو چیز پرائی ہار گیو
	غم وی آنویں رات گزاران
مخلص وجدانی	دینہہ نا ہو جائیں اکو اک
	جس نے چھپا کے رکھیا تھا ج تک گھراں کاراز
احمد شناس	رشتاں کی واہ قمیض وی ہن لیر لیر تھی
	تاہنگ ملن کی ہر دم سجریں شوق تخلص میرو
اشتیاق شوق	قول اپنا تیں جدوی ہٹو رکھیئے ناں بنا کے
	تیرو ظلمی دوس نہ کوئے دنیا تننا چھو جانے
ابرار ظفر	تیرا عیب قصور وی آخر میرے کھاتے پینا ہیں

میر و کم ہے دعا کرنی دلوں لے کے زباں توڑی
 نکل کے میرا ہوٹھاں تیں دعا جانے خدا جانے ڈاکٹر رفیق انجم
 آخر گل تیں لاہنی پے گئی
 ہوں اُس پائی لہر نار نو منشاء خاکی
 چیر سمندر دھرتی بندو چن مرغ اُلاہنگ گیو
 اثر دماغاں کی یاہ قیمت دل نا کر کنگال گئی

۸۔ گوجری طنز و مزاح

گوجری شاعری ماں طنز و مزاح کی شروعات غالباً اسرائیل مہجور نان وھے۔ جنہاں نے سماجی نا انصافیاں کے خلاف قلمی جہاد مزاحیہ نظماں کی صورت ماں کیو ہے۔ انہاں تیں بعد اس میدان ماں نور محمد نور، نذیر احمد نذیر، فضل مشتاق، اشتیاق احمد شوق، تاج الدین تاج، خادم حسین قمر تے منشی خان کسانہ نے کامیاب تخلیق گوجری ادب کے حوالے کی ہیں۔ ان ساراں کا کلام کا حوالا دین تین پہلاں یوہ اعتراف وی کرتو چلوں کہ مزاحیہ شاعری ماں سب توں زیادہ کلام نور محمد نور کو ہے تے اُن تیں بعد تاج الدین تاج، فضل مشتاق تے نذیر احمد نذیر کو نمبر آوے۔ بابو نور محمد نور نے اپنی صلاحیت کو اظہار اپنا تحریر کردہ ڈراماں ماں وی بخوبی کیوتے اکثر ڈراماں مزاحیہ عنصر کی وجہ تیں کامیاب رہیا ہیں۔ گوجری ماں مزاحیہ شاعری کا کچھ اک نمونہ حاضر خدمت ہیں۔ جنہاں تے گوجری ماں مزاح کی روایت تے معیار کو اندازو ہو سکے۔

نظم: سید ہووے یا سید کو بال ہووے مہجور راجوروی

دوہتاں پوتاں کی لگے نہ تھوڑ منا کسے چیز کو کدے نہ کال ہووے

لگے کنڈ نہ عمر مانھ کدے میری، تیری مدد امداد جے نال ہووے

میری مہینس تے گاں تے گھر گلو، دھی پوت وی تیر وہی مال ہووے
 تیری داڑھی تیں جاؤں قربان پیرا، اٹھتاں پستاں تیر و خیال ہووے
 ہتھیں بدھیں رہوں کھلو ہوں پیرا گے، برہیا ہووے تے بھاویں سیال ہووے
 شیرنی پیراں گی دیوں ہوں گھر لے کے، تنگی ہووے یا وقت خوشحال ہووے
 رکھوں جمعہ کو دُدھ ہمیش سچو، انھاں گلاں کو ڈاہڈو خیال ہووے
 دیوں یار ہویں، چن تیں چن مانھ ہوں سید ہووے یا سید کو بال ہووے
 ”پیرا تیریں گل پتھر پر لیک“
 مچو رراجوروی

نظم:

ہنڈ و پالیو تیرے ہی واسطے میں، دن رات ہے تیری اڈیک پیرا
 تیرا گناں تعویزاں تے باتیاں تیں، میرا کم تے کاج ہیں ٹھیک پیرا
 شرنی واسطے کر نہ فکر کائے، مال دیوں گو کھد تے شیک پیرا
 لگیں تیریں دُعا، بد دُعا ڈاڈھیں تیریں گل ہیں پتھر پر لیک پیرا
 ’آج کو دور‘
 بابو نور محمد نور

نظم:

کہیں آج کل بڑی ترقی ہے، ہر پاسے دھکو دھکی ہے
 خاوند بھانویں لکھ پتی ہے بیوی کی نظر ماں شکی ہے

اس دور نے آخر نہیں رہنو
 کجھ اس تیں اگے نہیں کہنو

کجھ حاکم کجھ سردار ہو یا کجھ خاصا ٹبر دار ہو یا
 کجھ بڑھ لکھ خبر دار ہو یا کجھ قوم کا ٹھیکیدار ہو یا

اس دور نے آخر نہیں رہنو
 کجھ اس تیں اگے نہیں کہنو

بچیا عمر ساری کسے نے کدر ہنو، میری چار نصیحت بھلائیے نہ
 دیکھیے ماسٹر تاکدے ٹھگ نہ لیں اک تے نیڑے سکول کے جاییے نہ
 دو بے مقدم نانہ ناراض کریئے، تیجے پنٹ پتلون پھسائیے نہ
 چوتھی چیز کو ناں نہیں یاد مرنو، اپر گل ماں واہ لٹکائیے نہ

نذیر احمد نذیر

۹۔ گوجری کونثری ادب

قدیم گوجری ادب ماں نثر کا نمونہ کے برابر ہیں۔ پر جہاں نمونہ لکھیں اُن میں ثابت
 وھے جے قدیم ادبی زبان تے آج کی گوجری زبان کے بھکار اتنی بھ نہیں جتنی صدیاں کے
 بھکار ہے۔ بیہویں صدی کو گوجری ادب وی تقریباً سارا کو سار و منظوم ہے۔ تے نثر ناں گوجری
 لکھاڑیاں نے ہمیشاں توں متر و سلوک رکھیو ہے۔ پہلاں تے اس میدان ماں کسے نے
 کوشش ہی نہیں کی تے جدناں لکھاڑیاں نے نثری ادب شروع کیوتاں وی اس پاسے اتنو کسے
 وی شخص یا ادارہ نے نہیں و تو جتنو دیو لوڑیئے تھو۔

گوجری ادب کا برقا پرتیاں ماں نثری ادب کو سب توں پہلی تحریر کو جہڑو ثبوت لکھے وہ
 غلام احمد رضا مرحوم کوڈرامو ”مھارو پھر“ تھو جہڑو ۱۹۶۲ء کے نیڑے تیرے لکھیو تے سٹیج کیو گیو۔
 مہر الدین قمر سوری کسانہ، وزیر محمد ہکلہ نے گوجری کی ترقی کے بارے تحریری
 کوشش ضرور کیں۔ پرویدہ اکثر اردو زبان ماں تھیں۔ تے گوجری نثر ماں اگر کائے چیز لکھی وی
 گئی ہوئی تاں وہ آج تبصرہ واسطے نایاب ہے۔ گوجری کا اُس پہلا ڈرامہ توں بعد نثری ادب
 ماں خاموشی نظر آوے تے ۱۹۶۵ء میں بعد ہی گوجری نثر کا ثبوت لکھیں ات اک ہو رگل قابل
 ذکر یاہ ہے جے گوجری کا ناں پر جہڑی وی صحافت ہوئی ہے۔ اُن ماں ”ویر گجر“ (میرٹھ)
 ”گوجر گزٹ“ (لاہور) ”نوائے قوم“ (جموں) ”الانسان“ (جموں) ”گوجر دلش“ (جموں)

”گوجر گونج“ (لاہور) تے ”آوازِ گوجر“ (جموں) سمیت ساراں رسالاں نے گوجرا سماج کی بھلائی واسطے یا گجر قوم کا تاریخی پہلو پر تے ضرور لکھیو۔ پر وہ سب کجھ گوجری زبان ماں نہیں تھوتے نہ ہے اور اگر کسے نے گوجری زبان واسطے صفحہ یا ادھو صفحہ وقف وی کیوتاں وہ جگہ منظوم چیزاں نے مل دئی۔ تے گوجری نثرات کی اُتے کسے مہربان کی اڈیک ماں بوہے کھلی رہ گئی۔

سجرا گوجری ادب ماں نثر کی شروعات رانا فضل حسین، نسیم پونچھی تے سروری کسانہ کی چٹھیاں کی صورت ماں وہے۔ یوہ گوجری کا نثری ادب کو وہ اہم سرمایہ ہے جس نالوڈنم اچھیرن تے سمھالنے کی سخت ضرورت ہے۔ چٹھیاں کی صورت نثر ادب تخلیق کرن آلاں ماں فرد دیکھتاں دیکھتاں اقبال عظیم، غنی عارف تے امین قمر جیسا معتبر وی شامل ہوتا گیا تے اس طرح نثری ادب کی شروعات ہوئی۔ اس کے نال نال ہی رانا فضل نے ڈراما لکھنے کی شروعات کر کے نثر ادب ماں مزید اضافہ کیو تے یوہ سلسلو اجاں وی جاری ہے۔

جموں کشمیر ماں گوجری نثری کی شروعات ریڈیو کشمیر کو گوجری شعبہ کھلنے کے نال ہی ۱۹۶۹ء ماں وہے تے گوجری کہانی، انشائیا، مضمون، ڈراماں تے کہانیاں لکھن ہون لگا، اس طرح ریڈیو کا پہلا قافلہ ماں اقبال عظیم، نسیم پونچھی، چودھری قیصر الدین، امین قمر، محمد حسین سلیم، غلام حسن ضیا، فیض کسانہ تے اے، کے سہراب جیسا لوکاں نے اپنی تحریر نال نثری ادب کو بھکھو پیٹ بھرن کی کوشش شروع کیں۔ پر ریڈیو کو لمبو یوہ تھو کہ یہ چیز نثر تے ہو جائیں تھیں پر محفوظ نہیں تھیں رہیں۔ لہذا نثری ادب کی اشاعت کو بھانڈ وا جاں وی سکھو مکھو تھو۔

صحیح معنوں ماں نثری ادب کی تحریری خدمت جموں کشمیر کلچرل اکیڈمی ماں گوجری کا قیام ۱۹۷۸ء نال شروع ہوئی جس ماں گوجری لوک کہانیاں کا مجموعہ شائع کرن کے نال نال ہی گجر قوم کی زبان پر تحقیقی مقالا، کہانیاں تے افساناں، ڈراماں تے انشائیا لکھن ہون لگا۔ اس دور کا لکھاڑیاں ماں چودھری قیصر الدین، غلام رسول آزاد، امین قمر، اے، کے۔ سہراب، غلام حیدر عادل، مختار الدین تبسم، غلام حسین ضیا، محمد حسین سلیم، عبدالغنی عارف، شریف شاہین توں

علاوہ بجا طور پر اقبال عظیم نے نسیم پوچھی خود وی شامل تھا۔

ڈراما لکھن آلاں ماں رانا فضل حسین، اے، کے سہراب (مجموعہ ”چون“) اقبال عظیم، غلام حسین ضیا، گلاب الدین طاہر، سرور صحرائی تے بابو نور محمد کا ناں نمایاں ہیں جد کہ کہانیاں ماں چودھری قیصر الدین قیصر، غلام رسول آزاد، امین قمر، مختار الدین تبسم، محمود رانا، ڈاکٹر نصیر الدین بارو کے علاوہ اقبال عظیم تے نسیم پوچھی نے معیاری کہانیاں لکھی ہیں۔

انشائیہ لکھن ماں نسیم پوچھی، امین قمر، سلیم، منشا خاکی تے رفیق سوز کا ناں لکھیں۔ تحقیقی مقالات ماں سکندر حیات طارق، خوشد یو مینی، کرم الدین چوڑہ تے اقبال عظیم توں علاوہ سروری کسانہ (مرحوم) کی مخلصانہ کوششاں توں انکار کی گنجائش نہیں ہے۔

کتابی شکل ماں جت تک گوجری نثری ادب کو تعلق ہے تاں ۱۹۹۲ تک صرف دو کتاب سامنے آئی ہیں۔ گوجری ریڈیائی ڈراماں پر مشتمل اے۔ کے۔ سہراب کی کتاب ”چون“ ۱۹۸۷ء تے غلام رسول اصغر کو پہلو گوجری ناول ”آخری سہارو“ ۱۹۹۱ء۔ تعداد کا لحاظ ناں گوجری کہانیاں، تحقیقی مقالات، تے انشائیہ غالباً دو جی چیزاں توں زیادہ لکھن ہو یا واپس گا۔ پر کتابی صورت ماں اس طرح کی صنف دیکھن نا اجاں تک گوجری اکھ تسانی سئی لگیں۔ ہاں اگر گل معیار کی جائے تاں مایوس ہون آلی کا تے گل نہیں۔ رانا فضل کا ڈرامہ ”روشنی“ سمیت جموں کشمیر ماں لکھن ہون آلا تے سٹیج کیا جان آلا ڈراماں دیکھن تے سنن آلاں نے سچ پسند کیا ہیں تے اکثر نا ڈرامہ فیسٹیول ماں انعام وی ملیا ہیں۔

گوجری افساناں ماں چودھری قیصر الدین، غلام رسول آزاد، اقبال عظیم، محمود رانا، امین قمر تے مرزا خان وقار کی کہانیاں کسے وی زبان کا اچا افسانہ نگار کی کہانیاں ناں اکھ بھڑا سکیں۔ بلکہ ویہ اس قابل ہیں جے انھاں نا دو جی زبان ماں ترجمہ کر کے باقی دنیا توڑی پہچان کی لوڑ ہے۔ پر بے حسی مجبوری یا لا پرواہی کو یوہ عالم ہے کہ یہ سب حضرات چنگی مالی حالت ہون کے باوجود اپنی تحریراں نا کتابی شکل دین تیں بھکیں خورے کیوں؟

۱۰۔ گوجری زبان کی غیر سرکاری اشاعت

جدید گوجری ادب کو تعلق ریاست جموں و کشمیر نال ہے۔ جت بیہویں صدی کی ابتدائی ماں کچھ مشہور شاعران نے فارسی، اردو تے پنجابی تیں ہٹ کے اپنی ماں بولی گوجری زبان ماں لکھنؤ شروع کیو۔ پر اُس دور ماں جووی مواد تخلیق ہو یو۔ اُس کو اکثر حصوا اشاعت کی کمی کی وجہ تیں ضائع ہو گیوتے جو کچھ آج مہارے باندے ہے وہ وی یاتے زبانی سینہ با سینہ بتیاں کی صورت ماں بچھو ہے تے یا کچھ اک قلمی نسخا دستیاب ہوا ہیں۔ جھاں ناسام سمھان کے رکھن یا شائع کرن کی کسے نے ضرورت محسوس نہیں کی۔ اس کی اک بڑی وجہ یاہ وی ہے کہ پہلا دور کا تقریباً سارے شاعر یا عام طور پر کوئے وی شاعر مالی طور پر اتسو کھونہیں ہوتو جے وہ خود اپنیاں تخلیقات نا دنیا تک پہنچا سکے تے اس لحاظ نال ہمیشاں دنیا کو خاص کر سخن شناساں کو محتاج رہے۔ تے دنیا نے وی حسب دستور کدے ان کولاں کی قدر کم از کم جیتاں جیتاں نہیں کی تے تبجو یوہ جے اکثر شاعری نایاب یا کمیاب ہوتی گئی۔

ملک کی آزادی توں بعد اس مسئلہ پر غور کر کے کچھ لکھاڑیاں نے آپ اپنی مدد کرن کی ٹھان لی۔ تے اکٹھا ہو کے کچھ تنظیم بنائیں۔ جھاں نال شاعران نا اہنؤ کلام شائع کران ماں کچھ آسانی ہو سکے۔ اس قسم کی پہلی کوشش پاکستان وچوں شروع ہوئیں جت ”ادارہ ادبیات“ ادبی بورڈ کا نا ملن نال قائم ہون آلاں اداراں نے گوجری ادب کی خدمت شروع کی جہڑی آج تک وی جاری ہے۔ یوہ بہادرانہ قدم چان آلاں ماں مولانا مہر الدین قمر، مولانا ذبیح مرحوم راجوروی، احمد دین عزیز سوز ہزاروی، مجور راجوروی، صابر آفاقی تے رانا فضل حسین ہور موہریا تھا۔ ان سب حضرات نے اپنی کتاب وی چھاپیں تے دو جاں کی خاطر خواہ مدد کی۔

پر آج تری (۳۰) چالی (۴۰) سال گذرن توں بعد وی گواہنڈی کورتولاں منہ دیکھ کے جموں کشمیر ماں کسے نا اتنی غیرت نہ آئی جے چنڈ مار کے ہی منہ لال کر لیتا۔ اس پاسے آج

توڑی وی کائے اس طرح کی تنظیم نہ بنی جہودی گوجری شاعت کی ضرورت محسوس کرتی یا اس سلسلہ ماں کوئے قدم چاتی۔ گوجری سنگت تے انجمن ترقی گوجری ادب ”کانا ناں قائم ہون آلی تنظیم ماں نے اس سلسلہ ماں کوئے اہم کم نہیں کیو۔

۱۹۷۸ء ماں کلچرل اکیڈمی سرینگر ماں گوجری شعبہ قائم ہون توں بعد ہی ات کی گوجری نا اشاعت نصیب ہوئی اور جموں کشمیر ماں تخلیق ہون آلا ادب کی کئی سالوں کی تس بھان کو موقوفہل گیوتے آج توڑی گوجری کی ساری اشاعت بالاد واسطہ یا بالواسطہ کلچرل اکیڈمی ناں تعلق رہیو، نجی طور پر شائع ہون آلی کتاباں ماں وی اکیڈمی کی طرفوں امداد یا انعام کی صورت ماں مالی مدد ملتی رہی ہے۔ پر جموں و کشمیر ماں شائع ہون آلی اکثر کتاب شاعراں نے نجی طور پر چھاپیں ہیں تے جموں و کشمیر کی گوجری واسطے یوہی آج توڑی اشاعت کو عام دستور ہے۔

گوجری غزل کو سفر

ڈاکٹر رفیق اعجم

غزل یا شاعری جیسا نازک موضوع پر گل کرن یا سنن واسطے توجہ بہت ضروری ہے۔
تے اس نا پوری طرح سمجھن واسطے تم نامیر ناں چھیدے چلنو پوئے گو کیونکہ گوجری غزل توں
پہلا اردو تے فارسی غزل کو مطالعووی میرے نزدیک ادھوری کوشش ہے۔ اس توں پہلاں ہم نا
غزل تے اس توں وی پہلاں شاعری کو منڈھ لوڑنو پوئے گو۔

کائنات جس حالت ماں مہارے سامنے موجود ہے۔ یاہ سدا توں ایسی نہیں تھی۔
بلکہ ایک طویل ارتقا توں بعد اس شکل ماں آئی۔ لیکن خالق کائنات کا تصور ماں اس کو نقش و وجود
توں بہت عرصہ پہلاں توں موجود تھو۔ اس طرح ہر تخلیق کا وجود ماں آن توں اس کا تصور کی ایک
الگ بلکہ زیادہ ضروری تاریخ کو مطالعو ضروری ہے۔ علامہ اقبال نے بالکل سچ فرمایا ہے کہ:

ع اٹھتا ہے قدم پیچھے بنتا ہے نشاں پہلے

دنیا کی باقی تخلیقات کی طرح غزل، شاعری یا ادب کو نشان وی کاغذی اور قلمی شکل
ماں آن توں پہلاں تصوراتی طور پر موجود رہو ہے۔

جدہم زبان تے ادب کو ذکر کرناں تاں یاہ گل صاف ظاہر ہو جائے، جے اپنا ولی مدعا
نادو جاں پر ظاہر کرنو انسان کی اہم ترین ضرورت رہی ہے۔ تے اسے اظہار واسطے زبان وجود
ماں آئی۔ لیکن انسان کی زبان توں ادا ہون آئی ہر گل ادب نہیں تے فر گل ناچ ناں بیان کرنو
تے لطیف جذبات کو اظہار ادب ہے اور شاعری۔

اپنا جذبات نا، اپنا مفہوم نا خوبصورتی ناں ادا کرنوے تے دو جاں تک پہچانو

شاعری ہے۔ اس طرح شاعری کو آغاز تے انسانی تاریخ کو آغاز اک ہی نقطہ پر پہنچ جائے اس سلسلہ ماں اختر الایمان کو بیان میرے نزدیک بڑو وزن دار ہے کہ:

”دھرتی پر جس دن پہلا پھول کھلا تھا، پہلی بار لیش ہوئی تھی، پہلا ظلم ہوا تھا، شاعری اسی لمحہ شروع ہو گئی تھی اور جب تک حسن موجود ہے شاعری ہوتی رہے گی۔“

میرے نزدیک شاعری کو آغاز اُس توں وی تھوڑو پہلاں ہو یو۔ جد پہلا انسان کی تخلیق ہوئی اور اُس ناحت جیسی جگہ ملی جت آسائش کی ہر واہ چیز وی موجود تھی۔ جس کا انسان تصوّہ روی نہیں کر سکتو تے آدم علیہ السلام نے سب کچھ ہون کے باوجود اپنے اندر ایک خلا محسوس کیو اور ایک ایسا وجود کی دعا کہ جس نال اس کی دلجوئی ہو سکے۔ اُن کا ذہن ماں پوہ کمی کو احساس تے دل لبھان آلا اک وجود کو تصوّہ رہی میرے نزدیک شاعری کو آغاز ہے۔ تے آج شاعری جتنی صفاں ماں تقسیم ہو گئی ہے۔ اُنھاں ناسا منے رکھ کے اگر اُس احساس کو اُن جذبات کو تصوّہ ر کیو جائے، جہر ان کا ذہن ماں پیدا ہو یا تھاتاں وی غزل کی موجودہ تعریف پر پورا اتریں کہ ”غزل کے لغوی معنی ہیں عورتوں سے باتیں کرنا“ اس لحاظ نال وی اگر ادا کی بیٹی کے متعلق کائے گل کرنی یا سوچنی غزل ہے تاں ادا کے متعلق آدم کو پہلو تصوّہ ریا اُن کے بارے دعا بلاشبہ پہلی غزل تھی۔

اک نازک نقطو جہر و سمجھن کی ضرورت ہے کہ اگر جذبات یا مفہوم خوبصورتی نال ادا کرنو شاعری ہے تاں یہ سب خصوصیات تے غزل ماں وی موجود ہیں۔ فر شاعری وچوں غزل کی الگ اہمیت یا خاصیت کے رہ جائے اس واسطے ہم نا جدید اردو غزل کا ایک بڑا شاعر ڈاکٹر بشیر بدر کو لوں رائے لینی پوئے گی۔ ویہ کہیں کہ عورت کے سامنے گل بات ماں انسان کو لہجو قدرتی طور پر سنور جائے اگر اپنا مفہوم نا سلیقہ نال بیان کرنو شاعری ہے تاں شاعری کو مزید سنور یو و لہجو غزل ہے گویا غزل ادب یا شاعری کی سب توں اعلیٰ اور سلجھی وی قسم ہے۔

میرے نزدیک ”خدائی تخلیقات ماں عورت کو جڑ اعلیٰ مقام ہے۔ انسانی ادب ماں

اس کے شایان شان لہجہ یا سلیقہ غزل ہے، یا مختصر کہنو ہوئے تہاں ”نازک کا بارہ ماں نازک خیالی غزل ہے“ کیونکہ ہر تخلیق کا وجود ماں آن توں پہلاں اس کو تھوہ رموجود تھوہ۔ یا تصوراتی طور پر شاعری اور خصوصاً غزل کی تاریخ پہلا انسان تک پہنچے اور ان کی زبان توں ادا ہون آلو پہلو کلام تخلیق کا طور پر شاعری تھی۔ اور ادب تے شاعری کی تعریف اور تقسیم کے مطابق اک عورت کا وجود کو تھوہ رہی غزل تھوتے اس طرح پہلا انسان تے ہی شاعری کو آغاز کیو اور سب توں پہلاں وجود ماں آن آلی صنف غزل تھی اس توں انکار کی گنجائش نہیں ہے۔ وقت کے نال نان ہر تخلیق کی طرح ادب کا میدان ماں وی ترقی ہوئی۔ نواں نواں تجربا ہویا نوں نوں صنف وجود ماں آئیں تے الگ الگ صنفاں کی پہچان واسطے تعریف اصول تے ضابطا مرتب ہویا۔ مگر بنیادی اصول ویہی رہیا۔ سب توں پہلی غزل ”عورت کو تھوہ“ سب توں پہلو قصیدو ”سبحان اللہ“ تے سب توں پہلو مرثیو ”آقروں“ کی صورت ماں وجود ماں آئیو۔

غزل کا اصطلاحی پہلو پر گل کرن توں پہلاں اک ہور نازک خیالی کو ذکر ضروری سمجھوں، ہر اک نازک مزاج جانور ہے۔ ہرن کا بچہ نا ”غزالہ“ کہیو جائے۔ وہ جس ویلے شکاریاں کا گھیرا ماں آکے مجبور ہو جائے تے اُس کا منہ توں جھڑی چیخ نکلے اُس نا غزل کہیں۔ اس کی تصدیق اک روسی شاعر کا بیان توں ہوئے کہ شاعری اک کمزور انسان کا اندرونی کرب کو اظہار ہے۔

غزل کی تعریف ادب کا ماہرین نے کئی طرح نال کی ہے۔ پر میرا ذاتی مطالعہ کے مطابق مناجہدی تعریف سب توں زیادہ موزوں لگے واہ ہے اللہ پاک کا اپنا کلام ماں۔ قرآن پاک چودھواں سپارہ ماں سورۃ النحل کی آیت نمبر ۸۲ ماں جانوراں کا فائدہ بیان کرتاں، انکا، بال، ریشہ یا سنڈو کا معنی ماں اشعار کو لفظ استعمال ہو یو ہے (ومن اصوائھا و اوبارھا و اشعارھا) جد کہ اسے سورۃ کی آیت ۹۲ ماں کتیا واسوت کی اٹی واسطے غزل کو لفظ استعمال ہو یو ہے (ولانکونوا کا اٹی نقضت غزلھا)۔ اتفاق کی گل ہے جے یہ دوئے مثال گوجر ماحول کی ہیں

تے اس زندگی کو تجربہ بورکھن آلا کسے وی لکھاڑی واسطے اُس پوہریا کو اندازو لا نو مشکل نہیں ہو سیں جس نال تمد و تمد و تا تم کت تے ائیر کے ائی بنیں۔ غزل کی تخلیق ماں وی اسے تجربا توں گذر نو پوئے تے لہذا غزل کی ساخت نا سمجھن واسطے اس توں بہتر کائے مثال نہیں پیش کی جاسکتی۔

اس تاریخ توں بہت بعد ماں جد انساناں تہذیب تے ترقی کی تحریک کو سلسلو شروع ہو یو تے تخلیق کی تقسیم اور حد بندی طے ہوئیں۔ غزل کا بنیادی لوازم تے عربی شاعری ماں لہیں پر غزل کی موجودہ شکل لور و راج فارسی ماں ہو یو۔ جس نار دو نے مزید نکھار بخشو۔ آج فارسی تے اردو توں علاوہ پنجابی، گوجری اور بے شمار دوجی زبانوں ماں وی غزل لکھی جا رہی ہیں۔ مگر زبانوں کا فرق نال غزل کی تعریف یا شکل ماں کوئے فرق نہیں سامنے آ یو۔ غزل کی مزید توضیح۔ شاعری اک ایسولا ڈلو جو روگ ہے جس کی پال پرہیز ہراک تے نہیں ہو سکتی تے غزل جیسی نازک صنف واسطے مزید احتیاط کی ضرورت ہوئے سچ تے پوہ ہے کہ غزل وہی لکھ سکے جس نا محبوب کی ناز برداری کو بیچ آ یو ہوئے۔

غزل کی شناخت واسطے اُس کی ساخت، مزاج تے اسلوب کو خیال رکھنو ہوئے۔ غزل کی ساخت تے اصول تے اصول یہ ہیں کہ غزل ماں پنج یا اس توں زیادہ شعر ہو یوں۔ ہر شعر دو مصرعاں پر مشتمل ہوئے۔ پہلا دو مصرعا ہم ردیف اور ہم قافیہ ہو یوں۔ اس نا مطلع کو کہو جائے۔ کئی دفعہ دوسرے شعر بھی اسے طرز کو ہوئے۔ تاں اُس نا ”حسن مطلع“ کہو جائے۔ تمام شعراں کو ہم ردیف تے ہم قافیہ ہو نو ضروری ہے۔ معنی لا لحاظ نال شعر اپنی جگہ مکمل ہوئے۔ اور ہر شعر کو مضمون الگ ہوئے کئی دفعہ دو یا اس توں زیادہ شعراک ہی موضوع پر ہو یوں۔ اس نا مطلع کو کہو جائے۔ ہاں جدید غزل ماں یاہ گنجائش وی موجود ہے۔ کہ پوری غزل ایک ہی موضوع پر ہوئے جس نا ”غزل مسلسل“ کہیں۔

ادائیگی کا لحاظ نال غزل لطیفہ کے نزدیک جا لگے یعنی سنن آلا کی توجہ شامل ہو نو ایک مصرعہ توں بعد تنگی کو احساس یا پہلی جیسی کیفیت جس کو جواب عموماً دوسرا مصرعہ ماں موجود

ہوئے، یا اس طرح سمجھ لیو کہ سنن آلو غزل کہن آلا کی تجرباتی کیفیت محسوس کرتو رہ جائے،
تے یو ہی وہ مقام ہے جت سنن آلا کا منہ توں ”واہ“ کا لفظ نکلے۔

موضوع کا اعتبار نان غزل کو دائرو وسیع ہو گیو ہے۔ اور شاید ہی کوئے ایسو موضوع
ہوئے، شاعری کو جہر و غزل ماں نہ آ پو ہوئے لیکن غزل کی پہچان یا شناخت واسطے خیالی نازک
بیانی بے شمار موضوع آجان کے باوجود وی غزل کو سارو تانو بانو محبوب کا تھوڑا کی بھیری بنیو
جائے، بے شک غزل ماں آج ہجر و فراق ملن و چھوڑا درد، خوبصورتی، غم جاناں، غم دوراں کے
نان نال تھوڑا جیا موضوع وی داخل ہو گیا ہیں۔ پراس کی پہچان آج وی تغزل اور نغمگی توں
ہے، جہڑی اُس کی بنیادی خصوصیت تھیں۔

غزل کا بارہ ماں ہن تک جو کچھ کہیو گیو ہے۔ یوہ فارسی اور اردو غزل کی طرح پنجابی
اور گوجری پروی ثابت ہوئے۔ اس کی ایک وجہ یا وی ہے کہ شاعری اور خصوصاً غزل کو تعلق دل
نان ہے اور دل کی کائے اک زبان نہیں ہوتی۔ دل کو سراپو جذبات ہوئیں۔ انھاں کا اظہار
واسطے کائے وی زبان استعمال کی جاسکے۔

گوجری ادب کی تاریخ چونکہ مرتب نہیں اس واسطے اس کا آغاز کو صحیح انداز و مشکل
ہے۔ بہر حال موجود شہادتوں کے مطابق گوجری شاعری کو آغاز یا رھوئیں صدی ماں ہو یو۔ لیکن
یاہ زبان آج کی گوجری زبان توں ذرا مختلف تھی۔ پھر وقت کے نان نال اس ماں نکھار آ تو گیو۔
آج بھی ہندوستان ماں گوجری نان ملتی جلتی ساری بولیں بولی جائیں۔ لیکن کوئے اس نا
گوجری کوناں نہیں دیتو۔ پر لا۔ ۱۷۰۰ء صدی کا شاعران نے اپنی اس ویلا کی زبان واسطے
باضابطہ گوجری کوناں استعمال کیو ہے۔

گوجری زبان نا اپنی اصلی حالت ماں محفوظ رکھن ناں سب توں زیادہ تھہ ان خانہ
بدوش قبیلان کو ہے۔ جھاں نے تحریری سہولیات نہ ہون توں پہلاں وی صدیاں تک اس
زبان کو لہوسینہ باسینہ اپنی اصلی حالت ماں موجود رکھیو۔

گوجری زبان ناموجودہ حالت ماں اور تحریری طور پر نکھار کے دینا کے سامنے پیش کرن کو سہرو بلاشبہ جموں و کشمیر کلچرل اکیڈمی کے سر ہے۔ جس نے ۱۹۷۸ء ماں گوجری شعبو قائم کر کے اس زبان کی پذیرائی کی۔ گوجری ادب کی تاریخ وی تے زیادہ طویل نہیں۔ پر خصوصاً گوجری غزل تے اس کل کی بچی ہے۔ جہڑی کم عمر ضرور ہے۔ پر لفظاں کی خوبصورتی، سوچ، بناوٹ، شوخی تے خیالات کی امیری ماں دوجی پہناں توں ذرا وی گھٹ نہیں۔ بھانویں گوجری ماں غزل تے باقاعدہ طور پر ۱۹۶۵ء توں بعد ہی لکھی گئی ہیں۔ اس عرصہ ماں اچھی غزل وجود ماں آئی ہیں۔

کسے وی زبان کا ادب پر زبان بولن آلاں کا سماجی تہذیبی پس منظر کو اثر وی لازمی طور ور ہوئے اور اس دھرتی کی تاثیر وی شامل ہوئے جس پر کائے تہذیب تے زبان جمی پئی تے جوان ہوئی ہوئے۔ گجرتوم کی تاریخ کی طرح گوجری زبان نے وی کافی عرصہ تک تتی ہوا برداشت کی ہیں اور انتی گھائی بادھی، لٹھی، چڑھی شاید ہی کسے ہور زبان نے دیکھی ہویں۔

اس ماں شک نہیں کہ غزل کی ابتدا فارسی شاعری ماں شروع ہوئی اور اس توں بعد اردو اور پنجابی شاعری نے اس صنف نا پوری طرح قبول کیو۔ اور اس حد تک کہ غزل اردو شاعری کی پہچان اور جدید شاعری کی سب توں مقبول ترین صنف اور شاعری کی ملکہ بن کے سامنے آئی۔ غزل آج وی کئی زبانوں ماں لکھی جا رہی ہے۔ پر یاہ گل صاف واضح ہے کہ اردو توں بغیر کسے وی دوجی زبان کو گوجری پر براہ راست کوئے احسان نہیں۔ فارسی کو اگر کوئی اثر ہو یو، وہ اردو کا رشتہ نال ہوئے گو تے باقی زبانوں ماں گوجری کے قریب ترین پنجابی ہے۔ پنجابی کو گوجری زبان نال اور خصوصاً شاعری کا میدان ماں گہر ورشتو موجود ہے۔ جس کی وجہ اک جیسو سماجی تہذیبی تے ثقافتی پس منظر ہے اور اس گل کو اعتراف وی کرن پوئے گو کہ گوجری کی مشہور صنف سی حرفی پنجابی کی دین ہے اور گوجری ماں وی کامیاب سی حرفی انھاں ہی شاعراں نے لکھی ہیں۔ جہڑا پہلاں پنجابی ماں لکھتار ہیا تھا۔

لیکن ات یہ ذکر وی ہوں ضروری سمجھوں کہ پنجابی غزل کی تاریخ وی اتنی طویل نہیں کہ گوجری غزل پر کائے چھاپ چھوڑتی۔ گوجری ادب کی اتنی عمر وی بڑی گھٹ ہے اس کا کچھ نقصان وی ہیں۔ جہذا گجرتوم صدیاں توں برداشت کرتی آرہی ہے۔ پراک خوش قسمتی وی ہے۔ اس کے نال ہی جے کم عمر آلا کے اگے جوانی کا مرحلا ہویں تے چڑھتی جوانی کو لطف گوجری شاعری تے گوجری غزل ایک ایسا دور ماں اتھارہی ہے جس نا پوری طرح ترقی یافتہ دور کہو جاسکے۔ کہن کو مقصد یوہ ہے کہ جت مچ ساری زبان ڈھلتی عمر کو فکر لے کے بیٹھی وی ہیں بلکہ کچھ اک تے ڈبتاں ڈبتاں باندے ارہن واسطے کوشش کریں۔ ات گوجری نا اس طرح کو کوئے غم نہیں بلکہ گوجری شاعری اور گوجری غزل کی جوانی پوری قدر دانی اور پذیرائی ہو رہی ہے۔

دو جو پہلو جہد و کم عمر کی وجہ توں گوجری غزل واسطے خوش قسمتی کو باعث ہے کہ جد غزل فارسی ماں شروع ہوئی تاں اُس کو رنگ ڈھنگ کچھ ہو تھو، پر گذرتا وقت کے نال نال تہذیب بدلیں۔ رسم و رواج بدلیا۔ جدید سائنسی ایجادات ہوئیں۔ کائنات کا بارہ ماں نواں نواں رزا کھلیا۔ نواں تجربا ہویا۔ ہر میدان ماں ان بدلتی قدراں تے نواں تجرباں کو اثر غزل پر وی ہو یو۔ غزل جہدی شروع ماں شراب، شباب، میخانہ، شمع، تپنگا تے گل و بلبل کے چو فیری پھرے تھی، وقت کے نال نال حقیقت پسندی تے غم دوراں کی تلخی بھی غزل ماں اس حد تک داخل ہو گئی کہ آج اردو کو ایک شاعر کہہ:

پہلے غزلیں شراب پیتی تھیں

نیم کا رس پلا رہے ہیں ہم

حقیقت پسندی ماں شاید سائنسی ایجادات تے تجربات کو بڑو تھہ ہے۔ آج کی اردو غزل ماں دیو لے کے وی لوڑیاں ماں نہ کدے سرو قد محبوبت لہتے نہ مؤ، کمر گل و بلبل تے پر پرواز کا قضیہ وی کوئے نہیں گنتو تے شراب کو نشو وی ختم ہو کے ہن تلخی کو احساس ہون لگ پیو

ہے جد کہ یہ سب کیفیات پرانی غزل کی پہچان تھیں۔ مختصر یہ کہ جت اردو غزل صدیاں کی مدہوشی توں بعد پہنچی ہے گوجری غزل نے اکھ ہی اُسے پڑا رکھولی ہیں۔ اور پہلاں ہی حقیقت نان نظر ملائی ہیں۔ جتنا تجربا توں بعد اردو غزل ماں نکھار آ پو ہے۔ اور جس غزل نا بڑا فخر نان جدید غزل کو ناں دتو جائے گوجری غزل نے اپنو سفر ہی اُتوں شروع کیو ہے۔ گوجری ماں جدید تے قدیم کو سوال ہی نہیں گوجری ماں یہ جدت نمایاں ہے اور اس نا اُن تجرباں توں نہیں گذر نو پتو نہ ہی گوجری غزل ماں ویہ پراٹا اشارہ ہیں جہاں نا اُج کی شاعری ماں عیب کے برابر سمجھو جائے یاہ اک ہور خوش قسمتی ہے کہ گوجری غزل کی گل کرتاں فارسی تک کو حوالو اس واسطے ضروری ہو جائے کہ غزل بنیادی محرک عشق ہے اور عشق زباناں کی حد بندی قبول نہیں کرتو۔ اس ماں شک نہیں کہ غزل کو موجودہ مجسمو فارسی تے تراش کے باندے آئیو۔ لیکن اس حقیقت توں وی انکار کی گنجائش نہیں کہ غزل کی روح ہمیشاں توں موجود تھی اور موجود رہے گی۔ اس طرح اگر عشق تے تغزل ازلی جذبا ہیں تاں غزل کی عمر وی واہ نہیں جھوی فارسی توں اُراں گئی جائے لہذا گوجری غزل کو ذکر کرتاں عین ممکن ہے کہ نا بچوں بچوں چھٹاں جانا پے جائے۔ اک ہور گل کو اعتراف کرنو وی ہوں ضروری سمجھوں کہ جت لطیف جذباں کا اظہار واسطے فارسی تے اردو غزل کو سہارو لیو۔ گوجری شاعری ماں پو ہی کم شروع شروع ماں اک ہور صنف سی حرفی توں لیو جا تو رہو ہے۔ بلکہ پنجابی کو وی پو ہی حال تے تے سی حرفی پنجابی توں ہی ڈھل کے گوجری ماں آئی ہے۔ یعنی موضوع کا اعتبار ناں سی حرفی غزل کے بڑی قریب ہے اور دو آن ماں اک جیاس مضمون شامل ہیں۔

ہاں ظاہری شکل تے علم و عروض کی تقسیم انھاں نا الگ الگ صنف بناویں۔ پھر وی ہوں سی حرفی نا غزل کی سوکن نہیں سمجھو۔ بلکہ غزل جد توں گوجری شاعری ماں داخل ہوئی۔ اک بھر پورا اور آزاد صنف کا طور پراہنی سوہنی صورت تے پوری اہمیت کے نان موجود ہے، اور اس ماں تخلیق کی رنگارنگی تے معنوی وسعت کی کائے کمی محسوس نہیں ہوتی اور گوجری غزل ماں وہ

سب کچھ موجود ہے۔ جہڑا درد و غزل نے صدیاں کا تجرباں توں بعد حاصل کیو ہے۔
 گوجری غزل کی تاریخ زیادہ پرانی تے نہیں۔ پھروی آج تک گوجری ماں جتنی وی
 غزل لکھی گئی ہیں اور جن جن شاعراں نے اس ماں طبع آزمائی کی یا منہ مار یوان ساراں نا
 پڑھن توں بعد جہڑی گل سامنے آنویں۔ اُنھاں بچوں کچھ اک گل اپنی جا کی ہیں، شریکاں کے
 باندے کرن جوگی نہیں۔ غزل نہ عوام کا پڑھن سنن کی چیز ہے تے نہ ہی غزل لکھنو عام آدمی
 کا بس کو کم ہے۔ پر اس کے باوجود تقریباً ہر ایک شاعر نے غزل لکھن کی کوشش کی ہے تے
 اس کوشش ماں کچھ لوک ظاہری شکل کو خیال وی نہیں رکھ سکیا۔ تے اُنھاں نے جو کچھ لکھ کے
 اس پر غزل کو لیبل لایو ہے، گویا سوہنا جیا محبوب نا ہالیاں، مانجھیاں آلی لہر لوائی ہیں۔ بہر
 حال ہوں اہنی جا اس طرح کی تحریراں نا غزل نہیں تسلیم کو تو، بھانویں یہ شاعر ہر سال اک
 دیوان کڈھ چھوڑیں۔

غزل میرے نزدیک اک پیاری تے محبوب شے ہے اور جس طرح میں پہلاں وی
 ذکر کیو کہ غزل کو مزاج ویہی خوش قسمت سمجھ سکیں، جھاں نا محبوب کی ناز برداری کوچ کوچ اتو ہونے
 اس ماں شک نہیں کہ منزل کے اندر موضوع تے مضموناں کی وسعت ہوگئی ہے اور ہر قسم کا
 مضمون شامل ہو گیا ہے۔ لیکن اس کے باوجود کچھ مضمون ایسا ہیں، کچھ لفظ تے اشارا ایسا ہیں،
 جہڑا غزل نے کدے برداشت نہیں کیا اور ویہ غزل کے پر بھار محسوس ہویں۔ ذرا دیکھو۔
 آؤ مھیس اہنی کھڑاں کشمیر رے تم کیوں ات دھپ سڑیں دگیرے
 آٹو دانو، خرچ تے گھاہ کی بھری گھوڑا اُپر بسترا تے لہرے

غزل ماں اس طرح کو ذکر غزل ناں ظلم نہیں تے ہوو کے ہے گوجری غزل ماں
 ویسے تے گوجری کا ہر اک شاعر نے کوشش کی ہے، پر اس کو مزاج کچھ اک ہی سمجھ سکیا ہے۔ منا
 ذاتی طور پر شعر ناں پیار ہے۔ بڑا یا چھوٹا شاعر کو تھوڑا میرا ذہن ماں نہیں، ہوں اچھا شعر کی
 تعریف کروں گو، بھانویں شاعر نے وہ اک ہی شعر لکھو ہونے اور اکثر ایسو ہونے کہ کوئے

اک شعر ہی کسے شاعر کی پہچان بن جائے اور شاعرنا شہرت بخشے ہوں دراصل یاہ گل کہتا چاہوں کہ گوجری غزل ماں کچھ ایسا شاعری ہیں جنہاں نے اچھی غزل لکھی ہیں اور غزل لکھن کی صلاحیت رکھتیں بھانویں اُن کو کلام ہو رکھ سال کتابی صورت ماں نہ آوے پر شیرازہ ماں ان غزلاں کی شمولیت ان نواں شاعراں کی حوصلہ افزائی واسطے اہم ہے۔

ہن تک جن شاعراں نے کتاب چھاپی ہیں۔ ساراں نے غزل شامل کی ہیں۔ جناب نسیم پوچھی کی نین سلکھنا، اسرائیل اثر کی ”دھکھتیں آس“ اقبال عظیم کی ”سمجھ کو لیتیں“ اسماعیل ذبیح کی انتظار اسرائیل مہجور کی نغمہ کو ہسار، مخلص وجدانی کی ”ریرا“ عبدالغنی عارف کی ”پتھر چھاں“ صابر آفاقی کی ”پھل کھیلی“ قاسم بجران کی ”تاہنگ رنگیلی“ احمد دین عنبر کی غزلاں کا دو مجموعا ”رموز و اسرار گوجری شاہکار“ تے ”گوجری گیان“ عنبر کو دیوان“ سرور چوہان کی نین کٹورا، سرور صحرائی کی سحری سویل، ڈاکٹر انجم کی دل دریا تے سوغات، نور محمد مجروح کی لہو کا اتھروں تے سحری یاد، منشاء خاکی کی لخت لخت تے نور محمد ٹور کی بدلتو دور قابل ذکر ہیں۔ اگر ان ساراں کو تنقیدی جائز و لیو جائے تاں کچھ تلخ حقیقت سامنے آویں۔ جہد غزل کا مزاج نا سمجھ سکلیا ہیں ویہ لکھن ماں آلسی ہیں تے جہد اکھلا ڈلا لکھیں ویہ سمجھن تیں قاصر ہیں۔

یاہ گل صرف صاحب کتاب شاعراں ماں نہیں بلکہ باقی شاعراں وچوں وی جہد جہد اچھی غزل لکھن کی صلاحیت رکھیں۔ ویہ خدا جانے کیو لکھن تیں آلس کرین۔ تے نتیجہ ویہ ہوئے کہ اُن لوکاں نا لکھن کی کھل لہجہ جائے۔ جہد غزل نال انصاف نہیں کر سکتا۔ گوجری ادب واسطے اسرائیل اثر کی خدمات کو اعتراف نہ کر تو کفر ہے تے شائد گوجری ماں پہلی غزل کا خالق وی ویہی ہیں تے سب توں زیادہ غزل لکھن آلا وی جہانے کچھ جج ہی سوہنا مضمون غزل ماں سمیٹیا ہیں لیکن جس حد تک ویہ گوجری گیت کی رگ پکڑ سکلیا ہیں، غزل کا میدان ماں امیدیاں پر پورا نہیں اُترتا۔ ان کی کچھ غزل اس حد تک اردو اور ہندی زدہ ہیں کہ پڑھن آلا نا یوہ احساس ہوئے کہ گوجری زبان شاید غزل واسطے موزون نہیں۔ ذرا یہ شعر دیکھو۔

فرمنا ارمان میرا اس کا در تک لے گیا ناز بے پرواہ تے حسن منظر تک لے گیا
میں زمانہ تے چھپا رکھیو تھو وہ لہو خلوص دردِ دل کی کوٹھڑی تے محروم تک لے گیا

دیتا میں تنگ و ناموس و جوانی تے امنگ

اس نشیلا کی محبت فرمنا ازمائے تھی

ہو رکچھ مصرعہ دیکھو ع نہ کم آئے رندی نہ ات ہوشمندی

یا ع کچھ کہو بہاراں کی کلیورنگ دے کے گئی صبا کنگا

کسے وی زبان ماں دوجی زبان کا لفظاں تو پرہیز پوری طرح نہیں ہو سکتی لیکن لفظ اتنا
ہی استعمال ہونا چاہیے جہاں زبان کے بیچ جذب ہو جائیں۔ اس کے باوجود ہوں یاہ گل وی
تسلیم کروں کہہ اگر وہ توجہ دیتا تاں بہت اچھی غزل لکھ سکیں تھا۔ انہاں کی غزلاں کا کچھ اک
شعر جہاں اتنا بہت پسند آیا ہیں۔ تم وی سنو:

خوشیاں نالے کے نہیں غم اپنا دیتو

یاں تن کی کہانی وہ دل کو فسانو

سرگی کی ساس لے جا آساں کی شام دے جا

اڈتا وا اورے پنچھی شاید توں مڑ نہیں آسیں

نہ پھلتی آرزو میری تے ارماناں کو کے ہو تو

جے ہا سا معتبر ہوتا پریشاناں کو کے ہو تو

عقل مندی کدے ان ساراں درداں کی دوا ہوتی

خدا جانے جے فر انجام دیواناں کو کے ہو تو

حالانکہ رانا افضل تے مخلص وجدانی کی شاعری پڑھ کے یوہ وہم آپ دل توں نکل جائے گو جری زبان غزل واسطے ناکافی ہے۔ اثر نے غزلاں کا لوازمات کو قابل تعریف حد تک خیال رکھیو ہے۔ لیکن غیر زبان کا لفظ ضرورت تیں زیادہ استعمال کیا ہیں۔ ان کا خیال کی نزاکت، غزل شناسی تے زبان کی روانی ماں عام آدمی اس بھل جائے کہ نکاشکا عیب دستا ہی نہیں۔ پر گو جری اکھاں ماں یہ غیر لفظ کنڈاں ہاروں اڑکیں۔

نسیم پونچھی جن کو مزاج ساحر لدھیانوی کی طرح غزل تے گیت واسطے عین موزوں تھو اور جہڑی غزل لکھیں بڑی اچھی غزل لکھیں۔ جن ماں درد کی مٹھی مٹھی چو بھوی ہے۔ تنزل وی تے اپنی طبیعت کی اُداسی وی صاف ظاہر دے سے پچھلاں کنیں سالان توں خورے کیوں غزل نالوں رُس کے بیس رہیا ہیں۔ خدا کرے کہ گو جری کو یوہ ساحر فرماہار موڑے تے غزل کا عاشقاں نا پڑھن واسطے اچھی غزل مہیا کرے۔

ہستی محفلِ نگر نگر کیں میرا شعر بسا رگنیں
 اتنی بار یاہ اجڑی بستی جتنی بار بہار گنیں
 ڈلاہ ہیں فرن فرن جیا اکھاں تیں اتھروں
 آیا ہیں بس خیال جد تیرا کدے کدے
 نین اُداس بناتے ویلے وہ بھی رُو ہوے گو
 ساساں کی جھولی تیں چاکے کت بسا یوگیو ہاں
 میرا زخم ڈنگاتے کھینچل ہوا کی
 کئی وار دکھیا یہ انگ آتاں آتاں

”ہتھر چھاں“ ماں عبدالغنی عارف نے غزل وی شامل رکھی ہیں پر غزل کی دنیا ماں

اپنا پیر نہیں جما سکیا۔ عارف کی غزلاں کا کجھ اک شعر۔

ہوں ڈھونڈوں لگومتاں تیں وہ یار پیار نہیں دستو
 ڈیو ڈنگی ڈاباں ماں، ہمن کتے کنار نہیں دستو
 زندگی کٹ گئی ہے کسے کی اڈیک ماں
 کتنا اک رہ گیا ہیں روز ہمن عذاب کا
 سیسوں سیسوں بدلن برکے دھند کلا وہ مارے
 کاگ بولے تے اٹھ اٹھ دیکھو جوگی آلا پھیرا ہیں
 جے ہوں یا جانغو تیں ادھ راہ ہی چھوڑ نو
 قسمیں ہوں یاداں نا ہرگز نہ پالتو

اختر الایمان کہیں ”اچھی شاعری وہ ہے جسے بار بار پڑھنے کو جی چاہے اور بہت اچھی شاعری وہ ہے جسے چھوڑنے کو جی نہ چاہئے“۔ اس لحاظ ناں وی دیکھو جائے تاں گوجری شاعری کی اکثر کتاب اچھی شاعری ماں شامل نہیں ہو سکتیں۔ غزل لکھتاں ماں نازک خیالی تے لفظاں کا برتیا کو خیال رکھنو وی سوکھو کم نہیں۔ اکثر ایسہ ہوئے کہ خوبصورت لفظ استعمال کرتے مفہوم ادا نہیں ہو تو اور اگر خیال ادا کرن کی کوشش کرو تاں لفظ قربان کرنا پونئیں۔ گوجری کا کچ سارا شاعر یوہ نازک نقطو نہیں سمجھ سکیا۔ تے انھاں نے اکثر ٹھیٹھ گوجری لفظ لکھ کے پڑھن آلاں نامتاثر کرن کی کوشش کی ہے تے غزلاں ماں واہ نوئیں کیفیت پانواں تجربا نہیں لمھتا، جہو غزل کا شعر کی پہچان ہوئیں۔

احمد دین غنبر ہوراں کی ہمن توڑی دو کتاب چھپ چکی ہیں اور ان ماں زیادہ حصو غزلاں کو ہے، نچھ تقید نہ سہی اگر حقیقت پسندی کی عینک لاکے وی دیکھو جائے تاں سخت دل تنگ ہوئے۔ ان کتاباں ماں جتنو زیادہ ویہ گوجری ناں انصاف تے ٹھیٹھ زبان کا استعمال کو وعظ کریں اتنو ہی ظلم کیو ہے انھاں نے غزلاں ناں بعض جگہ غزل اردو غزل کو ترجموئی لگیں تے کدے کدے پنجابی کو ان کو گوجری شعر دیکھو۔

ع محبت کرن آلا کم نہیں ہونا ☆ مگر محفل ماں تیری ہم نہیں ہونا گوجری
 ع محبت کرنے والے کم نہ ہونگے ☆ تیری محفل ماں لیکن ہم نہ ہونگے اردو
 ان غزلاں ماں بے وزنی کی وی عام شکایت ہے۔ غزل ماں ایسا اشارتے موضوع
 ہیں جہذا غزل نال سراسر زیادتی سٹی لگیں۔ لوازمات کو خیال نہیں رکھنہ اور غزلاں ماں ”ردیف“
 ”قافیہ“ کی پابندی وی نہیں ہوسکی، ثبوت واسطے اور لکھن پڑھن آلاں کی علمی وسعت واسطے
 پیش ہیں، ان کی غزلاں کا کچھ شعر۔

ع زلف ریشم تیں ہیں کوئی ہوں مردوں باس پھلاں تیں پیاری ہوں مروں
 متھواس تیرے کوئے چارو کھا گیو متوچن تیں لاٹ مارے ہوں مروں

ع سنگ تیرے کوئے چارو کرنو پیو

بھانویں کھا زہر بے شک جے مرنو پیو

ع محبت کو آجا نتیجو ہوں دسوں

کروں کھڑو چارو روؤں یا ہسوں

ع سنگ اُس کے تھی آشنائی پرانی

تھو وہ بے وفا قدر میری نہ جانی

ع ڈھا کے چاروں تھو جد مال تیرو

اُس ویلے وی تھویو ہی حال میرو

ع وعدو کر کے بھلا چھوڑے تھوتوں

حق لو کاں کھا چھوڑے تھوتوں

لکھاڑی واسطے ضروری ہے کہ وہ شاعری کرے یا افسانا لکھے اپنی تحریراں ماں اپنا
 ماحول کی عکاسی کرے اور وہی چیز لکھے جہدی حقیقت نال میل کھاتی ہویں، عنبر صاحب ات
 وی ایسی غلطی کریں کہ غزل کو شعر دیکھو

گیو چوٹی ورتھو امر ناتھ کی دسے پیراں ہیٹھ تھو جموں توی

پہلاں تے یوہ غزل کو شعر ہو ہی نہیں سکتو اور اگر من ہی لیاں تے کت امر ناتھ تے
کت توی شاعرنا حقیقت توں فراری کی کوشش نہیں کرنی چاہئے۔ ایک ہور غزل ماں لکھیں۔

تھامنہ زور ڈا ہڈا اہیل ہو گیا ہم محبت ماں تیری ذلیل ہو گیا ہم

ردیف قافیہ کا لحاظ ناں تم اس نا غزل کہہ لیو، لیکن محبت اک عظیم جذبہ ہے، جہڑو کسے
نا ذلیل نہیں کر تو، عظمت بخشے اس طرح کا خیال کو اظہار غزل ماں بیجا سئی لگے گوجری کا
لکھاڑیاں نا ہوں یاہ رائے دیوں کہ مزید وضاحت واسطے دیدیہ عنبر صاحب کی یہ دو کتاب ضرور
پڑھیں۔ ۱۔ رموز و اسرار گوجری شاہکار، ۲۔ گوجری گیان ”عنبر کو دیوان“

زبانی دعویٰ میں بڑا سنیار، مطالعہ توں بعد اس حقیقت کو پوری طرح قائل ہو گیا
ہاں کہ جس قدر نچھ تے ٹھیٹھ زبان پاکستان مقبوضہ کشمیر کی شاعری ماں استعمال ہوئی ہے اُس کی
جواب لکیر کے ارار لے پاسوں کوئے وی شاعر یا ادیب نہیں دے سکیو۔

رانا فضل حسین ہوراں نے پوری شاعری کی طرح غزل ماں وی قائل قدر مقام پیدا
کیو ہے انھاں نے اپنی غزلاں ماں لفظاں تے اشاراں کو استعمال تے مضمون کی نازک خیالی
کے ناں ناں غزل کا فنی لوازمات کو پور و خیال رکھو ہے، ذرا دیکھو ان غزلاں کا کچھ اک شعر۔

جندڑی کو نذرا نودے کے لاج وفا کی رکھتور ہوں

کل جگ بھانویں چھوڑ دیوں پر اپنو سوہنویار نہ چھوڑوں

پتھر پھینک سماں کا جاتک زخمی کر چھوڑیں گا

ڈالیاں اپر ڈوڈا رکھے جس بہڑے کائے بیری

سام سمیٹ بھیلٹ رکھی تھی ایویں اک بے گانی شے

میرو ہی دل تھو ہور کسے گو چیز پرائی ہار گیو

پھٹی کوڑی مل نہ میرو، کچھ نا کون بھیا جے گو

ڈا ہڈا ای مہنگا سودا پر ہوں جندڑی لائی ہار گئیو

رُکھ رُکھ ڈالی ڈالی دُکھ دُکھ مچ مچ سوگ بہاراں کا

اس کو بوٹا چھانگ کے چھوڑی چھاں کائے ٹھنڈی ٹھار نہ ایسوں

شاید تم نے وی سنیو ہے کہ چنگو شعروہ ہے جس پر ”واہ“ نکلے تے مچ چنگو شعروہ جس پر دل تیں آہ نکلے۔ گوجری شاعری کی خوش قسمتی ہے کہ اس ماں رانا فضل حسین تے اقبال عظیم کی صورت ماں ایسا شاعر ہیں جن کا شعراں پر منہ تیں آپ مہاراں آہ نکل جائے۔

مخلص وجدانی خالص غزل کو شاعر سنی لگے شاید اس واسطے کہ ان کی ذاتی زندگی ایسی رہی ہے کہ غزل کو پوروسامان مہیار رہیو۔ ان کی شاعری ماں ہجر فراق بھی ہے تغزل بھی پر کوائے بھی شعر ایسے نہیں لہھسیں جس ماں درد کی کیفیت نہ ہوئے اُن کا کجھ شعر دیکھو۔

شہراں ماں کوائے جا کے ڈھونڈے تنا کہڑی جا

اپنو کوائے پتو نیوں اپنی کائے نشانی دے

مناں مندھر و ہیرے کے مخلص

اُچو ہور اسماں ہوو

یوسف کھوہ ماں سٹیو پر بھگیاڑاں نہیں دتو کھان

اتنی جے ہمدردی ہوتی مخلص آج بھراواں کی

بکاؤ نان اگر ہو توتے کد مخلص کے ہتھ آتو

خدا یا شکر ترو عشق بکتو نہیں ہزاراں ماں

اٹھ کے ملوں تھواتے کہیں تھا اپنا کم نا کرے سلام

اٹھن کی نہیں ساہی رہی تے سارا کہیں مغرور ہے یوہ

اُن کی کچھ اک غزل پڑھتاں میر کی ہسیر لہہ جائیں۔ خود جی ناخود پسندی کی حد تک لے گیا ہیں۔ پرو یہ غزل کا مزاج شناس ہیں تے گو جری غزل کی تختی پر اپنوں ناں موٹو کر کے لکھا یو ہے۔ امید کراں کہ غزل کو یوہ عاشق اس منزل کا نواں مسافراں کی رہنمائی جاری رکھے گو۔

اقبال عظیم نا اُس کی شاعری نا خصوصاً غزل نا میں بڑا غور ناں، بڑی، باریکی ناں جانن کی کوشش کی پہلاں اس گل کو اعتراف کروں کہ جہڑا شاعر غزل نا صحیح معنا ماں سمجھ سکیا ہیں۔ ان ماں اقبال عظیم پہلا نمبر پرھیں اور غالباً اس شخص کو ناں گو جری غزل کی شروعات کرن آلاں ماں ہے جھان نے گو جری غزل نار دو کا کنھاڑا تیں لاه کے انگلی پکڑ کے بلیں بلیں اپنی ٹنگیں ٹر نو سکھا یو ہے تے فراس کم عمر بچی کے ناں ناں ٹرتا رہیا۔ ہن توڑی کہ جس ویلے اس نا جوانٹری کہیو جا سکے۔ گو جری غزل جس ماں جوانی آلا ہن سب نا زخروہ آتا جائیں لگاوا۔ اک سچی گل یاہ ہے کہ ہوں ان کی شاعری نا پوری طرح سمجھ نہیں سکيو۔ پر اس توں دی بڑی سچائی یاہ ہے کہ جس حد تک ہوں سمجھ سکيو ہاں۔ اُن کا کچھ شعر سدھا ہی دل ماں اتر جاں آلا ہیں۔ اور ایسا شعر سن کے دل اُن کی عظمت کو قائل ہو جائے۔ انھاں نے بھر پور غزل لکھی ہیں جن ماں ہجر فراق تے درد توں علاوہ شکوہ کو پہلو وی خوبصورتی ناں برتو ہے۔ بلکہ کدے کدے تے خالق کا عینا ناں وی اس لہجہ ناں گل کر جائیں کہ علامہ اقبال وی دن داں پٹھ انگلی رکھنی پے جائے۔

میرا دل کی دنیا نا اوجھوٹی لاؤن آلیا رتا

تیری دنیا ہوئے گی اکدن ڈھا کا ڈھیری میرے باندے

مگر یوہ سب کچھ ہوں کے باوجود ان کی غزل محبوبیت توں خالی نہیں بلکہ ان کی

نظماں ماں وی تغزل دیکھیو جا سکے۔ عظیم صاحب کا کچھ عظیم شعر۔

اتھروں پینو، مرمر جینو اوکھت رنگ برنگیں

پر میریں اکھ بھاریہ بھارا لکھاں وار سہار گئیں

ہوں گھر آیا شرد کو لپو چھوڑ نہ سکیو ورنہ
مار کے جھاتی میرے بوہے کتنی وار بہار گئیں

تیرا خیال نے جے ہسایو تے ہس پپو

ہوں اپنی نے بسی ناغماں نا بسار کے

دل کی لگی بجھا کے نہیں جینو سواد کو

اتھروں میں جیتا کدے ہاساں نا ہار کے

سینہ کو داغ درد کی لذت کسے کی یاد

ہوں کے رکھوں تے کے دیوں غم کا بھیان نا

۷ اداس رستاں کا کنڈا پلو پکڑ کے اکثر سوال چچھیں

توں لیکلو کیوں ہے ساتھی کت ہے بے حال دیکھیں تے حال چچھیں

۷ یہ دنیا آلا سودا گری تیں کدے نہ رجیا کدے نہیں رجسیں

رکھیں زینجا کا دل کا مالک نا کھوٹیں سکیں چکا چکا کے

۷ قربان کے دیتو سب تیریاں خوشیاں تیں

امید گھماد تیں ارمان گھما چھڑیا

ڈاکٹر صابر آفاقی عالمی ادب پر خوب نظر رکھیں تے قلم پر وی اُن کی مضبوط گرفت

ہے ان کی ہر تحریر بڑی پر اعتماد ہوئے۔ ان کی کتاب ”پھل کھیلی“ ماں زیادہ غزل ہی ہیں اور

میعاری غزل ہیں۔ پر اُن کا گو جری غزل کا میر ہون کو دعوؤ کس حد تک صحیح ہے۔ اس کو بہتر فیصلو

وقت ہی کر سکے۔

۷ ہم جس نا بھولو سمجھاں ☆ ادہ آخر ہم نا چار گیو

۷ بنڈیں گا لوک مٹھائیں کے بدلے

میری متھی زبان پر ہوں نہیں ہوسوں

اگلیں ویلیں میر ہوئے تھو جس نے گھلی جان غزل ماں
 آج کل آفاقی کا سر پر چلے کاروبار کو
 گوجری نوجوان لکھاڑی قاسم بجران نے اک کتاب ”تاہنگ رگیلی“ چھاپن تیں
 بعد طویل خاموشی اختیار کر لی ہے خبرے کیوں، انھاں نے وی کافی غزل لکھی ہیں زیادہ تر
 روایتی غزل ہیں۔ لکھتا رہتا ہے چنگی غزل لکھن کی صلاحیت رکھیں تھا۔

دینا کو جینو تے مر نو دی کے ہے

ہزاروں کی بستی ہزاراں تیں اوہلے

سرور صحرائی رانا فضل ہوراں کا صاحب زادہ ہیں تے کدے کوئے یاہ گل نہ وی جانتو
 ہوئے تاں اُن کی شاعری ہی پہچان لئے اُن کی شاعری ماں وی رانا فضل ہوراں کی شاعری کو
 چھاملو دے، ان کا مجموعہ ”سجری سویلن“ ماں وی غزلاں کو حصوا چھو خاصو ہے تے ویہ وی
 سوہنی غزل۔

جے ہن اکھ پرت نہ دیکھیں فر کا نہہ نا دل جان نہیں تھا

ان توں علاوہ اشتیاق احمد شوق کوناں غزل کا حوالہ ناں لیتو ہوں ضروری سمجھوں اس
 خوبصورت شخص نے بڑی خوبصورتی ناں غزل لکھی ہیں پرا جکل پتو نہیں کیوں غزل ناںوں رس
 کے ہیں گیو ہے۔

ٹٹ پوئے آسمان ہی بھانویں ایسو وی ہوں سوچوں تھو

آج اس پیار کا ٹٹا بت پر جن کی لووی بھاری ہے

نذیر احمد نذیر تے نذیر احمد فدا اگر غزل کا میدان ماں رہتا تاں گوجری غزل کو رنگ
 روپ چوکھو کر سکیں تھا۔ پرا اُن کی طبیعت سی حرفی آئے پاسے زیادہ چلتی رہی۔ غزلاں کا کچھ شعر
 تم وی دیکھو۔

بولیں تے کئی طعنا جھلیا، جھلیا سیک جدائیاں گا
 ڈکھاں ماں کئی رات گذاریں، کنیا تارا کدے کدے
 تتاں باوفا نہیں کہہ سیں، مٹا کسے نے کہنو کے
 دیکھ نذیر ہوں پاؤں بیٹھی تیرا قول قراراں نا
 ویہ درد خزاں کا کے جائیں، ہیں مالک مست بہاراں کا
 پھلاں کی جھولی پلٹیا ہیں، کدچو بھا لگا خاراں کا
 کیوں اگ گھسیریں دبی وی تم دل میرا ماں صدیاں توں
 مدے ہتھ سڑھ ملن جائیں لوئے جے لگات اتنگاراں کا
 فدا

اُنھاں تیں علاوہ طرب احمد صدیقی، کے۔ ڈی۔ مینی، ابرار احمد ظفر، منشا خاکی،
 ماسٹر عبدالغنی، غلام سرور چوہان، سرور حسین طارق، انور حسین انور، ڈاکٹر رفیق انجم، رفیق
 سوزتے عبدالرشید فدائی غزل کا دو جا قافلہ ماں شامل ہیں۔ یہ حضرات سوہنی غزل لکھن کی
 صلاحیت رکھیں پر خبرے کیوں اپنی اس صلاحیت ناکھل کے باندے نہیں آن دینا، ذرا دیکھو
 ان کی شاعری کا کچھ اک نموناں۔

سدھر سفتنا آس پیاس کے نان طرب
 ہن نے دل کو شہر بسایو میں میں
 باج تیرے تیں کسرا کسرا بیٹی ہے
 بستی بستی میر و حال سناوے گی
 میری یاہ نیک نیتی ہے جسے تیری آس پر جیوں
 وگر نہ ہوں وی دنیا ماں ہزاراں آسرا رکھوں
 طرب احمد صدیقی
 خوشدیو مینی
 عبدالغنی مینی

- تیرو ظلمی دوس نہ کوئے دنیا تیتا سچو جانے
تیرا عیب قصووری سارا میرے کھاتے پینا ہیں
ابراہیم ظفر
- اوڑک مرنو قسمت ماں ہے
موت کے بہانے یارنا ڈیکوں
منشاء خاکی
- بڑی شوق ماں ہے بڑی ادیک ماں ہے
میرو ساہ کسے کا اشاراں نا تر سے
رشید فدائی
- خیالاں کی بستی ماں آ بلیں بلیں
میر جان متا ستا بلیں بلیں
غلام سرور صحرائی
- طارق تیری خاطر ہم نے تن من ساڑھ مکاویو
ساری دنیا بھیت یوہ جانے کس تیں راز چھپاؤں
سرور حسین طارق
- پہلاں اپنو متی بناوین پھر دین داغ جدائی کا
خورے کس تقصیر کو بدلو مہارے نال مکاویں لوک
انور حسین انور

میرو کم ہے دعا کرنی دلوں لیکے زبان توڑی

نکل کے میرا ہوٹھاں تیں دعا جانے خدا جانے
ڈاکٹر رفیق انجم

اس قافلہ وچوں جن شاعراں نے ہن تک اپنی کتاب چھاپی ہیں ان ماں شامل ہیں
ڈاکٹر رفیق انجم، غلام سرور چوہان، ابراہیم ظفر، منشاء خاکی تے نور محمد مجروح۔ ان کتاباں پر
تبصرہ و مضمون نامچ چھیکولاوے گو۔ مختصر طور پر ان لکھاڑیاں کی غزل عام پڑھن لکھن آلاں نے مچ
پسند کی ہیں تے غزل پرائی پکڑ مضبوط سئی لگے۔ پڑھن آلاں نا اس کتاب کا پڑھن توں بعد اپنی
رائے قائم کرن تے شاعراں کی نویں بدرجہ بندی کو وی پور حق ہے۔

گوجری غزل لکھن آلاں کا تیجا قافلہ ماں نوجوان لکھاڑی شامل ہیں۔ خوش بختی کی

گل یاہ ہے جسے وہ یہ اس دور ماں گوجری لکھن لگا ہیں۔ جد گوجری زبان کی ترقی راہ پہلاں ہی پدھری کی وی تھی۔ لہذا انہاں نا اپنا جو ہر دسن کو بہتر موقعا حاصل ہیں۔ ان لکھاڑیاں کا شعراں ماں گوجری کا روشن مستقبل کو جھلکار و صاف دسے۔ ان شعراں ماں شامل ہیں۔ جاوید راہی، خاتقن سجاد، جان محمد حکیم، ریاض صابر، ارشاد قمر، لطیف فیاض، یونس ربانی، عارف عرفان، طارق فہیم، ایاز احمد سیف، ذاکر نواز تے ہو روی مچ سارا۔ ذرا کچھ اک نمونادیکھو۔

۔ ہو تو میرو عشق وی اچو جے سولی پر چڑھیو ہو تو جاوید راہی
 ۔ نہ کوئے پنوں نہ کائے ڈاچی سسی بیس سوار نا پرکھے ارشاد قمر
 ۔ میرے اگے ہر کوئے چڑھیو کوئے جہ چڑھیو اکھاں اگے فیاض
 ۔ اس دل دکھیا ماں ہر ویلے نت سکھیا تھارا پیار بسیں یونس ربانی
 ۔ کسک دل کی ڈنگی کنارو نہیں لہھو

مجت کا درداں نا کنگا لے جاؤں

ان شعراں ماں تنقید کرن آلاں نا پتو نہیں کے کے دستو ہوئے گو، مٹاتے اس گوجری کلام ماں گوجری غزل کو روشن مستقبل دسے۔ امید کراں جے یہ شاعر غزل کا مزاج کو خیال رکھیں گاتے غزل نالاں رس کے نہیں بیس جاسیں۔

محمد اسرائیل اثر

پیدائش: 1916ء لمپڈی راجوری

اسرائیل اثر اس دور مانہ گوجری ادب کی سب توں گھومھری شخصیت ہیں۔ ویہ لمپڈی راجوری کارہن آلا ہیں تے ہر سال برہیا ڈھوکیں بہکیں آن کو معمول بچپن توں لیکے اج توڑی جاری ہے۔ شروع مانہ دسی تک تعلیم حاصل کی تے عرصہ توڑی محکمہ تعلیم ماں اُستاد کی ذمہ داری نبھان تیں بعد اچکل ذاتی تے ادبی مصروفیات ماں لگاوا ہیں۔

شاعری کی شروعات بابا جی صاحب کا دربار ماں لگن آلی مجلساں تیں ہو پو، پت انھاں ناسائیں قادر بخش تے خدا بخش زار جیہا شاعراں کی صحبت نصیب ہوئی۔ پہلاں اُردو تے پنجابی ماں وی لکھتا رہیا پر جد قلم کی مہار گوجری آلے پاسے موڑی تاں ادب کا میدان مانہ چچھاں مُڈ کے نہیں دیکھو۔ گوجری تخلیق کاراں ماں ویہ خاص کر لکیر کے ارار لے پاسے کا سب توں بزرگ تے معتبر لکھاڑی ہیں بلکہ توں کہو چاہیے جے اسرائیل اثر کا ناں توں بغیر گوجری شاعری یا کسے وی مشاعرہ کو تصور نہیں کیو جا سکتو، جس طرح اسرائیل اثر تے گوجری شاعری اک ہی کیفیت کا دونوں ہونیں۔

اسرائیل اثر نے گوجری شاعری کی ہر صنف ماں لکھن کی کامیاب کوشش کی ہیں تے غالباً جدید گوجری غزل، گیت تے دوہا کی شروعات انھاں نے ہی کی ہے۔ انکا پورا کلام کو تجزیو کیو جائے یا اُن کی کائے وی تحریر کسے وی زبان کا بڑا توں بڑا شاعر کے مقابلے رکھی جائے تاں اُڑتی نہ ہوئی تے برابر ضرور ہوئے گی۔ غزل تے سی حرفی تیں علاوہ اُنکا معیاری، رسیلا تے درد یلا گیتاں کی مثال کسے دوجا گوجری شاعر تیں نہیں سرتی۔

اسرائیل آثر کی شاعری کی پہلی کتاب ”دھکھتیں آس“ انہاں نے ۱۹۸۰ کے قریب شائع کی تھی جس پر انہاں نارویاستی کلچرل اکیڈمی نے بہترین کتاب کو ایوارڈ دیا تو تھو۔ تے دو سال پہلاں کلچرل اکیڈمی نے انہاں کی ساری شاعری ”کلام آثر“ کا ناں نال شائع کی ہے۔ گوجری مانھ مثالی خدمات واسطے انہاں نا مرکزی ساہتیہ اکیڈمی نے Life time Achievement اعزاز دیا ہے تے ویہ بجاطور پر اس کا مستحق ہیں۔ کلام:

غزل ۱:

ہتی عمر توں دل میرا ماں درد کا دیا بان گئی
جت تک غم کی لو لگے تھی، تاہنگ اک میرے نال گئی

پت جھڑ کی بے رحمی اُڑتا پنچھی روئیں تھا
پتر پھل نہ چھوڑیو کونے جت یاہ ظالم بال گئی

دل کا جانی ٹر گیا ہائی، جا ملاپ کی خالی ہیں
خبرے ٹھنڈیاں مرگاں تیں کیوں اجھاں نہیں میری بھال گئی

دل کی دھڑکن پر اج شاید نظر کسے کا پہرا ہیں
حسن کی شوخی طلب میری نا ہستاں ہستاں نال گئی

چیر سمندر دھرتی بندو چن مرغ اُلاہنگ گیو
آثر دماغاں کی یاہ قیمت دل نا کر کنگال گئی

غزل ۲:

کچھ راز چھپا کے رکھیا تھا ویہ اکھاں نے سمجھا چھڑیا
کچھ درد تھا دل کیاں گٹھاں ماں ویہ گیت بنا کے گا چھڑیا

وہ لکیاں تیں نامحرم تھاتے مناں جھلیو کہیں وہیں تھ
میں سیک محبت اپنی کا ان لوکاں مانھ برتا چھڑیا

دُکھ اپنا بھور پیہا نا تیں ہولیں ہولیں دسنا تھ
اوہ پچھی یوہ کے ظلم کیو راہ جاتاوی ترفا چھڑیا

تاخیر دعا کی ہوگئی کسے چنگے پہلے منگی تھی
میں اس کا آون تیں پہلاں ارمان اپنا بدلا چھڑیا

وہ بچیو ہر شکاری تیں ہر وار پراں کا زوراں پر
اُت اترنے ہستاں ہستاں اج بھر پور نشانا لا چھڑیا

غزل ۳:

ترف کے کریا نیناں بچوں موتی تھ جے تارا دو
عشق کو سیک انوکھو یارو اکو سوز اشارا دو

زندگی اک بجھارت اس نا برتیں سارا بچھے کون
اتوں لیکے اس جا توڑی پیہنگ ہے اک اُلا را دو
درد میرا نا سُن کے ات کی پڑی بھی ٹھھی میرے نال
میری اک فریاد تھی لوکو، بچتا رہیا نقارا دو

ٹیر تیر سمہال ات سارو اُت کی چھٹ بھی بھر بھر بدھ
لکھیا لیکھ نا پچھے کہڑو، اکیں سر پر آرا دو

پیار کوگا رک تے تے ناں شاید ڈھونڈن نال بھی تھاسیں نہیں
اثر نا پچھینے لے گیو کہڑو، دل تے جگر ادھارا دو

غزل ۴:

گرا چھاں کی رت ہے سہانی سہانی
توں کچھ نیے نوں بن کیاں ڈالیاں نا،
ہوں ڈھونڈوں ویہ سنگت پرانی پرانی
تھیں اس جا کسے کی نشانی نشانی
واہ اک رمزمن کی چھپانی چھپانی
یہ کس موڑ کی ہیں گھرائی گھرائی
پیاراں کی بکھری کہانی کہانی
آثر عرش اعظم کا کنکراں مانھ دیکھی

غزل ۵:

تیرا غم ماں آکے میں دنیا بساری
میرا نقد اتھروں تھا لھلاں کا مل کا
میرا ماہی کد تک کروں انتظاری
تیری اک ملاقات اج تک ادھاری
تیرا پیار کا غم نے فرسوک ماری
میرا دکھ کا بدن کی دس کد ہے باری
چلو راہو اگلی منزل نا دیکھاں
ادتی بدلتی وی دنیا کا مالک
نبھی جس قدر نبھ سکی تے گذاری۔

ق

آیا بھور پھلاں نا چن گھگی اڈ اڈ شاد گئیں
چُچھ پیپھا میت میرا نا، میریں کت فریاد گئیں
پتر جھڑ کے فر نہیں جڑوتا پت جھڑ کو دستور سہی
جن چل گیا توں دس کاگا، کیوں نہیں اُن کی یاد گئیں

ق

مارتے خبرے کون گیو تھو دھپ سٹاپو اپنا نے
 غیراں نے تے پھٹ گھلیا تھا، لُون لوایو اپنا نے
 نہ یعقوب تیں قیمت کچھی نہ زینجا کملی تیں
 کھوئیں سکیں بچ کے یوسف مل گھٹاپو اپنا نے

کس نے دل کی دولت سامی کس نے سامی دُنیا کی
 کون مسافر چتو راہیا بول خسارا کس کا تھا
 اُن گلیاں ماں آثر دیوانو یاہ گل کہو جائے تھو
 سانوریا رے تیرا سر پر تیرا عہد پیمان کی پے
 پیرو تے مان کھسیو تیرا وی پر سڑیں گا
 جاتی وی تاہنگ کہہ تھی رت کا لباس نا
 ساون کی دھند اُسو کو چن کے کے موسم بیت گیا
 آثر کا دل کیس دل مانھر رہیں قسمت نال نہیں چلیوزور
 غم کی بولیں مٹھیں مٹھیں اس کا شعر سلونا
 بے درداں کیس گل وی لکھیں سخن کلام الونا
 ویہ پتھر وی دھویئے تے بیلا وی مٹھیے
 تنا تھائیں بجاناں کی چت چت نشانیں
 خوشیاں نا لیکے نہیں غم اپنو دیتو
 یاہ تن کی کہانی وہ من کو فسانو

سروری کسانہ

پیدائش: موالی سانہ جموں 25 مارچ 1927ء

وفات: جموں 12 مارچ 1987ء

سروری صاحب کو ناں لیتا ہی اک بیباک صحافی، اک مخلص سیاسی تے سماجی کارکن، تے اک معتبر شاعر تے ادیب کو خلیو اکھاں آگے آجائے۔ انھاں کو پوروناں چودھری فتح علی تھوتے اُن کی پیدائش سانہ جموں کا گراں موالی ماں چوہدری شکر دین ہوراں کے گھر ۱۹۲۷ ماں ہوئی۔ اُس دور کی سیاسی تے سماجی اوکھتاں کی وجہ تیں صرف ہائی سکول تک کی تعلیم حاصل کر سکیا۔ کجھ عرصہ اوقاف مانہ ملازمت وی کی۔ پر قوم کا درد نے ویہ زیادہ عرصہ سیاسی تے سماجی خدمت مانہ مصروف رکھیا۔

سروری کسانہ ہور گجراں کی تاریخ تے گوجری کی تاریخ پر گہری نظر رکھیں تھیں۔ گجراں کی بہبود واسطے پورا خلوص نال کوشش کرن آلاں ماں چوہدری غلام حسین لسانوی، قمر راجوروی تے سروری کسانہ کو ناں ہمیشہ امرہ گو۔ سروری صاحب نے پوری زندگی قوم تے زبان کی بے لوث خدمت کی۔ سماجی خدمات کا سلسلہ مانہ ویہ گوجر جاٹ کانفرنس کا رکن رہیا تے ۱۹۵۱ء مانہ گوجر اصلاحی کمیٹی جموں کی بنیاد رکھی۔ جموں کشمیر کا گوجراں ماں صحافت کی بنیاد رکھن آلا وی سروری کسانہ تھیں جھان نے قوم تے زبان کا مسائل اپنی تحریراں ماں باندے آنا۔ اک مدت توڑی ماہیا مہور گڑھیا کا قلمی ناں نال مضمون لکھتا رہیا۔ فر دسمبر ۱۹۵۵ء ماں اپنی اخبار ’نوائے قوم‘ شروع کی تے پہلو گوجری رسالہ ’گوجر دیس‘ ۱۹۶۳ء ماں شروع کیو۔ ویہ اپنی تحریراں کے ذریعے ہمیشاں گوجر نوجوان کے ہتھیں سوٹی کی جگہ قلم تھان کی کوشش کرتا رہیا

ہیں۔ جموں کا گجراں واسطے سروری کسانہ کی خدمات بے مثال ہیں۔ گوجرنگر کو ناں تے جموں ماں گوجراں کی موجودگی سروری صاحب کی کوششاں کو نتیجہ ہے۔ انھاں نے قوم نامتو گجھ دتو پر قوم انھاں نا گجھ وی خاطر خواہ نہ دے سکی۔

سروری صاحب نے گوجری زبان کی ترقی واسطے انتھک کوشش کیں۔ انھاں کا زبان تے تاریخ پر کئی مضمون آج وی گوجری ادبیاں کی رہنمائی کریں۔ گوجری زبان ناسب تیں پہلاں نوائے قوم تے گوجر دیس کے ذریعے اشاعت کو سہر و سروری صاحب نے اپنے ہتھیں لوا یوتھو۔ اگست ۱۹۷۸ء مانھ ریاستی کلچرل اکیڈمی مانھ گوجری شعبہ کا کھلن نال سروری صاحب وی گوجری ایڈیٹر کی حیثیت نال اس شعبہ مانھ شامل ہو یا تے کئی سال یاہ ذمے داری وی نبھائی پر زندگی کا آخری سالان مانھ صحت خراب رہن داروں وی اکیڈمی تیں الگ ہو گیا تھا۔

سروری صاحب کا ادیب تے شاعر ہون کو ثبوت رانا فضل حسین ہوراں نال انھاں کی دس پندرہ سال کی سنگت ہے جہڑی ۱۹۶۵ء ماں پچھڑ جان تیں بعد وی چھٹیاں پتراں کی صورت قائم رہی۔ سروری صاحب نے گھٹ شاعری کی ہے پر معیاری شاعری کی تے ان کا کلام مانھ جموں کی گوجری کو خاص لہجو گوجری کا خزانہ مانھ گج گج بادھو کرے۔ اُنکا گیت، غزل، نعت تے منظوم چھتیں گوجری ادب کو قیمتی سرمایہ ہیں۔ صحافت ماں ماہیا مہور گڑھیا کا قلمی ناں کی طرح شاعری مانھ کافی عرصہ تک گوجرنگر یو تخلص رکھ کے لکھتا رہیا ہیں۔

بے مثال خلوص رکھن آلا اس اس گوجر صحافی، ادیب تے شاعر کو انتقال گوجرنگر جموں مانھ مارچ ۱۹۸۷ء مانھ ہو یوتے ویہ آج وی توی کے کنڈے دفن ہیں۔ واہی توی جہڑی سروری کسانہ کی پچھان ہے، جس طرح پیر پنجال رانا فضل کی پچھان ہے۔ قوم بھائیں سروری صاحب مرحوم نا بھلا چھوڑے پر توی انھاں نا صدئیں یاد رکھے گی۔

کلام کا نمونہ:

غزل ۱

رات کلکھنی بال رکھوں میں
 رت نا رنگن دین کی خاطر
 ٹوڑاگے میں جھک نہیں سکتو
 سکھ اپرادھ کو نہ مجھ بھاوے
 من کو دنیو جال رکھوں میں
 رت کو چھل اُچھال رکھوں میں
 سچ کو پلے مال رکھوں میں
 دُکھ نا واقف حال رکھوں میں
 کانو قلم کو نال رکھوں میں
 فضل کو دیس پنجال رکھوں میں
 اُس کی یاد سہال رکھوں میں
 فتح علی کد ملے پریمی

غزل ۲:

لمو راہ ادھ مانے قد میں
 انھیاں اوپریاں گلیاں بچ
 سب سنسار تلاش ٹریے
 میری گور سرہانے آئیے
 ٹرنو پے نما نے قد میں
 جھلیو پھرے اُباہنے قد میں
 زنجی چال اباہنے قد میں
 بان کی ٹور پچھانے قد میں
 لوڑ نشان پرانے قد میں
 کڑک وفا کے اوکھے پینڈے

غزل ۳:

دل کی جھگی انجھ آيو
 دُکھ پرایا جے سہنا تھا
 میریاں نول تیں مارمکاپو
 میں مریوتے قبر سرہانے
 میں سوچوں جے کجھ آيو
 میں دنیا پر تیج آيو
 رحم نہ اڑیا تجھ آيو
 سنجھن کڈھتو سنجھ آيو
 دھنکی ڈاھڈی یاد کی تندی
 کڑک کلیجو تیج آيو۔

رانا فضل حسین راجوری

پیدائش: 3 اگست 1931ء پروڈی گجراں راجوری

رانا فضل حسین راجوری کی پیدائش راجوری کا گراں پروڈی گجراں مانہ مقدم فیض محمد منچ ہوراں کے گھر ۳ اگست ۱۹۳۱ء ماں ہوئی۔ میٹرک تک کی تعلیم راجوری ہائی سکول تیں مکمل کر کے اپنا ہی علاقہ مانہ تجارت کو پیشو شروع کیو پر قدرت ناشاید کجھ ہورہی منظور تھو۔ ۱۹۴۷ کی ملکی تقسیم کے نال ہی خاندان وی تقسیم ہواتے رانا ہوروی کئی رشتے داراں سمیت پاکستان چلے گیا پر جلدی ہی وطن کی محبت واپس چھک لیائی۔ گوجر قوم کی سیاسی تے سماجی بد حالی کو احساس کرتاں نویں سراپنی تجارت تے سماجی سیاسی سرگرمی شروع کی تھیں جے ۱۹۶۵ء کو حادثہ ہووے تے رانا ہور وطنوں بے وطن ہو گیا۔ خاندان کا کئی آدمی شہید ہو گیا۔ ان گوسارو کجھ بے دردی نال کھسے گیو۔ پر گوجری زبان کو دامن ان کے ہتھوں نہ چھٹو۔ سگوں اپناں کا وچھوڑا تے بے وطنی کا غم نے اُن کی تحریریاں ماں سوز تے درد بھر چھوڑیو۔ جہڑو باقی لکھاڑیاں نالوں انھاں نامتناز کرے۔

پاکستان جاتاں ہی انھاں ناذتج، قمر، مجبور، تے صابر آفاقی جیہا گوجری لکھاڑیاں کی سنگت نصیب ہوئی تے ویہ گوجری ادب واسطے کی جان آلی شعوری کوششاں مانہ شامل ہو گیا۔ دن بدن انکا جوہر کھلتا ہی گیا۔ پاکستان مانہ گوجری ادب کی نشر و اشاعت مانہ رانا فضل ہوراں کو اہم رول ہے۔ ویہ ۱۹۶۷ تیں ۱۹۹۱ء تک بدستور ریڈیو تراڑکھل کے ذریعے گوجری کی خدمت ماں مصروف رہیا تے ہن یوہ سلسلوچی طور پر جاری ہے۔

رانا فضل حسین بلاشبہ بیہویں صدی کا سب توں زیادہ کامیاب گوجری تخلیق کار

ہیں۔ جہاں نے گوجری ادب کی ہر صنف مانہ خوبصورت اضافہ کیا ہیں۔

گوجری مانہ ڈراما، آزاد نظم، غنائیاتے غزل کی جاگ اپنے ہتھیں لائی ہے۔ رانا ہوراں نے گوجری ادب مانہ نواں نواں سلا کا کڈھیا ہیں۔ جہاں نال نواں مسافراں ناخاص طور پر سوکھل ہوئے گی۔ رانا ہوراں کو کمال یوہ ہے جے انھاں نے اپنی دھرتی پر پیر رکھ کے تاراں ناہتھ لان کی کوشش کی ہے۔ تے قلم پرا انھاں کی بڑی مضبوط گرفت ہے۔

گوجری ادب کی کائے وی صنف ہوئے گیت غزل، نظم یا نثر، رانا فضل نے ذاتی تے سماجی، دل کاتے دنیا کا درداں مانہ اچھو یا تے ٹھیٹھ گوجری لفظ خوبصورتی نال پرویا ہیں۔ اُن کی منظوم تحریر تے دُنیا کے باندے ہیں پرنثر خاص کر اُن کی چٹھیں پڑھتاں نوں لگے جس طرح انسان چوری کھا تو ہوئے۔ ہجر و چھوڑاتے دلیں کی گلیاں کا غم نے ہی رانا کی شاعری ماں سوز بھر یوہ ہے۔ تے مُردمُرد کے پیر پنجال کا ہاڑاں نے رانا فضل نا وی گوجری ادب مانہ واہی بلندی تے عظمت بخشی ہے جہڑی کشمیر مانہ پیر پنجال نا حاصل ہے۔

رانا فضل ہوراں نے بے شمار گوجری ڈراما لکھیا ہیں تے اُنکا مشہور ڈرامہ۔ روشنی۔ نا قومی ایوارڈ وی ملیوہ ہے۔ اُن کی شاعری کی کتاب بانہل بانہل پانی اک بار ادارہ ادبیات تے دو جی بار جوں کشمیر کلچرل اکیڈمی نے شائع کی ہے۔ یاہ گوجری زبان کی بہترین کتاباں ماں شمار ہوئے۔ اُن کی منظوم چٹھیاں آلی کتاب ”ساجھا ڈکھڑا“ کا ناں نال چکھلے ہی سال ریاستی کلچرل اکیڈمی نے شائع کی ہے۔ تے اُنکا گیتاں کی کتاب ”ماہل“، جنگراں کا گیت کے تحت شائع ہوئی ہے۔ کجھ جانکاراں کی کھوج تیں بعد اُنکی تخلیقات کی ترتیب کجھ اس طرح سامنے آئی ہے:

۱۔ نعت ۱۹۶۸ ۲۔ رت کا نشان ۱۹۶۹ (نثر کی پہلی کتاب)

۳۔ بانہل بانہل پانی (شاعری) ۴۔ لہو پھوار (شاعری)

۵۔ ساجھا ڈکھڑا (منظوم خط) ۶۔ ماہل (گیت) ۷۔ دتھ گگن پاتال کی (کہانیاں)

۸۔ پریم پتر (نثری خط) ۹۔ گوجری لوک ادب ۱۰۔ چھڑی کوچ اڈار (شاعری)

۱۱۔ مثنوی پیر پنچال ۱۲۔ گوجری ڈرامے۔

افسوس کی گل ہے بے وقتی حالات کی مجھو ریاں تیں انھاں کی تازہ تخلیقات ہم نامیہ سر
نہیں ہو سکیں۔ اللہ جی نے ان حشر برور پاڑاں ناکدے ملن کی ٹاکی لائی تاں انھاں بارے
ہو روی متو کجھ لکھو جاسکے گو۔ اُنکا کلام کجھ نمونا:

غزل:

پیر پنچال راجوری کا پھل چن چن پوپو ہار غزل کو
خائیں آوے گو بت سوہنو گائے گھلوں ہار غزل کو

نال ادا رسیلی گاؤں، چھیڑوں گو سرتال رسیلی
مٹھرا مٹھرا بال سناؤں، بے لھے کوئے یار غزل کو

آتھرواں نے پچلی کھاہدی، عشق تے مٹھک چھپان نہ ہو یا
ہومڑ ہومڑ کے سدھراپو، چارے کونٹ ہُبرکار غزل کو

مہر محبت پیار کے اکھریں اک سوغات بنائی میں
ہوں جانو تھو ہاڑا ہتہ دکا یار کرے بڈیار غزل کو

عرش کا باسی کہتا سڈیا شعر فضل کا سُن سُن کے
سندر سوہنا روپ کو سائیں، ہو گیو تابعدار غزل کو

غزل ۲:

اوہ خبرے کس حال بسے رے اس بن ہوں رنجور اتیراں
یاد کچے برجھی مارے دل میرے ناسور اتیراں

توڑ دتو رے بے پرواہ نے پاج نہ لگے جوڑ نہ پوئے
جس شیشا مانھ دیکھ سکوں تھو، ہو گیو چکنا چور اتیراں

درد نے ترکھی کھنبر چو بھی دردی اکھ پرت نہ دیکھے
دل کا زخم دکھاوے جھلے لون برور برور اتیراں

آپ ہنڈاوے جرگا جرگا منا رکھے پرے پریڑے
ہے کس کاری سانجھ سنجھیالی ہوں ترسوں اکلور اتیراں

بے پرواہ نا بھلی بسری میری بیٹی درد کہانی
دل تیرا تیں ہو گیو اڑیا فضل نما نو دور اتیراں

غزل ۳:

پھلاں کی رت فر مڑ آئی مڑیو اپنوں یار نہ ایسوں
خوشبو چٹی چوسی دکھ نے پھلاں مانھ ہرکار نہ ایسوں

رکھ رکھ ڈالی ڈالی دکھ دکھ مچ مچ سوگ بہاراں نا
آس کا بوٹا چھانگ کے چھوڑی چھاں کائے ٹھنڈی ٹھار نہ ایسوں

بے پروائیاں کی دنیا مانھ کون کسے کو کرے خیال
پے گیو کال وفا کو سارے ان کے نگر پیار نہ ایسوں

ہجراں کا سنگھیٹ نہ لانا سوہنیا میری ہے درخاس
مہارے پاسے آپے آپے زندگی کو اعتبار نہ ایسوں

عشق ہوراں کے مہا بے چھے فضل ہمیش اڈیکاں مانھ
یاد کا بھانبر سرتا بلتا لگیں تتر تار نہ ایسوں

غزل ۴:

پیر پنجال کی ٹھنڈی مٹھری چانن رات بسار نہ چھوڑوں
روح نت حاضر ناظر اُتے ہوں سوہنو سنسار نہ چھوڑوں

سندر سوہنا روپ رتاں گا حسن کا مٹھل گواچ گیا
پت جھڑسموں کلکھنو فر وی آس اڈیک بہار نہ چھوڑوں

جندڑی کو نذرانو دے کے لاج وفا کی رکھتو رہوں
کل جگ بھاویں چھوڑ دیوں پر اپنو سوہنو یار نہ چھوڑوں

یاد اچھی آدے مترا مرتاں مرتاں جین سکھاوے
توں وی رکھیے میرو چیتو ہوں زندگانی ہار نہ چھوڑوں

گل مانھ باہ غماں کو پھندو ریت پریت نبھانی پئی
نگری نگری پھروں تپوشوں لوڑوں فضل پیار نہ چھوڑوں

نوروز کی سہمی جھڑیاں جئی دو نیناں کی بدلا روی ہے
فرگیت سنایا بلبل نے پھل اتھروں کری بہاروی ہے

جے درد کا منتر پھو کے گو دلگیر نا جھانبا دے دے کے
تاں تیری پیڑ پچھانوں گو توں بن میرے لا چاروی ہے

کیوں چیتا میرا آتا نہیں کے ہو گئی شوخی بھنا رے
کیوں پیار کا لارا لارا ماں توں آپے یار بساروی ہے

تھی کھری کھری بڈیار کی گل یا ہاں کہو یا نہ کہو
دل توڑ کدے دلدار بنے اقراروی ہے انکاروی ہے

نامید نہ ہوئے عشقا رے ہن فضل کی باری آوے گی
بے مہر بجن بٹ مہرا کے دل بسو میرو پیاروی ہے۔

غزل

غزل سلونی چھیڑ رکھی میں پیڑ پرانی سہیڑ رکھی میں
 سانجھو درد خمیر کے پیڑے مٹی آپ اکھیڑ رکھی میں
 صبر کا تندو توڑ توڑا دل کی سیڑ ادھیڑ رکھی میں
 پھرنے مٹھرا لاڈ پھلیں گا دور ہوتاں مچ نیڑ رکھی میں
 آس فضل پگرے گی اوڑک ادھت آپ حمیڑ رکھی میں

گوجراشعر:

ق بے پرواہی کا دھواں ماں
 ساڑے نیلا لکھاں ہاروں
 ہوں ترسوں کدے ہال نہ چھچھے
 دل مانھ رہ کے بکھاں ہاروں

۔ لاج رکھی میں عشق ہوراں کی پال رواج وفا کا
 ہوں یہ رسم نہیں ٹن دیسوں بھاویں میت نہ جانیں

۔ گوریا چٹیا چاندی چنا، ڈاڈیا باٹیا پتھرا
 رٹھیاں چاننیاں کے بٹے پیس منا کے تھاپو

۔ گٹھو بجر کو خبرے کا نہ تا موت سرہانے زندو ہاں
 اوہ سجا اس موت کے ہتھوں مچ ڈاڈو شرمندو ہاں

ڈاکٹر صابر آفاقی

پیدائش: 1933ء گواہاڑی مظفر آباد

جدید گوجری ادب کا عظیم ہمدرد، محقق، نقاد، ادیب تے شاعر چودھری احمد دین پھامڑہ ناڈبی دُنیا ڈاکٹر صابر آفاقی کا ناں نال جانے۔ پہلاں صابر تخلص کیوتے فر سوچ کے نال نال ناں مانھ وی آفاقی شامل ہوگیو۔ ویہ ۱۹۳۳ء مانھ مظفر آباد کا گواہاڑی گراں مانھ پیدا ہویا۔ اُنکا والد مولانا علی محمد پھامڑہ بڑا علمی آدمی تھاتے انھاں نے یاہ وراثت اپنی اولاد کے حوالے کرن کو پور حق ادا کیو۔ بنیادی تعلیم تیں بعد انھاں نے صابر آفاقی ہو ر اُچی تعلیم واسطے پنجاب ٹور چھوڑیا تھا پر اس خواب نا پورا ہوتاں دیکھن تیں پہلاں ہی اکھ میچ لیں۔۔ گوجرا ماحول کا ساراں دکھاں درداں کی پنڈ وکلی لیکے ویہ ہمیشاں دنیا کے نال قدم ملا کے چلتا رہیا ہیں۔ بنیادی عربی فارسی تعلیم توں بعد انھاں نے ۱۹۵۲ء مانھ محکمہ تعلیم ماں عربی کا اُستاد کے طور ملازمت شروع کی۔ صابر آفاقی ہو راں نے علم کی وصیت کی پوری لاج رکھی تے تمام مشکلات کے باوجود تعلیم کو سلسلوٹن نہیں دتو۔ انھاں نے ۱۹۵۶ء مانھ ایف اے، ۱۹۶۰ء مانھ بی اے، ۱۹۶۲ء مانھ مانھ تے فر ۱۹۶۵ء توڑی اُردو تے فارسی مانھ ایم اے کر لی تھی۔ ۱۹۶۷ء مانھ ویہ مظفر آباد مانھ کالج کا لیکچرار مقرر ہویا تے اگلے ہی سال فارسی مانھ پی ایچ ڈی واسطے ایران چلا گیا۔ جہڑی انھاں نے راج ترنگنی کا فارسی ترجمہ کا موضوع پر ۱۹۷۲ء مانھ مکمل کی۔ واپسی پر مدت توڑی کالج پروفیسر کے طور ذمہ داری نبھائی تے اس عرصہ مانھ انھاں نا ملازمت کا ویہ سارا عذاب بھوگنا پیا جہڑا اک سنجیدہ، مخلص تے خود دار انسان کو مقدر ہوئیں تے نوں انھاں نے

آخر نوکری اپنا گل تیں پائی لیر ہاروں لہ لہ سٹی تے آپ تن من نال گوجری ادب کا ہو کے رہ گیا۔
 خالص گوجرا ماحول کی وجہ تیں گوجری زبان نال شروع تیں ہی پیار تھو۔ گوجری
 شاعری کی شروعات ۱۹۵۴ ماہ کی تے یوہ سلسلو بلیں بلیں جاری رہیو۔ ۱۹۶۵ ماہ گوجری کا
 دیگر لکھاڑیاں کی ہجرت نال اُنکے اندر کو گوجری فنکار ہور نکٹڑو ہو گیو۔ انھاں ذبیح، پھور، قمر تے
 رانا فضل ہوراں جیہا سنکیاں نال رل کے گوجری کی نشر و اشاعت واسطے پر خلوص کوشش کیں،
 ریڈیو توں گوجری پروگرام شروع کروایا تے اشاعت واسطے ادارہ ادبیات تے گوجری ادبی بورڈ
 قائم کیا۔ اس دور ماہ گوجری لکھن کی شعوری کوشش کرن آلاں ماہ صابر آفاقی پہلی صف ماہ
 تھاتے ان کو یوہ جذبوتے خلوص ایران ماہ جا کے وی ٹھنڈو نہیں ہو یوتے ویہ اُت وی گوجری
 شاعری کرتا رہیا۔

صابر آفاقی ہوراں کی گوجری شاعری ماہ، سی حرنی، غزل، رباعی تے نظم توں علاوہ
 مسدس حالی کو گوجری ترجمہ وی شامل ہے۔ صابر آفاقی پوری دُنیا خاص کر اسلامی دُنیا ناک
 وجود تصور کریں تے اُن کی زبان تے اٹکا دکھاں درداں ناسنا نبھا سمجھیں۔ اُن کی یاہی آفاقی
 سوچ ان کی تحریراں ماہ وی جھلک دسے۔ ویہ شاعری ماہ مقصد بیت کا قائل سئی لگیں تے اکثر
 علمی سماجی تے اصلاحی مضمون ان کی شاعری ماہ نمایاں ہیں۔

گوجری ماہ ان کو ۱۹۷۶ تک کو سار و کلام ”پھل کھیلی“ کی صورت ماہ گوجری ادبی
 بورڈ مضر اباد نے چھاپ کے دُنیا کے باندے رکھیو تھو۔ یاہ کتاب گوجری کا ادبی حلقاں ماہ
 کافی مشہور ہے تے ۲۰۰۲ ماہ اُن کی اک ہور کتاب ”کیسر کیاری“ کا ناں نال شائع ہوئی
 ہے۔ انھاں نے ’گوجری گرائمر‘ تے گوجری لکھاڑیاں بارے وی اک کتاب ’گوجری ادب‘
 پنجابی زبان ماہ لکھی تھی جہڑی لکیر کے ارار لے پاسے دستیاب نہیں ہو سکی۔

ڈاکٹر صابر آفاقی کنتی کا اُن گوجری لکھاڑیاں مانھ سرفہرست ہیں جہاں نے اللہ تعالیٰ نے تقابلی لسانیات کا علم میں علاوہ تخلیق، تحقیق، تنقید تے ترجمہ کی صلاحیت تے مہارت وی بخشی۔

گوجری زبان تے ادب میں علاوہ فارسی تے اُردو کے نال نال عالمی تاریخ پروی صابر آفاقی گہری نظر رکھیں تاریخ کشمیر تے راج ترنگنی کا ترجمہ سمیت دوسری زبانوں مانھ وی اُن کی کئی تخلیقات موجود ہیں جن کی وجہ میں صابر آفاقی دوجی ہمعصر زبانوں کا ادبی حلقوں وی اک معتبر ناں ہے۔

ڈاکٹر صابر آفاقی ہوراں کی تصنیفات:

- ۱۔ نجم ڈری اُردو (بہائی فرقہ بارے) ۱۹۶۳ ۲۔ اتھروں تے ہاڑا ۱۹۶۶
- ۳۔ شہر تمنا ۱۹۸۰ ۴۔ گلہائے کشمیر ۱۹۷۴ ۵۔ راج ترنگنی (ترجمہ) ۱۹۷۴
- ۶۔ حسین بن منصور حلاج (فرانسیسی کتاب کو گوجری ترجمہ) ۱۹۷۵
- ۷۔ پھل کھیلی (گوجری) ۱۹۷۶ ۸۔ سانجھو کھلاڑو ۱۹۸۵
- ۹۔ پیغام انقلاب (گوجری) ۱۹۹۷ ۱۰۔ کیسریاری (گوجری) ۲۰۰۲
- ۱۱۔ گوجری ادیب تے شاعر (پنجابی) ۱۲۔ گوجری قواعد ۱۳۔ شہر تمنا (اُردو)
- ۱۳۔ پھلیں بسریں یاد ۱۵۔ مسدس حالی (گوجری ترجمہ)
- ۱۶۔ تاریخ کشمیر (اُردو) ۱۷۔ اقبال اور کشمیر (اُردو)

غزل ۱:

اُٹھیں گا ہن جواں پر ہوں نہیں ہوسوں
 مڑے گو کارواں پر ہوں نہیں ہوسوں
 ترس کھائے گو اوڑک اک دھیائے
 یوہ ظالم آسماں پر ہوں نہیں ہوسوں
 بدل جائے گو ہے امید پکی
 گوہاڑی کو گراں پر ہوں نہیں ہوسوں
 بنڈیں گا لوک مٹھیاں کے بدلے
 میری مٹھی زباں پر ہوں نہیں ہوسوں
 کوئے ہووے تھو صابر لوک کہیں گا
 میرو چئے گو ناں پر ہوں نہیں ہوسوں

غزل ۲:

سینو زخمی روز ازل تیں منڈوں ہی دل یار غزل کو
 پیار کو پھل دے سکتو نہیں تاں تیر ہی کوئے مار غزل کو

لفظ کی سچی ڈور مانھ پویا معنا کا ان ڈٹھو لعل
 جے توں پھیرو گھلے ایان، گھلوں تینا ہار غزل کو

فن کی جڑ مانھ ٹپو ٹپو خون چوانو پوئے گو
 آپے جھڑو ڈیو اُس نے بیڑو دتو تار غزل کو

موسم مٹی وچوں کڈے، رتا نیلا پیلا پھل
گرمی کی رت آئی تے فرگرم ہوؤ بازار غزل کو

اگلیں ویلیں میر ہوئے تھو، جس نے گھلی جان غزل ماں
اجکل چلے آفاقی کا سر پر کاروبار غزل کو

غزل ۳:

ہوں غماں کی پنڈلے کے آیو توڑوں کے کروں
اے دلا دس عشق نا چھوڑوں نہ چھوڑوں کے کروں

لہو کی لذت ہے میرا شعراں ماں نہیں شیر کی
مغز کی دن رات ہوں اوڑھی نچوڑوں کے کروں

عشق کے مہا بے میر و دل شیر ہے بے خوف ہے
سینہ کی ہوں اے سنگیو ناہڑی مروڑوں کے کروں

ہوں کھلوں تاں قافلہ نکھڑے چلوں تاں تم ہٹو
تم ہی دسو سنگیو بیسوں کہ دوڑوں کے کروں

گم گیو قوماں کا بن ماں لال صابر قوم کو
بوٹا بوٹا کے تلے پھر پھر کے لوڑوں کے کروں۔

غزل ۴:

اک جذبولے کے جلیاں مانھ فر جوگی آيو گلیاں مانھ
 ہتھ مل مل گھسیا نوں میرا اک لیک نہ رہی تلیاں مانھ
 تک تک کے دیدا ساڑ نہ توں نہیں بارش ہوتی ملیاں مانھ
 کے ڈٹھو سیانف آلی نے جا شامل ہوئی جھلیاں مانھ
 کے جینو موا ماضی نے کے ہمت ہڈیاں گلیاں مانھ

غزل ۵:

لنگھیاویہ دن مہارا یارا ہن کت ویہ لشکارا یارا
 بن بھی بسیو شہر بھی ڈٹھو دوئے جگ کوکارا یارا
 چا نہیں سٹو سٹ نہیں سکتو بھار پیا سر بھارا یارا
 تیرے باجھ کرے گو کہڑو میرا غم کا چارا یارا
 کنیں دیسیں بسیو جا کے آفاقی سردارا یارا

ق

تیریں چھیڑیں کس نے میلیں نو نہی ٹھگاوے منا
 تیرا آتاں آتاں مٹی ہو جاؤں گو سڑ کے
 رو رو ہسوں، ہس ہس روؤں پاگل ہوؤ ایسو
 جس رہیابدل چیت کی رت مانھ برہتورہ اڑاڑ کے

ق:

جد صورت دس کے یار گیو بھل ہوں سارو سنسار گیو
 ہم جس نا بھولو سمجھاں تھا ادہ آخر ہم نا چار گیو

گوجراشعر

یوہ بھیت ہے میری خوشیاں کو مچ کھا تو نہیں غم کرتو نہیں

میرا نواں خیال نہیں قید ہو سیں اچی کرو تم ہور دیوار کا نہہ نا

نکل آوے گو کوئے انگار صابر ذری سسر نا ہور پھلور سنگی

لگیں سولی تے کالجو کھان ہوئے گھولی چھیڑ نہ ہور توں یار کی گل

کیسا کیسا ان اکھاں نے مناد تا دھوکھا دوروں کھوڑی نظر آوے تھی پرنگلی تر کنی

دین نا دے کے دُنیا لینی چنگو نہیں یوہ سودو

سَدگاں آلی مہیس کے بدلے لوک نہیں لیتا کھنڈی

شاہباز راجوری

پیدائش: 24 فروری 1940ء بہرہوٹ راجوری

غلام نبی شاہباز راجوری اُردو، کشمیری تے گوجری کا نیا پڑنیا اُستاد شاعر تے ادیب ہیں۔ ویہ ۱۹۴۰ ماہ راجوری کا علاقہ بہرہوٹ ماں اک کشمیری ناک خانان ماں پیدا ہویا۔ بچپن توں ذہین تے حساس تھا۔ وقتی حالات تے افراتفری کے باوجود اُردو ماہ ایم اے کی ڈگری لئی تے اُستاد کے طور ساری زندگی نسلاں کی خدمت کر کے سبکدوش ہویا۔

شاہباز راجوری ہوراں کا اپنا شاگرداں کی تعداد کئی سو تک ہے جن ماہ بڑا بڑا افسر وی شامل ہیں۔ سچا پکا تے محنتی اُستاد کے طور اُن کی سماج ماہ اک الگ بچان، قدر تے اُچو مقام ہے پر ریاستی سطح پر لوک اُنھاں ناک شاعر، ادیب تے عالم کے طور پر جانیں۔ ویہ مطالعہ کا بے حد شوقی ہیں خاص کر اسلامیات تے ادبیات کا ماہر ہیں۔ کشمیری مادری زبان تھی اس گلوں وی اس ماہ اظہارِ فطری تھو پر ماحول کا اثر نال اُردو، گوجری تے پہاڑی ماہ وی کافی ادب تخلیق کیو ہے۔

۱۹۷۵ توں بعد شروع ہون آلی جدید گوجری کی تحریک نال اُنھاں نے پورے تعاون کیو۔ گوجری میں متعلق سچ سارا تحقیقی مقالا لکھی تے گوجری مجلساں، مشاعرے تے کانفرنساں ماہ شامل ہوتا رہیا۔ ان کو کلام ریڈیو کشمیر تے شیرازہ گوجری کا ذریعہ نال لوکاں توڑی بکھو رہیو ہے۔ گوجری ادب اک لحاظ نال اُنھاں کی اک بکھری تے اُچی جا ہے۔ اُنھاں نے گوجری ماہ نعتیہ شاعری کی ہے تے ویہ غالباً گوجری کا پہلا شاعر ہیں جنھاں نے نعتیہ کلام نا الگ کتابی شکل دتی ہے۔ اُن کی یاہ کتاب انشاء اللہ جلدی ہی شاہباز راجوری تے گوجری زبان کا سانجھا محبتیاں کا ہتھماں ماہ آجائے گی۔

غزل ۱

بستیاں کا گیت رُٹھا فر بہاراں نا بِلّا
لُٹ گیا ہیں نہیریاں مانھ راہکاراں نا بِلّا

دیا دیو کد ہسے گو ڈیکتی یاہ رات ہے
میں بلا یو اتھرواں نا توں ککاراں نا بِلّا

وقت کا سارا سمندر ریت مانھ ہیں سو گیا
پچھ دُنکا ہور منگیں لہو دھاراں نا بِلّا

تس اتی پتھراں کے ہتھ ہے ساری تریل
ہے کہو درداں کو سنجھی رازداراں نا بِلّا

گل کائے، لفظ ہے شہباز مُنہ مانھ پا گئی
کے پھرو لیں لوک سارا ڈھیر ساراں نا بِلّا

غزل ۲

سوت سمر کے سینے لا کے	ہوں وی ہسوں ککھ جلا کے
بے سَکھ تلا چھمر سارا	رکھوں اپنو آپ چھپا کے
اُن کی رمز انجانی ہونیں	ہم کے نکلاں سیس نوا کے
ہر کوئے ہرجائی ملیو	گل مانھ پھائی منا پا کے
میرے بھانے رات اجیل تھی	سُتو دِن کو مان بھلا کے

غزل ۳:

روتی رات کے متھے لکھیو
شہر تے سارا ترفیں لکھیں
سجرو پر ان دیکھ تماشو
کونے کدے انسان وی دستو
ہوں تے اپنا آپ تیں گمیو
اس نا لوڑے روز تماشو
پلو پاٹو ہوں کیوں لیتو
لفظ کی صورت ات وی ات وی
دُنیا کو شہباز تماشو

غزل ۴:

نواشیں میرے بوہے پکھنو اڈارے
واہ سجری سویلی بناں کی جوانی
کہدو آکے خاباں کا لتا اتارے
یوہ شہراں کا زہراں نا کہدو ہلارے
ان آتی رتاں نا کدے وہ سمارے
چھیتو وہ آوے تے نیزا ہی مارے
ہوں صدیاں توں ہیروں اڈیکوں کسے نا
تلاشاں مانھ شاہباز دن رات رہ کے
اجیں جاڑ بستی ماں کو کے پکارے۔

اقبال عظیم چوہدری

پیدائش: وانگت لار 1940ء

باباجی صاحب لاروی کا دوہتر اتے میاں محمد اکبر بجران ہوراں کا فرزند میاں محمد اقبال نادبی دُنیا اقبال عظیم کا ناں نال جانے۔ اُن کی پیدائش بابانگری وانگت مانھ ہوئی تے اُتے ہی بُیادی تعلیم حاصل کی۔ علم تے ادب اُن کی چار چو فیری کھلر یو ووتھو۔ اس گلوں ویہ وی متاثر ہونو نہیں رہ سکیا۔ پر نال ہی گوجراما حول کی تنگدستی، سماجی نا انصافی تے سیاسی حالات وی اس جذباتی نوجوان نا برداشت نہین وپن تھا۔ تے یوں مُدت توڑی اُنکے اندر چھپیا وا اک درد مند شاعر تے سیاسی جن کے بشکار جنگ ہوتی رہی پر آخر کار معجزاتی طور پور اس شاعر نے سیاسی جن قابو کر لیو تے اس طرح گوجری زبان نا اس سہوت کی خدمات میسر آ گئیں جس پر بلاشبہ گجری ماں صدیاں تک مان کرے گی۔

بابانگری وانگت مانھ مقیم ہون نال اُنھاں نال لاروی دربار مانھ ہون آلی اکثر علمی تے ادبی محفلاں مانھ بابا نظام الدین لاروی، سائیں قادر بخش، خدا بخش زار، اسرائیل اثر تے پنجابی کا کئی بلند پایہ شاعر اں کی صحبت وی نصیب ہوئی تے حاجی مجید نظامی جیہا عالم کی داد تے رہنمائی وی۔ اس طرح بابا نظام الدین لاروی ہوراں کے ہتھیں لگی وی یوئی اج دیکھ دیکھتاں گوجری ادب کی سب توں گھونھری، سدا بہار تے معتبر شخصیت بن گئی وی ہے۔

اقبال عظیم ناوی زمانہ کی ویہ بے دردیں تے بے رحمیں جھلنی پینیں جھڑی اس دور کا گجراں کو مقدر تھیں یا پین۔ اس نے زندگی قریب توں دیکھی تے دل مانھ اضطرابی کیفیت رکھن آلو یوہ بظاہر پُرسکون شخص بھاویں دُنیا نا اپنا دل مانھ اوکڑ کے نہیں دیکھن دیتو پر قلم تیں وہ اپنا

رازتے جذبات نہ چھپا سکیو۔ اُس نے اپنی شاعری مانہ جو گجھ لکھیو سچ لکھیو تے سچ تیں سو گجھ نہیں لکھیو۔ یوہ درد مند تے آزاد طبیعت شہزادو پہلی بار ۱۹۶۹ء مانہ ریڈیو کشمیر سرینگر کی زنجیراں مانہ پاپند ہو گیو۔ اُسویے گوجری زبان کی نشری خدمات واسطے انھاں تیں بہتر شخص کوئے تھووی نہیں پر نسیم پونجھی کے سنگ سال کھنڈ گوجری نشریات چلان توں بعد ریڈیو کو بہڑ وچھوڑ دتو۔ ور ات کی ادبی سنگتاں کی تاثیر دل کی تختی توں نہ ملجھن ہوئی۔ گجھ عرصو گوجر دیس جموں کی اشاعت کے ذریعے گوجری کی خدمت کرتا رہیا۔ آخر جد ۱۹۷۸ء مانہ کلچرل اکیڈمی مانہ گوجری شعج کھلو تاں اک بار فر زمانہ کی ادب شناس نظر اقبال عظیم تے نسیم پونجھی پر پینیں۔ تد توں بیہ بانی سال توڑی متواتر گوجری کی خدمت کر کے یہ دوئے شخصیت اتوں ہی سبکدوش ہو گئیں تے اجکل گھربار کی ذمے داریاں کے نال نال ادب کی خدمت وی جاری ہے۔

کلچرل اکیڈمی کی طرفوں شائع ہون آلی ہر اشاعت اُن کی کارکردگی کی ترجمان ہے۔ پر خاص کر گوجری ڈکشنری، تے بانھل بانھل (رانافضل) نغمہ کھسار (مہجور راجوری) کلام اثر (اسرائیل اثر)، مدینی قافلوتے خیام کی ربائیں (ترجمہ: نسیم پونجھی) تے گوجری ادب کی سنہری تاریخ (ڈاکٹر رفیق انجم) جیہی کتاباں کی اشاعت اُن کی عظمت تے ادب شناسی کی گواہ ہیں۔

اقبال عظیم نا گوجری ادب توں علاوہ اسلامیات، تصوف تے عالمی ادب پر وی عبور حاصل ہے جھڑو ہر کسے کابس کو کم نہیں ہو تو۔ ویہ گوجری توں علاوہ اُردو تے پنجابی کا وی اُچا قد کا شاعر ہیں تے کدے گوجری آلے پاسے نہ لگا ہوتا تاں بلاشبہ اُردو کا بین الاقوامی معیار تے شہرت کا شاعر ہوتا۔ اُن کی گوجری شاعری کی پہلی کتاب رتجھ کولیس کا ناں نال شائع ہوئی تھی جس نا اکیڈمی کی طرفوں بہترین کتاب کو اعزاز حاصل ہے۔ تے اجکل ویہ گوجری تے پنجابی شاعری کی دونوں کتاباں کی ترتیب مانہ مصروف ہیں۔ گوجری کہانی تے افساناں کی کتاب شائع ہون مانہ ضرورت توں زیادہ دیر لگی ہے پر امید ہے جے یاہ کتاب آجان نال نوواں لکھاڑیاں کی رہنمائی کے نال نال تنقید کرن آلاں کی زبان وی بند ہوئے گی۔

گو جری زبان مانہ اقبال عظیم نے ہر صنف مانہ معیاری تے مثالی تخلیقات پیش کی ہیں۔ نثر مانہ اُن کی علامتی کہانیں تے ناولٹ 'توں آوی جائے دم ہی نہ آئے تے کے کروں' گو جری ادب مانہ اہم اضافو ہیں جد کہ شاعری مانہ گیت، غزل، نظم تے نعت سب کچھ لکھیو ہے پر گو جری غزل اقبال عظیم کی پچھان بن گئی ہے تے تے عظیم گو جری غزل کی پچھان۔ بیہویں صدی کی گو جری غزل مانہ اقبال عظیم کا قد کو کوئے دوجو شاعر نہیں تے اُن کی غزلاں کو رنگ گیتاں تے نظماں ماں وی ڈلیوو و سئی لگے۔ اقبال عظیم کا تحقیقی مضمون وی اپنا اپنا موضوع پر حرف آخر کو درجور کھیں تے نواں تحقیق کرن آلاں کی رہنمائی کو کم کریں۔

اس خوب صورت گو جرا جوان کی بارعب شخصیت، طبیعت کی نرمی تے خلوص ہر اک ملن گلن آلا نا پہلی ملاقات مانہ ہی اپنی عضمت کو احساس دوا چھوڑے۔ ڈاکٹر صابر آفاقی تے رانا فضل راجوروی ہاروں اقبال عظیم وی بلاشبہ گو جری زبان واسطے بیہویں صدی کو اک عظیم تحفو ہیں۔

ع : خُدا کرے کہ یہ پودا ہرا ہرا ہی لگے۔ کلام:

غزل:

لکھیں لکھیں رات بھر کیں پھکا سنجھ سمیلا
یاد کسے کیں آس کسے کیں، کیوں اج موڑ مہار گئیں

کچھیں تندیں لمیں لاریں، چکنا چور جوانی
میریں آس کو راس کو چھیں، حتی بازی ہار گئیں

اتھروں پنو مر مر جینو اوکھت رنگ برنگیں
پر میریں اکھ بھار یہ بھارا لکھاں وار سہار گئیں

ڈاروں پنچھری ربا میرو میل محال ہمیشاں
سکن ساریں مار اڈاریں، میرو درد بسا رکئیں

ہوں گھر آیا شرد کو لپو چھوڑ نہ سکیو ورنہ
مار کے جھاتی میرے یو ہے کیتی وار بہار گئیں

غزل ۲:

آس کو دپو بھتو بھتو، تانگھ کی جھولی سکھنی سکھنی
چھاڑ غماں کو گھنو گھنیرو، فر بھی تیری یاد سلکھنی

آپنی جا پر ہراک رانجھو، ہراک ماہیو ہراک مجنوں
کس نے سیک ہجر کا سہنا، کس نے درد کی لذت چکھنی

جا جا کیوں کھلیارے جھولی، کس کی غیرت کون خریدے
بوللاں کو سوداگر ڈُبتو، پانی منگے ڈھکنی ڈھکنی

یار نا پرکھوں سُنوں سیانوں، پیار نا تولوں لا ترکھڑی
لاف کوچچی، بول کو قتا، جانوں ساری جھاڑی دکھنی

صدیاں لمہیں رات کلکھنی، موت جیہی خاموشی بھوگو
نیلامی نہیں راز چڑھانا، دل کی دولت دل مانھ رکھنی

غزل:۳:

شرد کا جھکھرو گیت ہجر کا گاویں گا ڈھینا پتر سینے کانی لاویں گا
 کیوں انہونی گل کی فر تصدیق کروں نین سمندر ڈنگا بھیت چھپاویں گا
 بستی بستی قصا جس کا بکھریں گا بکتا دریا سوہلا اس کا گاویں گا
 درد نستا ہو جائیں گا سرگی نا شام پئی فرسجا ہو کے آویں گا
 اتھروں کیروں اکھ دھوؤں دل صاف کروں ان راہیں مت مڑ بخارا آویں گا

غزل:۴:

تیرا خیال نے جے ہسایو تے ہس پیو
 ہوں اپنی بے بسی نا غماں نا بسار کے
 دل کی لگی بجھا کے نہیں جینو سواد کو
 اتھروں میں جتیا کدے ہاساں نا ہار کے
 غیرت کو روگ بن گیو غم روزگار کو
 ہوں سر پیو رہیو سدا پروردگار کے
 میں گگن تے پاتال کی دُوری منی سدا
 اک رات غم کی دیکھ لے توں بھی گزار کے
 میری دعا ہے شرد نہ آجائے دو گھڑی
 ہوں ہار گھل لیوں زری آتی بہار کے

ق:

نہ ہو جاؤں ملہدم ہوں ناٹھکریاں کو عنایت کسے نا قضا کہتاں کہتاں
 ذری دُنیا داری ناتج رل کے بیساں اتے رہ گوسب کچھ پیرا ہتاں رہتاں

غزل ۵:

جھوٹا قول قرار نہ کریئے سکھنے ہتھ پیار نہ کریئے
 رب نا رب کر مئیے ہر دم اس گل مانھ بڈیار نہ کریئے
 آتی برہیا فر مُڑ آئیے دل نا فر پیار نہ کریئے
 جے نہیں لانی بازی سر کی سوکھو رپیے پیار نہ کریئے
 نقدیں کریئے دل کو سودو اس مانھ نیس ادھار نہ کریئے

غزل ۶:

تج آئے بہار ایسی فر زخم دکھا چھڑیا برساں کا سُتا وا کجھ درد جگا چھڑیا
 قربانی کے دیتو میں تیریاں خوشیاں تیں امید گھما دتیں ارمان گھما چھڑیا
 ارمان وصالاں کا تے درد جدائیاں کا اس دل کیاں گٹھاں مانھ لوکاں تیں کا چھڑیا
 ویریت کی ڈھیریں تھیں تیتلاں کا بگلا تھا تیں ٹھیک کیو بھل کے سب نقش مٹا چھڑیا
 انگ آیا زخماں نا تیزاب دوا دسے اس نیم حکیمی نے او یار مرا چھڑیا

ق:

پہر دتاراں کو بدلاتو رات کی رات میری بستی چن آجاتو رات کی رات
 ست سمندر پی جائیں گائیں میرا یار نبھا میرو جگر اتو رات کی رات

ق:

دھرتی تیں اُتھ میرے کولے رازاں کا سودا گر آیا
 درداں کو کے چارو کرتا دھوڑ بلیبی زخم دکھایا
 جا چکور نا طعنا دتا تیرو چن اک ویرانو ہے
 تیرو پیاروی گوڑ ہے شاید چن کو سوچ اک افسانو ہے

ق

کوڈیاں کے مل نہیں یکسیں وفا کا شہر مانھ
 یار کو نقشہ دھیاناں تیں گُما بیٹھا کدے
 تُوں شریکاں مانھ نہ ہولا کر گناہ بھارا سہی
 دو گھڑی تیری گلی مانھ یار آ بیٹھا کدے

ق:

اس درد کو خبرے کے ناں ہے پر جان تیں چوکھو پیارو ہے
 اک مدت گذری سینہ مانھ اک اک مٹھو مٹھو درد پلے
 ویہ یار تھا آتی برھیا کا رُت بدلی سارا بدل گیا
 پر آس کو دیو سرگی تک ہر موسم مانھ ہر رات بلے

گوجرا شعر

ہئی اُپر رکن جوگی میلی شے نہیں ہوتی
 نیلامی پر شہر تیرا مانھ پک جاتی چند کھوئی

اتھرواں کی عام معافی ہونی تھی
 ہوں قیدی پر قیدی گویا چھوڑوں تھو

منا ڈیرو چاتاں تھوڑی دیر لگی
 یاد رکھوں تھو آس ملن کی چھوڑوں تھو

سینہ کو داغ درد کی لذت کسے کی یاد
ہوں کے رکھوں تے کے دیوں غم کا بھیاں نا

میرا دل کی دنیا نا اوہ جھوٹی لاون آلیا ربا
تیری دنیا اک دن ہوئے گی ڈھا کا ڈھیری میرے باندے

اُداس رستاں کا کنڈا پلو پکڑ کے اکثر سوال پچھیں
توں لیکو کیوں ہے ساقی کت ہے بہ حال دیکھیں تے حال پچھیں

یہ دُنیا آلا سوداگری تیں کدے نہیں رجیا کدے نہیں رجسیں
رہیں زلیخا کا دل کا مالک نا کھوئیں سسکیں چکا چکا کے

بھاویں فتویٰ لیکے آؤ بھاویں پھانسی چاہڑو
ہوں تے عرش عظیم کہوں گو یار اپنا کی بلیاں نا

چر تک ہوا مانھ درد کی سبیل کو بھار تھو
چپ نال اٹھ گیو کوئے اتھروں نچوڑ کے

کے دسوں ہوں جینو کے ہے خاب مانھ رُو کھلتیں اکھیں
لکھیں چکھو شہر وفا مانھ فر پک جانو گُوڑیں لکھیں

ڈاکٹر غلام حسین اظہر (ایم اے پی ایچ ڈی)

پیدائش: بانیاں بھمبر (پاکستان) یکم جولائی 1941ء

غلام حسین اظہر ہند پاک کا ادبی حلقاں مانہ اک معتبر ناں سمجھو جائے، خاص کر تحقیق تے تنقید کا میدان مانہ۔ بھاریں ویہ ذاتی طور پر اردو ادب نا اپنومیدان سمجھیں پر جموں کشمیر کی علاقائی زبانوں نال اُن کی دل چسپی نے کشمیری، گوجری، پنجابی تے پہاڑی زبانوں مانہ وی اُن کی پہچان اک ہمدرد تے رہنما کے طور کر اچھوڑی ہے۔

ڈاکٹر اظہر ہور یکم جولائی ۱۹۴۱ء نا تحصیل بھمبر (پاکستان) کا بانیاں گراں مانہ چوہدری احمد خان ہوراں کے گھر پیدا ہویا۔ ویہ آپ وی بڑی علمی تے ادبی شخصیت کو درجو رکھیں تھا۔ اظہر ہوراں نے بنیادی تعلیم گھر مانہ ہی حاصل کی تے فر ۱۹۴۷ء کی افراتفری مانہ ہجرت کر لیکھر آلاں سمیت گجرات مانہ اباد ہو گیا تے اے بی اے تک کی تعلیم حاصل کی۔ ۱۹۶۳ء مانہ اور نخل کالج لاہور توں اردو مانہ ایم اے کی سند لئی تے تے ۱۹۶۷ء توں لے کے آزاد کشمیر مانہ پروفیسر کے طور ذمے داری نبھاویں۔ اسیدوران انھاں نے ۱۹۷۶ء مانہ اردو افسانے کا نفسیاتی مطالعہ کا موضوع پر تحقیق کر کے ڈاکٹریٹ کی ڈگری وی لئی۔

اُنکا علمی ادبی تحقیقی تے تنقیدی مضمون اکثر رسالاں مانہ شائع ہوتا رہیں۔ صابر آفاقی ہوراں کا کہن موجب تنقید، نفسیات تے کشمیر کی تاریخ انھاں کا پسندیدہ موضوع ہیں۔ تے ویہ برصغیر کا اچا پایا کا تنقید نگاراں مانہ شمار ہوئیں۔ انھاں نا کشمیر کا علاقائی لوک ادب نال وی گوڑھی دلچسپی ہے تے کئی تحقیقی تے تنقیدی مضموناں توں علاوہ گوجری پہاڑی لوک گیت تے میاں محمد بخش، شخصیت اور فن، کاناں نال اُن کی دو کتاب وی شائع ہوئی ہیں۔

گوجری ماٹھ تخلیقی ادب آلے پاسے ویہ بھادیس تھوڑا چرکا مڑیا ہیں پر اس نال انھاں نا اُن مرحلاں توں نہیں گذر نو پوجہ اعام گوجری لکھاڑیاں نے دیکھیا یا بھو گیا۔ اس طرح انھاں کا تجرباں تے فنی پکھیت کو ثبوت انھاں کا شعری کلام ماٹھ دیکھو جاسکے۔ اللہ کرے گوجری ادب نال انھاں کی دل چستی قائم رہے تے ویہ خاص کر تحقیقی تے تنقیدی میدان ماٹھ اپنی ماں بولی کو حق ادا کر سکیں جس کی صلاحیت انھاں کا مقابلہ ماٹھ کسے دوجا لکھاڑی نا نصیب نہیں۔ شیرازہ گوجری ماٹھ شائع ہون آلا گوجری غزل، گوجری ڈرامہ تے گوجری افسانہ۔ پرائکٹ تنقیدی مضمون میرا اس دعوی کا ثبوت واسطے کافی ہیں۔

گوجری کلام کا نمونا: غزل:

جس کی خاطر دُنیا چھوڑی، زلتو گیو بن کے
 اج اوہ میرے کولوں لنگھے اُچو گاٹو تن کے
 اوہ بے مہر و میت نہ بنو، نیت نہ میری پرکھی
 پیار کے بہڑے جھوروں بیٹھو، گل ہوں دل کی من کے
 جس کی خاطر جھگو سڑپو، اُس نا دھوڑ نہ لگے
 سڑکے جان سہاگو ہوئی، لانی نام سجن کے
 دل کی دھرکن بن کے تینا سدا حیاتی بخشے
 روح میرو ہے روپ سجن کو، من کے شیشے چھن کے
 اوہ نظراں توں اوہلے اوہلے بھادیں منہ نہ دسے
 میں تے درشن کرنا اظہر، چڑھ کے سنگر چن کے

سرور حسین طارق

پیدائش: 1942ء ڈھنڈکوٹ راجوری

وفات: 2000ء راجوری

سرور حسین طارق اُن خوش قسمت لکھاڑیاں بچوں تھاجھاں نازبان تے ادب ورثہ مانھ لہھی۔ ویہ ۱۹۴۲ء مانھ ڈھنڈکوٹ راجوری مانھ مولانا مہر الدین قمر اوانہ کے گھر پیدا ہوا۔ یوہ وہ دور تھو جد ملکی ازادی کے نال نال سماجی نا انصافیاں کے خلاف گجراں کی جدوجہد زوراں پر تھی۔ تے چوہدری غلام حسین لسانوی، چوہدری دیوان علی، قمر راجوری تے میاں نظام الدین لاروی ہوراں جیہا گوجر سپوتاں کو قافلوتی قوم نادرہونگ جگان مانھ لگو ووتھو۔ ان حالات کو اثر طارق ہوراں کا ذہن پر قدرتی تھو۔ پر ۱۹۴۷ء کی ملکی تقسیم کے نال ہی یاہ تحریک وی کھنڈ پھٹ گئی۔ قمر راجوری تے لسانوی صاحب پاکستان چلا گیا تے ات رہ جان آلاں مانھ وہ جوش جذبہ بواج تک دوبارہ آسکیو۔

سرور حسین طارق بنیادی تعلیم توں بعد محکمہ تعلیم مانھ اُستاد کے طور ملازم ہو گیا پر ۱۹۶۵ء کی افراتفری مانھ جلا وطن ہو کے ایبٹ آباد، پاکستان چلا گیا۔ جت قمر راجوری ہور پہلاں توں موجود تھا۔ اس طرح انھاں نا اپنا باپ کی شفقت تیں علاوہ اک عظیم مفکر، ادیب تے شاعر کی سنگت تے رہنمائی وی نصیب ہوئی تے اتے اُن کے اندر کا فنکار نے قلم کو کانو سمہالیو۔ گوجری تے گجراں تیں متعلق قمر راجوری کی تحریراں کو اثر سرور حسین طارق کی شاعری تے نثر ماں وی محسوس کیو جاسکے۔

۱۹۷۶ء ماں مولانا مہر الدین قمر کی وفات تیں بعد طارق ہوراں کی روح ہور بے

چین ہو گئی تے آخر ۱۹۸۰ء مانھ وطن کی محبت تے دانہ پانی کی چھک انھاں نا واپس راجوری

لے آئی۔ جت انہاں نے اپنی زندگی کا باقی سال گدا ریا۔ راجوری مانہ واپس آ کے ابرار احمد ظفر ہاروں انہاں کا کیتنا خواب تے ارمان پورا ہو یا، ویہ آپ یا اللہ پاک ہی جانے پر گوجری ادب واسطے اُن کو آنومبارک ہی رہیو۔ گوجری زبان تے ادب واسطے دوہاں کا خلوص مانہ کسے ناکدے کوئے کھوٹ نہیں لھو تے آخر عمر تک دوئے ول، لاروی دربار کی ادبی مجلساں تیں علاوہ ریڈیو کشمیر تے ریاستی کلچرل اکیڈمی کا ہر مشاعرہ تے کانفرنس مانہ جوش جذبہ تے باقاعدگی نال شامل ہوتا رہیا۔ پر خورے کس نظر نے دوئے موتی جلدی چن لیا۔

سرور حسین طارق نے گوجری مانہ کئی خوب صورت گیتاں تیں علاوہ سی حرفی تے غزل وی لکھیں جہڑی مہاروادب تے شیرازہ گوجری مانہ شائع وی ہوتی رہی ہیں۔ تے اکثر ریڈیو کشمیر تیں وی انہاں کو کلام اکثر نشر ہو تو رہے۔ انہاں نے پنجابی مانہ وی چنگی خاصی شاعری کی ہے جہڑی کدے شائع نہیں ہو سکی۔ شاعری تیں علاوہ انہاں کا کئی تحقیقی مقالے ریڈیو پٹیچر وی نشر ہوتا رہیا ہیں۔

اپنا ادبی سرمایہ ناکتابی صورت ماں دیکھن سمیت کئی ارمان سینہ مانہ چھپا کے ہی سرور حسین طارق ۲۵ اگست ۲۰۰۰ء نا دل کی حرکت بند ہون نال اس دنیا توں رخصت ہو گیا۔ تے اس طرح قمر راجوری نالوں اُن کی ادبی خدمات وی اجھاں تک تحقیق کرن آلاں کی اڈیکوان ہیں۔ کلام:

غزل ۱

سکھ خوشی کو منہ نہیں تکیو	گذر گیا دن روتاں روتاں
جھونس گئی رے دل کی کوئیل	نظر کرم کی ہوتاں ہوتاں
اکھ جھپکتاں گئی جوانی	بہار گذر گئی سوتان سوتان
اتھروں سکیا اکھاں بچون	من کا پاپ نا دھوتان دھوتان
طارق کا نگ چڑھی ہے غم کی	خون اکھاں کو چوتاں چوتاں

غزل ۲:

اک پیاری نظر پیاراں گی کر دل کا ٹوٹا چارگئی
اک بجلی دل پر آن پئی تے ساڑ میرو سنسارگئی

اس پیت نگر کی بستی مانھ، ہر شخص منا مجبور دسے
کت آن پھسایا ہم دل نے جت قسمت بازی ہارگئی

یہ نازک تندو اُلفت کا، گیا اُلجھ پیار بھلیکھاں مانھ
واہ صورت دل مانھ آن بسی فر چیتا ہور بسارگئی

اس عشق پار کی منڈی مانھ، مچ مہنگو دل کو مال پکے
جس نگری مانھ دلدار بسیں، اکھ اُس پاسے ہر بارگئی

غزل ۳:

رات ہجر کی مچ ستاوے دس ہن کیاں جاؤں
دسوں پاڑ کلیجو کس نا کس نا گل سناؤں

دل مانھ اگ بچھوڑا آلی بھانڈنت بھکھاوے
آوے یاد تیری جد سجا بلیں بلیں گاؤں

ہمت کر کے آ اکواری تک جا زخم دلاں گا
تک لیوں رنج کے مکھڑو تیرو فر بھاویں مر جاؤں

کول میرے اج توں نہیں بھادیں دل مانھ یاد بسائی
پھل کلیاں مانھ لوڑوں تنّا خواہاں وچ بلاؤں

طارق تیری خاطر ہم نے تن من ساڑ مکایو
ساری دُنیا بھیت یوہ جانے کس تیں راز چھپاؤں

غزل ۴:

دل پر غم نا چھاپ گیو ہے پہلو اتھروں برہیا گو
اکھ میری تیں اج بکیو ہے پہلو اتھروں برہیا گو

چن تارا تے جگنو شبنم پھل ست رنگیا تے خوشبو
کتی بولیں بول رہیو ہے پہلو اتھروں برہیا گو

دُکھیا چھوڑ کے جاتا سجا، چھپ کے دل بانھ بستتا راہیا
یاد تیری نے تحفو دتو ہے پہلو اتھروں برہیا گو

ساون کی اج دھند ہے چھائی ان دناں کی فریاد آئی
دل میرا پر آن پو رے پہلو اتھروں برہیا گو

ہر دکھ طارق یاد آو رے اکھ ہوئی ہیں رتیں رو رو
میرا دکھیا دل کی صدا رے پہلو اتھروں برہیا گو

چوہدری نسیم پونچھی

پیدائش: 1942ء گورسائی مہنڈر

گوجری کا نامور شاعر، ادیب تے محسن محمد بشیر الدین نسیم پونچھی کو تعلق ادبی پا جا آلی دھرتی پونچھ کا سب توں بڑا گراں گورسائی نال ہے۔ اس علاقہ نے کچھلی صدی مانھ نورو چچی تے موجودہ صدی مانھ نسیم پونچھی پیدا کر کے بے شک قوم پر احسان رکیو ہے۔ یوہ شریف تے سادو مگر ذہین، حساس تے جذباتی شخص ۱۹۴۲ مانھ اک کالس خاندان مانھ پیدا ہو یو۔ اُس دور مانھ گوجر قوم واسطے جہڑا ٹھہلا مقدر مانھ وہیں تھا اُن وچوں نسیم پونچھی نے اپنہ جھولی بھر بھر کے ليو۔ قسمت نے یاہ ہولی جئی چند سُر کوٹ ہائی سکول (۱۹۶۲) تیں لیکے خیبر میڈیکل کالج پشاور (۱۹۶۴)، گوجر دیس جموں (۱۹۶۵)، محکمہ تعلیم جموں (۱۹۶۸)، سول سکریٹریٹ، ریڈیو کشمیر سرینگر (۱۹۶۹) تے جموں کشمیر کلچرل اکیڈمی (۱۹۷۸) تک پھیری تے آخر اتے کی ہو کے رہ گئی۔ کلچرل اکیڈمی مانھ گوجری شعبہ کھلن کے نال ہی ویہ گوجری ایڈیٹر کی حیثیت مانھ ات آیا تھا تے سال ۲۰۰۲ مانھ ڈپٹی سکریٹری کے طور ریٹائر ہو کے اجکل گاندر بل کشمیر مانھ اباد ہو گیا ہیں۔

گوجری زبان نا کاغذ قلم تھمان مانھ نسیم پونچھی کی بڑی فربانی ہیں۔ سچی گل تے یاہ ہے جے گوجری واسطے سب توں زیادہ کم کلچرل اکیڈمی نے کیو ہے تے اس حوالہ سنگ وی نسیم پونچھی تیں بغیر کلچرل اکیڈمی کو ذکر ہمیشاں نا مکمل رہ گو۔ نسیم پونچھی نے شاعری کی شروعات جموں تیں کی ”یوہ شہر میرا مانا گو“ تے فریاہ تخلیقی کوشش ۱۹۷۵ مانھ گوجری کی پہلی کتاب ”نین سلکھنا“ کی صورت مانھ دُنیا کے باندے آئی جہڑی اج توڑی وی گوجری کی بہترین کتاباں مانھ شمار ہوئے۔

نسیم پونچھی ہوراں نے نظم، غزل، گیت سب کچھ لکھو ہے۔ لوک گیتاں کی طرز پر لکھیا وانکا گیت مچ رسیلا تے درد یلا ہیں۔ اُن کی شاعری مانھ سچا عشق کی مٹھی مٹھی چو بھ دی ہے تے سماجی ظلماں کے خلاف دند کیڑوی۔ دُنیا پر جد ظلم ہو یوتاں دُنیا آلاں نا نسیم پونچھی کی ”چھنڈی“ تے کہر سسنگھ مدھو کر کی ڈوگری نظم ”گھانی“ ضرور یاد آویں گی۔ نسیم صاحب نے خیام کی فارسی رُبایاں کو گجری مانھ منظوم ترجمہ تے مولانا ابوالحسن ندوی کی کتاب ”کاروانِ مدینہ“ کو ترجمہ ”مدینی قافلہ“ کا ناں نال کر کے گجری کا قد تے وقار مانھ جھڑوا ضافو کیو ہے اس نال اُن کی شخصیت وی ہورا، ہم ہو گئی ہے۔

شاعری تیں علاوہ نسیم پونچھی صاحب نے ’گجرائی‘ سمیت کئی شاندار کہانیاں وی لکھی ہیں، تے ایڈیٹر کی حیثیت اُنکا لکھیا واداریا تے چٹھی پتروی سرکاری خدمات کے نال گجری ادب مانھ اہم اضافہ ہیں۔ اس عرصہ مانھ انھاں نے چھتا نواں گجری لکھاڑیاں نا انگلی پڈ کے ادبی زمین پر ٹرن کی جاچ دی انھاں کو شمار ہی نہیں ہو سکتو۔ ملازمت تیں بعد انھاں نے اپنا لکھیا وانشائیہ وی جمع کیا ہیں جھان نا ”چھکیل“ کا ناں نال شائع کرن کی تیاری مانھ ہیں۔ اللہ انھاں کی عمر مانھ برکت دے تانجے ویہ گجری کی مزید خدمت تے گجری لکھاڑیاں کی رہنمائی کر سکیں۔ کلام:

غزل:

سہواں مانھ ڈھل رات کی رات	جے کمیں مل رات کی رات
اکھاں مانھ کھل رات کی رات	لہتو دینہ ہے بے بسا ہیو
رُوحاں مانھ رل رات کی رات	بُت بُتاں کے سنگ نہیں ملتا
آ مِنا چھل رات کی رات	میں پل پل نا دھوکھا دِتا
آ پیاں ڈل رات کی رات	پانی گھٹ نسیم کے پاسے

غزل:

ہستیں محفل نگر نگر کیں میرا گیت بسا رگنیں
اُتنی وار یاہ اُجڑی بستی جتنی وار بہار گنیں

نچن کھیڈن کا وہ میلا مڑ نہیں آتا مڑ نہیں لہتا
آئیں ساعت ہستیں ہستیں برچھی سینے مار گنیں

ایکن پل کو اک نظر کو اک ڈوری کو یوہ جھیلو
انکی نظراں کے ہوں صدقے میریں اپنی ہار گنیں

یاداں کا موڑاں پر آ کے دل کے اپر کے کے گزری
سب دتیں سوغات اس ظالم دل نا آپے دھار گنیں

نستوں نوں نسیم نا ڈوری پھک چھک کے پچھتاوے ہے
ٹکیا سر ما مار کے تاری کتنی ہی جج پار گنیں

غزل:

ہنگلا گیا خوشی کا سویرا کدے کدے
چکا گیا دلاں نا اندھیرا کدے کدے

مندراں تے مسجراں نے اڑ اڑ کے دیکھیو
بدھتو تے کھواتو وہ سہرا کدے کدے

ڈلہا ہیں فرن فرن جیہا اکھاں تیں آتھروں
آیا ہیں بس خیال جد تیرا کدے کدے

پتھر ہے میرے سینے ہر وار میں کہو ہے
روا گیا خزاں کا یہ پھیرا کدے کدے

پھلاں کا ہار چاڑھیا میں جا کے اس جگہ
لایا تھا جت بہار ماں ڈیرا کدے کدے

غزل:

چھوڑ گیا تم اوڑک منا میخانہ کے نیڑے
ہستی آجا ظالم دنیا دیوانہ کے نیڑے

میرے دیسوں موڑ گیا کچھ پیری چور دلاں کا
اکھاں ما ارمان بسن کو ویرانہ کے نیڑے

مُدیو رخ نیناں کو جد مشرق تیں مغرب در
دنیا میری بس گئی آپے پیانہ کے نیڑے

ظالم رات کلکھی سوئے کندوں کی موہری ما
روح کو بھنور پھرتو دسے مہماناں کے نیڑے

اُجڑ گیا نسیم نگر تیں ہاساں کا سب میلہ
بتا بتا بس گیا جا کے رُخسانہ کے نیڑے

غزل:

پھر شرد اسی دلگیر گئی
یاہ چاہت وی کے چاہت ہے
اس رانجھا کے سنگ کے ہو پو
واہ ساعت کنتی سدھی تھی
واہ سنگو سنگ نسیم رہی
تن جھجھی لیرو لیر گئی
دل پہاڑاں کا واہ چیر گئی
وہ اتے گیو جت ہیر گئی
ڈھل سدھی سینے تیر گئی
اٹھ ساراں توں اخیر گئی

غزل:

ہوں اپنا دلدار نا لوڑوں
جت کشتی کو جانو محل ہے
کوئج کو کے ہکلور نمائی
قسمت میری دھو گیو ساون
لہہ گیو دینہہ نسیم تیں پہلاں
خبرے کت ہے یار نا لوڑوں
دریا کا اس پار نا لوڑوں
کہ تھی کت ہے ڈار نا لوڑوں
پیو لکھیاں کا گار نا لوڑوں
چن کی دکھ ہے یار نا لوڑوں

غزل:

چلی ہے کتے تیں ہوا ہو لیں ہو لیں
تیرو چن تے آخر سناں ہاریو ہے
سچیں کاگ تیں وی چلیں جہاز بہلا
تیرے کول کاغذ تھا ٹیپیں نہایا
کسے وقت صافا بناویں ہوویں تھو
توں دنداں ماچھیری دبا ہو لیں ہو لیں
کوئے گیت اج وی سنا ہو لیں ہو لیں
چلا دے سنہوڑو لکھا ہو لیں ہو لیں
بلی ہے جے تیلی بجھا ہو لیں ہو لیں
بٹاوے نظر جے بنا ہو لیں ہو لیں

غزلاں کا گچھ شعر:

ہوں زندگی نا بیس کے چت چت اڈکیو
 اُت اُت ہوں تاج محل کا نقشا بنا گیو
 چڑھتے لہتے گہلیں گہلیں پیو بھلاوا کھاتو چلوں
 میری چار چو فیری تیری باہیاں کو بس گھیرو دسے
 نین اداس بناتے ویلے وہ بھی رُنو ہوئے گو
 ساساں کی جھولی تیں چا کے کت بسا یو گیو ہاں
 اس نگر مانھ ساری دولت پک گئی تیری نسیم
 گیت تیرے واسطے لکھیا تھا ویہ بھی نل گیا
 اپنا نے تیرے نال جو کیو برو کیو
 کچا گھڑا نا فر تیرے ہتھیں تھما گیا
 دل کی اڑی تھی ایکا دوئے غم نا بیس بنڈتا
 تم بن گیا کسے کا ہوں کسے کو ہو نہیں سکسوں
 میرا زخم ڈنگا تے کھچیل کسے کی
 کئی وار دکھیا نہ انگ آتاں آتاں
 ریت مانھ سنا اماہ گھڑیو گھڑی اُمن لگا
 برف کیس مانیں خزاں کے بعد وی گلتي رہیں

پروفیسر محمد رفیق بھٹی

پیدائش: 21 جنوری 1943ء ساج راجوری

محمد رفیق بھٹی ۱۹۴۳ء مانہ راجوری کا ساج گراں مانہ اک راجپوت بھٹی خاندان مانہ پیدا ہوئے۔ بنیادی تعلیم اے حاصل کی۔ ۱۹۶۵ کی جنگ مانہ ہجرت کر کے پاکستان چلا گیا۔ باقی تعلیم اے تکمیل کی۔ میرپورکالج میں بی اے کرن میں بعد معاشیات مانہ ایم اے کی ڈگری لئی۔ کالج مانہ لیکچرار کے طور ملازمت شروع کر لئی۔ تے اک طویل عرصہ کی علمی تے ادبی خدمت میں بعد پروفیسر کی حیثیت نال سبکدوش ہو یا ہیں۔

پروفیسر محمد رفیق بھٹی کشمیر کا علمی تے ادبی حلقاں ماں اک معتبر ناں ہے۔ ویہ طالب علمی کا زمانہ تیں اے تک نظم تے نثر ماں برابر لکھتا رہیا ہیں۔ ویہ بقول خواجہ محمد عارف کے، شاعر، مصنف، قلم کار، عالم، معلم تے فنکار سب کچھ ہیں۔ تے اللہ جانے انکی شخصیت کا ہور کتنا پہلو ہوئیں گا۔ انھاں نے الگ الگ موضوع تے الگ الگ زبان ماں متوجہ لکھو ہے۔ اردو ماں اے تک پنجال پبلشرز میرپور نے انکی جہڑی کتاب شائع کی ہیں انکا ناں ہیں: ”ستون دار“، ”لہونگر“، ”محسنین کشمیر“، ”دوستی کا سفر“، ”قرض حسنہ“ تے ”ایران صغیر سے ایران کبیر تک“۔ پروفیسر رفیق بھٹی ہور ۱۹۶۷ کے نیڑے تیرے جدید گوجری ادب کی تحریک نال بڑی دل چسپی لے کے شامل ہو یا۔ انھاں نے غزل کی صورت مانہ سوئی تے معیاری تحریر گوجری ادب کے حوالے کی ہیں۔ اُن کی شاعری ریاستی کلچرل اکیڈمی کا شیرازہ گوجری مانہ باقاعدگی نال شائع ہوتی رہی ہے پر گوجری ماں اچھاں تک ان کو کوئے شعری مجموعہ کتابی صورت مانہ نظراں تیں نہیں گزر پو جسکی گوجری کا قدر دان ناں نامدت تیں اڈیک ہے۔

غزل: ۱

آخر دم تک لڑتو رہیو اوڑک بازی ہار گیو
گجھ دن ہوروی جی لیتو پر شوق بجن کو مار گیو

گٹے گتے پانی تھو جد اس دریا مانھ ڈبیو تھو
چڑھتی کا نگ مانھ کھلو کھلو ہوں کیتی واری پار گیو

کس نا کوئے سنگی سمجھ کس نا دشمن جانے
بجن بن کے ڈوبن آلو، دشمن بن کے تار گیو

چپے چپے سجدا کر کے ذری بروبر بھلیو جد
کی کرتائی کھوہ مانھ پے گئی، جو گجھ تھو بیکار گیو

اج تک کس نے جان سکی ہے اس دُنیا کی چال
ہستو ہستو آون آلو روتو زاروزار گیو

غزل: ۲

بستو رستو شہر مانھ کلو جنگل ہاروں ڈرتو رہوں
جین کو کوئے حال نہ دے جین کا ہاڑا کرتو رہوں

کل کلوتر اکھ تیری نا دوجو چنگو لگے گو
شوق کو بجا مل نہ کوئے شوق تیرا تیں ڈرتو رہوں

رکھ خیال مانھ کا نگ کی شوگر تک نہ میرا سوکا نا
ہوں برسائی نالو بن کے موسم موسم چڑھتو رہوں

ہونی آخر ہو جائے ات سوچ کو چارو چلتو نہیں
رات دھیائی ہوں کیوں سگی سوچ کی سولی چڑھتو رہوں

دوزخ کی اگ کے ساڑے گی لوکو میرا جسا نا
ہوں تے عشق کی ٹھنڈی اگ مانھ شام سویرے سرتو رہوں

غزل ۳:

سکھ آوے تے اس نا اوکھت اوکھت ویلے یاد کراں
ہم وی کدے کدائیں لوکو گھر اپنا نا یاد کراں

ڈنگو سوچ وچارو کر کے یاہ گل سمجھ ماں آئی
جس ماڑی ماں بساں پہلاں نیں اسکی آباد کراں

دل کا بندی خانہ اندر لکھاں رتجھ ہیں قیدی
دسے کائے نہ پوری ہوتی کس کس نا آزاد کراں۔

انا الحق کو نعرو لاکے سولی لیاں گل ماں پا !
کد تک جھوٹھا لارا لاکے دل اپنا نا یاد کراں

یوہ تے پک یقین ہے مناج مقدموں ہاراں گا
اُسے ظالم نے لٹیا تھا جس اگے فریاد کراں

عبدالغنی عارف

پیدائش: جون 1944ء اندروٹھ (بگلہ نڈیالہ) راجوری
 گوجری کا ہمدرد تے مخلص شاعر تے ادیب عبدالغنی عارف ۱۹۴۴ء مانہ راجوری کا
 گراں اندروٹھ مانہ چوہدری محمد اسماعیل بجران ہوراں کے گھر پیدا ہويا۔ بچپن اتے گزار یو
 تے بنیادی تعلیم وی اتے حاصل کی پر شادی تیں بعد بابانگری وانگت مانہ نوں بھرت کی جے
 ہمیشاں واسطے اُتے کا ہو کے رہ گیا۔

بچپن تیں ہی اسرائیل اثر تے اقبال عظیم ہوراں کی سنگت نصیب ہوئی تے یوں
 گوجری زبان کی ترقی واسطے انجمن ترقی گوجری زبان وادب قائم کر کے گوجری مجلس، شعرو
 شاعری تے ریڈیو کشمیر تے کلچرل اکیڈمی مانہ گوجری شعبا کھلون واسطے کی جان آلی کوششاں
 مانہ خلوص نال شامل رہیا۔ تے فر کشمیر مانہ قائم ہون آلی ”ادبی سنگت کشمیر“ مانہ وی جوش
 جذبہ نال کم کیو۔

عارف مخلص تے حساس گوجری لکھاڑی ہیں جہڑا باقاعدگی نال گوجری تحریک نال
 شامل رہیا ہیں تے ریڈیو یا اکیڈمی کی ہر مجلس تے کانفرنس مانہ شامل رہیں۔ بنیادی طور پر شاعر
 ہیں پر کجھ کہانیں تے تحقیقی مقالہ وی لکھیا ہیں۔ تے کلچرل اکیڈمی کی طرفوں چھاپی جان آلی
 گوجری ڈکشنری تے لوک ادب کی شیرازہ بندی مانہ جوش جذبہ نال شامل رہیا ہیں۔
 اسرائیل اثر، اقبال عظیم تے نسیم پونچھی نامُج نیڑے تیں دیکھن، سُنن تے پڑھن آلا
 غنی عارف ناجنید نظامی کی رہنمائی وی حاصل رہی ہے۔ ان کو خلوص شخصیت ہاروں اُن کی
 تحریراں مانہ وی اُمتوسی لگے۔ غزل، نظم تے گیتاں آلی اُن کی پہلی کتاب ”مہمرا چھاں“ نا

ریاستی کلچرل اکیڈمی کی طرفوں بہترین کتاب کو ایوارڈ وی ملو ہے۔ اُس تیں بعد کی گوجری شاعری دوجی کتاب کی شکل مانھ چھاپن کی تیاری مانھ لگاواہیں۔

غنی عارف اُن خوش بخت لوکاں وچوں ہیں جھہاں نے زندگی کا کسے مقام پروی تخلیقی میدان تیں ہن یا تھک کے مین کی گل کدے نہیں سوچی تے ہمیشاں اپنی ٹورٹارتا رہیا ہیں۔ ویہ گوجری زبان تے ادب واسطے سچ مچ اک قیمتی سرمایو ہیں۔ کلام کا نمونا:
غزل:

کُجھ یاد تھیں دل کا بہڑا مانھ، کُجھ درد ہجر کا ڈیرا تھا
چُپ نال شریکاں تیں اوہلے، میں سارا آپ چھپا چھڑیا

کُجھ ہاسا کھیڈ پرانا ہیں مُد کھینچل کریں ٹولیں دل
ہوں صدقے آتا راہیاں کے، سوواری ہتھ گھما چھڑیا

کائے سانجھ تھی دکھاں سکھاں مانھ، رل میں کے درد بندھاواں تھا
اس آتا شرد کا پھانڈا نے، ویہ سچرا مھل کھنڈا پھڑیا

دل اُجڑی پجڑی بستی مانھ، کوائے رستا تکتو ریہ تھارا
اُڈیک مانھ آتا راہیاں کے، میں کتنا کاگ اُڈا پھڑیا

ہوں جھدی نظراں کی خاطر اج توڑی جعفر جالوں تھو
ہوں انکے صدقے جے میں اپنا سارا درد مھلا پھڑیا

غزل ۲:

لٹ گئی واہ تیری ادا بلیں بلیں
یہ اسکی عنایت کیس کجھ اک نشانی
ٹٹیا وا دل کیس پھینکر یہ ساریں
وہ میرو خدا بے سہاراں کو مالک
میری اس بستی کی یاہی سرحد ہے
سہہ لئی میں واہ سزا بلیں بلیں
پیو زخماں نا سینے توں لا بلیں بلیں
گیو میرے کلاوے تھما بلیں بلیں
پگرے گو توں وی بلا بلیں بلیں
یہ کھلری وی گٹھڑیں توں چا بلیں بلیں

غزل ۳:

چھوڑ کے ات یار نہ جا
تیری رتجھ نے ات پچپائی
منت منی کاگ اڈایا
ساہ گو کوئے بساہ نہیں اڑیا
دندکن پے گیا تے خبرے
راہ کے سٹ بھکار نہ جا
ہوں صدقے ہوں وار نہ جا
کرکر قول قرار نہ جا
دیکھ لیوں اک وار نہ جا
دل نا کر بیزار نہ جا

غزل ۴:

برف کی چٹی رات کی قسمیں
اس نے ساریں رتجھ گمائیں
عمر گذاری جھکتاں جھکتاں
اسے ساہی پر جیتو رہیو
رستا روک لیا برقاں نے
چانن کی بارات کی قسمیں
نظراں کی سوغات کی قسمیں
وصل کی اس رات کی قسمیں
آساں کی سوغات کی قسمیں
ساون کی برسات کی قسمیں

مخلص وجدانی

پیدائش: 21 مارچ 1944ء گوہاڑی مظفرآباد

بیہویں صدی مانہ گوجری غزل کی پچھان بن جان آلا مخلص وجدانی کو اصلی ناں محمد دین ہے۔ ویسے ۱۹۴۴ء مانہ مظفرآباد کا گوہاڑی گراں مانہ مولانا محمد علی پھامڑہ کے گھر پیدا ہويا۔ ویہ مشہور ادیب تے شاعر صابر آفاقی ہوراں کا نکا بھائی ہیں۔ بچپن مظفرآباد مانہ گذار یوتے اتے ایف اے تک تعلیم حاصل کی۔ کچھ عرصہ گھر کو کم کاج تے زمینداری کرتا رہیا تے فریسمابی طبیعت نے نوکری کی تلاش مانہ کراچی پہنچا چھوڑیا۔ اتوں واپس آ کے سال کھنڈراولپنڈی مانہ پرائیویٹ نوکری کی تے فرواہ کینٹ مانہ کلرک بن گیا۔ ات ۱۹۶۷توں لیکے ۱۹۷۷توڑی نوکری کی پر یاہ جگہ وی رس نہ آئی تے ویہ نوکری چھوڑ کے مظفرآباد واپس آ گیا۔ تے اجکل مظفرآباد ریڈیو سٹیشن کا گوجری پروگرام کی جان بن گیا ہیں۔

کراچی تے راولپنڈی مانہ انھاں نے اُردو ادب وی پڑھیوتے اسے دوران آپ وی شاعری شروع کر لئی تھی۔ پہلاں اُردو تے فر گوجری مان لکھن لگا۔ یوہ پاکستان مانہ گوجری ادب کو بڑوا ہم دور تھو۔ جدات کا گوجری لکھاڑیاں نے گوجری کی نشرو اشاعت واسطے دوڑ دھوپ شروع کی تھی۔ تے اس راہ جدا انھاں نے اپنا قلم کی مہار اُردو تیں گوجری آلے پاسے موڑی تاں انھاں نا گوجری کلام پر پوری داد ملی۔

گھریلو حالات تے مخلص کی حساس طبیعت شاعری واسطے پہلاں ہی موضوع تھی ایسا حالات مانہ معمولی جرک وی حساس ذہن نا کہن لکھن پر مجبور کر چھوڑے تے مخلص نا دنیا کا بے شمار ٹھہلا جھلنا پیا تھا اس طرح انھاں نے اپنا تے زمانہ ناغم اپنی مٹھی مادری زبان گوجری

مانھ ڈھال کے گوجری شاعری تے خاص کر گوجری غزل ناچھدی ادبی تے ابدی شعر تے بخشی ہے ویہ آپ وی اسکی پہچان بن گیا ہیں۔ اُن کی گوجری غزلاں کی اک کتاب ریرا کا ناں نال شائع ہوئی تھی۔ ان کو کلامِ خالص گوجر ماحول کی عکاسی کرے تے ادبی معیار پر پورے اترے۔ مخلص بلاشبہ گوجری غزل کا کامیاب ترین شاعر اں مانھ شمار ہوئیں تے انھان نے گوجری غزل کسے وی دوجی زبان نال موٹھ جوڑن کے قابل بنا چھوڑی ہے۔ مخلص کی گوجری غزل نواں لکھن آلاں واسطے بہترین رہنمائی کو کم کرے گی۔

مخلص وجدانی ہوراں نے پہلے اُردو ماں شاعری شروع کیہ تھی تے بعد ماں گوجری کے نال نال وی اُردو شاعری جاری رکھی۔ انکی اُردو شاعری بڑی معیاری ہے تے ہن تک انھان نے اُردو ماں وی کئی کتاب شائع کی ہیں۔ انکی تخلیقات کی تفصیل اس طرح ہے۔

اُردو: ۱۔ صلیبوں کا شہر (شاعری) ۲۔ نئی بہار نئے بھول (اُردو نظمیں)

۳۔ امن کے گیت (انتخاب) ۴۔ رشحات ابر (تدوین کلام، ابرار حسنی)

۵۔ بوئے پیر ہن (اُردو مثنوی) ۶۔ پیار کے بھول (اُردو نظمیں بچوں کے لئے)

گوجری: ریرا (گوجری غزل) ۲۔ سا نچھو کھلاڑو

کلام:

غزل: ۱:

پورو ہور ارمان ہوؤ	دل کو فر نقصان ہوؤ
اوہ تے ڈاہڈو سدے تھو	منجھوں ہی نہیں جان ہوؤ
میرو دل تھو ایک پتنگ	ہونو تھو قربان ہوؤ
دیکھ کے بجن کو برتاء	دشمن بھی حیران ہوؤ
مناں مندرو ہیر کے مخلص	اُچو ہور اشمان ہوؤ

غزل ۲:

کس کس درتوں ہو کے پوچھے اُت تاثیر دواواں کی
اس دھرتی پر مٹی پوئے کتنا ایک خداواں گی

اُٹھ کے فر ہوں جانہ سکیو، نوں کو آ کے بیٹھو ہوں
دسوں تینا کے وے لوکا، غم کی گھنیاں چھاواں کی

شہراں کو فرناں نہ لئے جے کدے اکواری توں
لہتی رسمیں دیکھے شخصہ آ کے شان گراواں کی

رگاں وچوں لہو سکا یو، اکھاں وچوں گئی لو
جاتے وقت جوانی ظالم کر گئی جڑی پچھاواں کی

یوسف کھوہ مانھ سٹیو پر بھگیاڑاں نا نہیں دتو کھان
اتنی جے ہمدردی ہوتی مخلص اج بھراواں کی

غزل ۳:

نہ درویشی راس آئی نہ اُٹھکل سکھی شاہی کی
اکھاں کا سٹکول ہیں خالی در در میں اگر اہی کی

جہڑا نا تریا کل کریئے اوہی پلے اسکی گل
کہڑو میری گل کرے ہے خلقت چڑھتی باہی کی

جسکو جتنو بادر ہوئے اتنی اچی اسکی سوچ
نکا جاتک کی ہے خواہش نکی جیہی چاہی کی

تیری پوجا کرنی پئی چنگو دردی آپو توں
اٹی ڈاہی تھمنی پئی لوڑ تھی منا ڈاہی کی

اتھرواں کو سگ میں لایو مخلص دل کی باڑی نا
کیوں نہ غم کو فصل ہو تو بتر مانھ میں راہی کی

غزل ۴:

میں کہو سو وار نہ جا	ندی کے اس پار نہ جا
میری من لے یار نہ جا	گھسن کے بشکار نہ جا
جا کے فر پچھتاوے گو	دل کو کے اعتبار نہ جا
مدہ پچھے ملیو ہے توں	گل کراں دو چار نہ جا
چنگو موسم نہیں یوہ مخلص	لے کے دل بازار نہ جا

ق:

جے احسان مکانو چاہوے تاں اس نا زندگانی دے
جس بوٹا کی چھاں بیٹھو ہے اس بوٹا نا پانی دے
پھٹ جے گھلیا ہیں تاں ان پر لون وی اپنے ہتھیں لا
جت یہ درجا کھٹیا ہیں اُت ہو ر اتنی قُربانی دے

ق:

ہوں ایکلکسر بھار غماں کو چکے کون چکاوے کون
خوشیاں کا تھا سارا سنگی، غم مانھ پچھے بھالے کون
کس کو بند یوان ہے شخصاً ہن تے سا جھٹ گھڑی
کس نا دیکھے اٹھ اٹھ بہوے، انھیں راہیں آوے کون

ق:

میرا ارماناں کا اجڑ چھو گیا دل کا جنگل مانھ
دھند غباری، سینہ کو خورو، اُپروں بارش سادون کی
اپنی قسمت مانھ تھو رُلو رُلیو جگ کا پیراں مانھ
کون سرہانے رکھتو مخلص رسی تھو ہوں داون کی

ق:

زمانو تے تھو میرو ازلاں تیں پیری
توں کس گل کا گن گن کے بدلا مکاوے
خفا نہیں طبیعت ہی ایسی ہے مخلص
مزا مانھ ہوئے تے بڑیں گل سناوے

متفرق شعر:

بھاند آئی تے دل کا اک اک پھٹ نا لگا سوسو پھل
سریاں پھلن تک ڈوگی مانھ باندے ہر اسہاڑ رہو
نہ درویشی راس آئی نہ اٹھکل سکھی شاہی کی
اکھاں کا کشکول ہیں خالی درد میں اگر ہی کی

اُٹھ کے مِلوں تھوتے کہیں تھا اپنا کم ناکرے سلام
 اُٹھن کی نہیں ساہی رہی تے سارا کہیں مغرور ہے یوہ
 کے کے اپنی اوچر دسوں کے کے دسوں اپنا غم
 رنگورنگ ہیں قضا میرا، میرا روگ ہیں گوناگون
 کیوں مخلص جھلپو ہوو ہے، کیوں پلا لیرو لیر کیا
 ویہ پلا پکڑیں گل پکھیں، ہوں پلا کھسوں کے دسوں
 اینویں توں دل رکھے میرو دل نا ہووے دل کی بھوم
 مٹھیں نچھ آجاتیں منا لگتیں میریں ہسیر کدے
 پکاؤ مال اگر ہو تو تے کد مخلص کے ہتھ آتو
 خدایا شکر تیرو عشق بکتو نہیں بزاراں مانھ
 کسے موسم ماں نہیں جاتی رونق میرا باغاں کی
 بھاند آوے تے پھلین بوٹا، غم ماں کھلین میرا شعر،

منا مندرو ہیر کے مخلص اُچو ہور اشمان ہوو
 غم وی آویں رات گزارن دینہ نا ہو جائیں اکواک

طرب احمد صدیقی

☆ تعارف: رانا فضل حسین راجوروی

”اتکو اصلی ناں پروفیسر محمد امین ہے، قلمی ناں طرب احمد صدیقی ہے تے حال ہی مانھ ڈگری کالج جہلم تیں ریٹائر ہو یا ہیں۔ ویہ کھٹانہ گوجر ہیں تے علاقہ کالا گجراں کا قدیمی باسی ہیں۔ پہلاں تیں میاں لکھیا جائیں۔ اردو پنجابی تے گوجری کا سوہنا شاعر ہیں۔“

پیش ہیں انکا گوجری کلام کا نمونہ:

غزل ۱:

رات وے تے نیندر کس نا آئے رے	یاد بجن کی دل نا چو بھالائے رے
دنیا کے کے بھل بھلیکھا پائے رے	جے اک نگھتی نظروی اس نا دیکھ لیوں
جنڈڑی بھادیں پل پل سنگ بٹائے رے	دل تیں نقش محبت آلا نہیں مٹتا
دھرتی سہنی ہاروں بچے کھائے رے	اپنا تمیاں اپنے ڈھڈیں پالیارے
اکھ کی پھڑکن کائے گل جتائے رے	دل ڈبے رے اج طرب جی خیر نہیں

غزل ۲:

میں اکھر کو روپ بنا یو مسیں مسیں	ڈکھ اندر کو آکھ سنا یو مسیں مسیں
ڈکھ سکھ پھولن کو بل آ یو مسیں مسیں	بہتی چپ وی اپنو جسو لو ہے رے
ڑتیں رتو بھل کھڑا یو مسیں مسیں	دل کو چانن چھتا مچ اندھیرا ماں
ہم نے دل کو شہر بسا یو مسیں مسیں	سدھر سفنا آس پیاس کے نال طرب

صابر مرزا

پیدائش: 5 مئی 1947ء بہرہوٹ راجوری

ڈاکٹر صابر مرزا اُردو، گوجری تے پہاڑی کا شاعر تے ادیب ہیں تے اچکل ریاستی کلچرل اکیڈمی مانھ کلچرل آفیسر کے طور زبان تے قوم کی خدمت کریں۔

صابر حسین مرزا ۱۹۴۷ء مانھ بہرہوٹ راجوری مانھ پیدا ہويا۔ بُنیادی تعلیم اے حاصل کی تے محکمہ تعلیم مانھ اُستاد کے طور ملازمت شروع کر لئی۔ بعد مانھ جموں یونیورسٹی تیں پرائیویٹ، اُردو مانھ ایم اے کی ڈگری لئی تے ریاستی کلچرل اکیڈمی مانھ کلچرل آفیسر کی حیثیت مانھ پسند آ گیا۔ چت ویہاج توڑی یاہ ذمے داری بڑی ٹھوٹی نال نبھائیں لگاوا۔

صابر مرزا ہوراں نالکھا پڑھی کی شوق پہلاں توں تھی۔ اُردو، پہاڑی تے گوجری زبان مانھ شاعری کریں اور سؤنی شاعری کریں۔ اُن کی گوجری شاعری مجلساں، مشاعرے تے کانفرنساں تے علاوہ کلچرل اکیڈمی کا شیرازہ گوجری مانھ وی چھاپے چڑھتی رہی ہے تے اُن کی کجھ اک غزل تے گیت ریڈیو کشمیر تیں وی اکثر نشر ہوتا رہیں۔ صابر مرزا نے سماجی میرتیر تیں اُپر اُتھ کے، جس زبان مانھ سوچو اُسے مانھ اظہار کیو۔ تخلیق کا اس قدر ترقی طریقہ واسطے ویہ مبارکباد کا مستحق ہیں۔

صابر مرزا ہوراں نے ملازمت کے دوران ہی جموں یونیورسٹی تیں ریاست کی علاقائی زبانوں کا موضوع پر ڈاکٹریٹ کی ڈگری وی لئی ہے جس مانھ گوجری وی شامل ہے۔ اُن کی یاہ تحقیق جلدی ہی کتابی صورت مانھ آن آلی ہے۔ اُنھاں نے کئی ہور تحقیقی مقالا وی لکھیا ہیں پرویہ بُنیادی طور پر شاعر ہیں۔

اُمید کراں جے کئی سالوں کی گوجری شاعری نا اکٹھا کر کے ویہ جلدی کتابی شکل دیں
گاتانجے نواں تے عام لکھن پڑھن تے تحقیق کرن آلا ڈاکٹر صابر مرزا کی سوچ، لہجہ، اظہار
تے خلوص تیں واقف ہو سکیں۔

غزل ۱

سکو بوٹو ڈھٹھا پتر سنگی نالو نال گیو
روئیں مُر مُر بھور بچارا اگ ہجر کی بال گیا

دل ڈکھڑا نا مُر مُر سدے درد بلاویں درداں نا
اکھ نمائی ڈوپلے اتھروں، ہستاں روتاں سال گیو

تسیا شنگر، رویا پکھروں، برف کا بیڑا ہسیا فیر
بھل بھلیکھاں کو یوہ بیلو، کس کے نالو نال گیو

رنگ ہیں سارا کچا پکا، سوچ سمجھ کے چنپے توں
ہیرا موتی سنگ جواہر مہنگو مہنگو لال گیو

ہتھ پیراں نا بھانبر دسوں، نالے جاؤں کت
جس کا گھر کی آس تھی صابر آخر وہ بھی نال گیو

غزل ۲:

آئی رت رگیلی مُر کے ڈالی ڈالی بھور گیو
میریں پکھیں کولے رہیں، چن پردیسی دُور گیو

بکتا اتھروں ساڑو دل کو اُس نا کیتنا پیارا تھا
سارا ہس ہس دیکھن لگا، سولی چڑھ منصور گیو

پتھر گیا چُن چُن رکھیا، درداں کی اگ بال چھوڑی
بہڑو بہڑو خالی دسے، پیار میرو مجبور گیو

نیلی رت ماھ، سُکا پتھر رنگ نمانا جھونس گیا
پیار وفا نا ڈھونڈے کوئے کد کو وہ دستور گیو

غزل: ۳

وہ جد فر دلگیر کرے گو دل نا لیرو لیر کرے گو
میری ہر تحریر نا ہتھیں پاڑ کے چیرو چیر کرے گو
منن آلا دل تیں منیں پتھر نا کے نیر کرے گو
خواب رتاں کا ساڑ کے سارا موسم بے جا گیر کرے گو
لکھیو جھولی پے گو صابر اج کے منت فقیر کرے گو

غزل: ۴

رت جھلیں بوئیں بیہنگ پیئیں دینہ چن ہلاریں کس کس نا
ہر یاد مراد کی آس دسے توں بول بساراں کس کس نا

چو مکھی پھل گلاباں کا، چو کھنیں لٹک ہیں شیشاں کیں
اس پتھر دل کا داراں سنگ توں دسپے ماراں کس کس نا

سب طوطا مینا چوگ چکلیں، اج گھنگی بولیں مٹھوا گیت
آساں کی بستی باساں تیں ہن دور اڈاراں کس کس نا

خوشیاں کی آس مانھ ہر کوئے چند جان گمان تیں تلیو ہے
پر غم کا گھمن گھیراں تیں دس پار اتاراں کس کس نا

تھی صابر جن کی آس منا ویہ رانجھن ماہی مڑ چلیا
ان ماہلیں تلاں بیلاں مانھ، دس ہور سنگھاراں کس کس نا

غزل: ۵

کھل اکھاں مانھ نیر نہ رکھیے	کنڈاں نا دلگیر نہ رکھیے
جس تیں متھو میلو ہووے	دل مانھ واہ تصویر نہ رکھیے
دیکھ کے اکھ دکھ جھاکھیں جس تیں	ایسی کائے تحریر نہ رکھیے
تس بچھا کے سپ فر ڈنگیں	تھال مانھ گھل کے کھیر نہ رکھیے
قتل تیرے سر صابر لگے	اکھ مانھ ترکھا تیر نہ رکھیے

نذیر حسین فدا

پیدائش: ۲۳ اگست ۱۹۴۷ء سانج راجوری

نذیر حسین فدا گوجری کا سوہناتے سنجیدہ شاعر ہیں۔ ویہ سانج راجوری کا رہن آلا ہیں، جت اُن کی پیدائش ۱۳ اگست ۱۹۴۷ء نا ہوئی۔ بڑی تعلیم توں بعد محکمہ ایگری کلچر مانھ ملازم ہو گیا۔

ریڈیو کشمیر تے ریاستی کلچرل اکیڈمی مانھ گوجری شعبہ کھلن تیں بعد گوجری کی لکھا پڑھی شروع کی۔ مشاعراں تے کانفرنساں مانھ خلوص تے باقاعدگی نال شامل ہوتا رہیا ہیں۔ اُن کی شاعری مانھ وی درد، خلوص تے ٹھیکہ گوجرا لفظ اس اٹھکل نال پرویاوا ہیں جے خدا بخش زار مرحوم تیں بعد خالص لہجہ مانھ اسی شاعری ہو رکوئے نہیں کر سکیو۔

نذیر حسین فدا نے گوجری ادب نا کجھ مچ سوئی غزل وٹی ہیں پر زیادہ توجہ سی حرفی آلے پاسے رکھی ہے۔ اُنھاں نے حولیاتے طبیعت ہاروں شاعری مانھ وی ذرا بناوٹ نہیں آن وٹی۔ لکھتاں مانھ وی محلی ٹور رکھی ہے۔ پر جو کجھ گوجری ادب کے حوالے کیو ہے وہ صاف ستھر و تے چھٹیوا چھیر یو و ہے۔

ان کو کلام باقاعدگی نال شیرازہ گوجری مانھ شائع ہون تیں علاوہ ریڈیو کشمیر تیں وی اکثر نشر ہو تو رہے۔ اللہ کرے جے اُن کی خوب صورت شاعری جلدی کتابی صورت مانھ شائع ہو کے گوجری کا قدرداناں توڑی پوچھے۔

کلام:

غزل:

ویہ درد خزاں کا کے جائیں ہیں مالک مست بہاراں کا
مٹھلاں کی جھوہلی پلپلا ہیں کد چوبھا لگا خاراں کا

کیوں اک گھسیریں دبی وی یاہ دل میرا مانھ صدیاں تیں
مت ہتھ سڑ بل جائیں لُو ہے جائیں جے لگا تے انگاراں کا

اک کیمہ ہمنشاں رہے بھکھتو، نت اندرو اندر ہر نیلے
دن دھکھتا دھکھتا گزر جائیں، کولے پیش نہیں حیلان چاراں کا

نہیں پڑ کسے کے ہتھ آئی، سچ اوہل ہے ڈنگا درداں کی
یوں کسر کسے نے نہیں چھوڑی، احسان کرم ہیں ساراں کا

نذیرؔ بچر کا پھٹاں کی بے قدر زمانو کے جانے
ان زخماں تا کد انگ آویں، اُن بے درداں کی ماراں کا

کے، ڈی، مینی

پیدائش: پہلی اکتوبر 1947ء گنڈی، سرنکوٹ۔ پونچھ

موجودہ ادبی دنیا مانھ کے ڈی مینی اک معتبر نام ہے۔ ویہ اُردو، گوجری، پنجابی تے پہاڑی کاسوہنا شاعر تے ادیب ہون تیں علاوہ تاریخ دان وی ہیں۔ خوش دیو اکتوبر ۱۹۴۷ مانھ سرنکوٹ پونچھ کاسوہنا گنڈی گراں مانھ پیدا ہويا۔ آپ گھروں بل تھا پر ماحول مانھ غریبی، بے کسی تے افراتفری انھاں نے اپنی اکھیں دیکھی جس کی جھلک انھاں کا ادبی کارناماں مانھ باندے دے۔

بُیا دی تعلیم کے دوران ہی خوشدیو مینی ہوراں نادب کا مطالعہ کو موقع ملیو تے کرشن چندر، ٹھاکر پونچھی تے منشی پریم چند نے انھاں کی سوچ متاثر کی۔ ریاضی مانھ ایم اے کرن تیں بعد وہ ریاستی محکمہ منصوبہ بندی مانھ ملازم ہو گیا جت ویہ اجکل ڈپٹی ڈائریکٹر کی حیثیت نال کم کریں۔ تعلیمی دور تیں ہی انھاں مانھ لکھا پڑھی کوزہ حمان موجود تھو تے اس دوران ویہ کئی علمی ادبی تنظیمیں کارکن وی رہیا ہیں۔ پر تاریخ تے تحقیق ہمیشاں توں انھاں کالائڈا موضوع رہیا ہیں۔

خوشدیو اُردو تے پنجابی کا بہت سوہنا لکھاڑی ہیں اسویلے توڑی دس یاراں کتاب لکھی ہیں جن مانھ پونچھ تے راجوری کی مکمل تاریخ تے علاوہ ’رمزاں‘ (پنجابی انشائیہ) تے ’چاند کے ساتھ ساتھ‘ (اُردو شاعری) شامل ہیں۔

۱۹۷۵ کے قریب جدید گوجری کی چڑھت مانھ ویہہ بڑا جوش جذبہ تے خلوص نال شامل ہويا تے ریڈیو کشمیر تے کلچرل اکیڈمی کی گوجری مجلساں مانھ باقاعدگی نال آتا رہیا۔ کچھ

عرصہ گوجری زبان و ادب کی انجمن کاسکرپیٹیوی رہیا۔ گوجری ادب تے تاریخ تیں متعلق گج سارا تحقیقی مضمون لکھیا جہڑا گوجری رسالاں تے کتاباں مانھ شائع ہوتا رہیا ہیں۔ انھان نے ”رجی“ سمیت گج ہی شاندار تے جاندار گوجری کہانیں وی لکھی ہیں۔ تے شاعری آلے پاسی قلم کی مہارموڑ کے خوب صورت گوجری غزل وی لکھی ہیں۔

کے ڈی مینی ہورا جکل پیر پنجال کا پہاڑی تے گوجری قبیلاں توں متعلق تحقیقی کم مانھ لگاواہیں تے نال ہی ٹی وی تے ریڈیو واسطے سلسلہ وار لکھیں جن مانھ پیر پنجال کو مشترکہ کلچران کومن پسند موضوع ہے۔ اللہ انکا قلم مانھ ہور طاقت تے برکت دے تے انھان نا گوجری زبان تے ادب کی ہور خدمت کرن کی توفیق دے تا نچے انھان نال محبت کرن آلاں کی تسلی ہو سکے جہڑا اچھا ان کی گوجری کتاب کو منہ دیکھن کا ڈیکوان ہیں۔ گوجری کلام:

غزل ۱

اس برہیا جد کوئے گیت سناوے گو	یاد تیری کی برچھی سینے لاوے گو
رات اڈیکے گی گھلاں مانھ لوڑے گی	شنگراں پرچن اپنی چادر ڈاہوے گو
جہڑو چھوڑ گیو اکواری کد ملیو	پر بنجارو بہڑے بہڑے گاوے گو
سینہ اندر جہڑو ہر دم ساڑ کرے	اتھروں بن کے آخر بانڈے آوے گو
رتیں رتیں کھنڈی وی ہے آس تیری	کے جانو تھو اس راہ وی ترساوے گو
ہم سارا کھڈیا لالاں ہاروں ٹٹاں گا	کہڑو اس بستی توں سالم جاوے گو

غزل ۲:

ڈنگ بچائیے زہر تیں ڈریئے	سپاں کا اس شہر تیں ڈریئے
اچھل یوٹا کم آویں گا	بیلا کی دوپہر تیں ڈریئے
دھرتی بچوں رت دھر سے	تیراں ربی قہر تیں ڈریئے

لا را پر نہ گھول گھمائیے
دل ٹھگنا بے مہر تیں ڈریئے
باندے باچھڑ گجھ نہیں ہوسیں
چُپ چپیتا بیر تیں ڈریئے

غزل: ۳

رہ ہر دم تیری منگ اڑیئے
یا داں کی گھمن گھیری مانھ
ہوں ہور کو لے دل ہور کو لے
در چھٹیو تاں در در پھریو
کے لکھوں یہ ان چھوہ جذبا
دل چاہوے تیرو سنگ اڑیئے
حالیں وی چھنکیں بنگ اڑیئے
دوہاں کے اندر جنگ اڑیئے
بن جوگی پیر ملنگ اڑیئے
سوچاں ور جمیو زنگ اڑیئے

غزل: ۴

اتھروں بن کے ڈلکے گی تڑاؤے گی
باج تیرے تیں کس راکس راہیہ ہے
برہیا کی پھلکاری آخر سرنو ہے
بھڑک گیو ہے جہڑو میرا سینہ مانھ
نہیں ملسیں رسیو وونگی نہیں ملسیں
آس نمانی شام ہوتاں مُڑاؤے گی
بستی بستی میرو حال سناؤے گی
کوئل بھادیں گو کے گی کرلاؤے گی
اُس بھانہڑنا کہڑی کا نگ بھادے گی
لکھ لکھ واری بھادیں گھول گھماؤے گی

غزل: ۵

آساں کی یاہ ٹھنڈی ٹھنڈی چھاں اڑیئے
نہیں لکتو روح بستی مانھ بازاراں مانھ
گنتاں ویلے بنگاں کا چھنکاٹا تھا
کے ہو یو جے چاڑھ لئی کھیاڑی تیں
رات انھیری گھمن گھیری بھالے رے
میرے اندر ہر دم تیرو ناں اڑیئے
تڑفے چھڑکے ہد کے میری جاں اڑیئے
نہیں بھری واہ دلیں اپنا کی باں اڑیئے
بنے دل دریا نا منوں تاں اڑیئے
یاد سمندر مانھ ہم ڈالو کھاں اڑیئے

غزل: ۶:

اک جھلکارو لاکے کہڑی تھار گیو
 خورے سورج بن کے توں ہی چمکے تھو
 بیڑ کر کے راتیں جاگوں تڑفوں میں
 بڑا تازو وی اس کندے ڈُپیا ہیں
 اک ذری نہ ہوٹھاں نے برلاپ کیو
 جس ویلے وی تھارے مُنہ رو بکار گیو

غزل: ۷:

باس تیرا جُسا کی میرا سا ہواں اندر
 رات انھیری واقف کار نے دھوکھولا یو
 عشق ملاوے رب نافر بھی خورے کیوں
 یاس کا اتھروں ڈلکس نین نشیلاں تیں
 منزل آخر پیر نا چھے چٹے گی
 توں بیٹھو ہے دل گیاں درگا ہواں اندر
 گھل مکھو ڈا بو کھاؤں راہواں اندر
 گنیو جائے یوہ وی نچھ گنا ہواں اندر
 آس کو بھانڈو سکھنو دل دریاواں اندر
 چلتو رہے گو جیکر تیز ہواواں اندر

غزل: ۸:

شام ہوتاں ہی یاد کا بھانڈو بالاں گا
 منزل آخر پیر نا چھے چٹے گی
 کوسا کوسا ڈم ہجر کا کھا کے وی
 نہیں ملنو گمیو وو موتی نہیں ملنو
 ہُن بستی تیں رات نا مار مکانو ہے
 یُپا یُپا اپنا آپ نا بالاں گا
 جیکر دھپ کا جھف نا کند پر جھالاں گا
 کُولی کُولی آس جگر ماں پالاں گا
 ایک سمندر بھاویں روز کھنگالاں گا
 ہن سورج نا اپنا سر پر بالاں گا

پروفیسر یوسف حسن

☆ تعارف: رانا فضل حسین راجوروی

”پروفیسر یوسف حسن ہورلون کشمیری ہیں۔ کوئی دو سو سال پہلاں انکا بڈا کاسے بڑا ڈا ہڈا کال کے سے بارہ مو لے کشمیر تیں اُجڑ کے پنجاب پاکستان آ گیا، ہجرت کے سے تھائی کھائی پھرتا کالا گجراں جہلم آ بسیا۔ ات اپنو گھر بنا ليو۔ ایم اے اُردو ہیں۔ گورنمنٹ اصغر مال کالج راولپنڈی مانھ پڑھاویں۔“

بنیادی طور پر ویہ تھند استھرا کھرا شاعر ہیں۔ اردو پنجابی تے گوجری مانھ سو ہنا شعر کہیں۔ اک مجموعہ کو کلام گوجری زبان مانھ ہے۔ تے گوجری پراک تحقیقی مسودوی تیار ہے جس مانھ مھارا قدیم گوجری شاعر حضرت بابا فرید الدین شکر گنج تیں اُراں کوئی پنجاہ قدیم گوجری شاعراں پر مچ ہی سوئی پرکھ پڑتاں ہے۔ اپنوار دو کلام اجاں نہیں چھاپ سکیا تے نہ پنجابی شاعری کو مسودو چھاپ سکیا۔ اردو تے گوجری مانھ متا سارا تنقیدی مضمون تے مقالوی لکھیا ہیں، تے یوہ سلسلو جاری ہے۔“ گوجری کلام کا نمونا:

غزل:

چيون کيکن جريو ميں	ريت سمندر تريو ميں
پھٹ لگا تھا دھرتی نا	لہو رو کے مريو ميں
توں تے ميرے کولے تھو	فر کيوں ہو کو بھريو ميں
نوری ناری جو وی تھو	دھوؤں پھک پھک مريو ميں
يوسف انھاں گلياں ما	چانن سفنو دھريو ميں

احمد شناس

پیدائش: 1951ء شاہدرہ شریف راجوری

ریاستی ادبی دنیا مانہ احمد شناس اک معتبر ناں منیو جائے، ویسے ۱۹۵۱ء مانہ راجوری کا گراں شاہدرہ شریف مانہ اک گوری خاندان مانہ پیدا ہویا۔ بنیادی تعلیم تھہ منڈی تے راجوری مانہ حاصل کر کے فرڈگری کالج پونچھ تیں بی اے تے جموں یونیورسٹی تیں ایل ایل بی کی ڈگری حاصل کی۔ انہاں نے ۱۹۸۴ء مانہ ریاست کو کے اے ایس امتحان پاس کر کے سیکریٹریٹ مانہ ملازمت شروع کر لئی تے اس دوران کئی اہم عہداں پر کم کیو۔ سروس سلیکشن بورڈ کا ممبر تے گورنر مشاورتی بورڈ کا سیکریٹری رہن تیں بعد اجل راجوری مانہ ایڈیشنل ڈپٹی کمشنر کی حیثیت نال ذمہ داری نبھادیں لگاوا۔

۱۹۸۰ء کے قریب ریاست مانہ گجری کی نویں چڑھت کے نال انہاں نے وی گجری مانہ طبع آزمائی شروع کی پر زیادہ دلچسپی اردو آلے پاسے ہی رہی جت انہاں نے اپنو اک نمیکلو مقام پیدا کر ليو ہے۔ انگی اردو شاعری کی کتاب جلدی ہی شائع ہون آلی ہے۔ گجری مانہ انہاں نے گھٹ مگر معیاری شاعری کی ہے:

ع:

اج تک چھپا کے رکھیا تھا جس نے گھراں کا راز
رشتاں کی واہ قمیض وی ہن لیر لیر تھی

غزل

ویہ حور پریاں کا دلیں جیسی خیالی بستیں
بسائیں ہم نے وی کیسی کیسی خیالی بستیں

ویہ جن کا بار ماں گیت لکھیا تھا شاعراں نے
کدے کتاباں ماں دب گئیں وہنجیالی بستیں

سوائے واویلا شور کے ہور کچھ نہیں لہتو
یہ شہر نگراں ماں آ بسیں کیسی خالی بستیں

مکان دولت کا بے بہا حسن کا نمونا
یہ انکے اندر عجیب نادار کالی بستیں

یہ لوک اپنا وجود توں مچھڑیا وا سایا
سفر کے دوران لٹ گئیں یہ سوالی بستیں

منیر حسین چوہدری

☆ تعارف: رانا فضل حسین راجوروی

”منیر حسین چوہدری میرا سکا بڑا بھائی احمد مصری مرحوم کا فرزند ہیں، میری اکا ہی بیٹی ثریا جبین ہے واہ اسے کے گھر ہے۔ منیر صاحب لاہور یونیورسٹی تیس بی اے، ایل ایل بی ہیں۔ چار بیچ سال میر پور ماٹھ وکالت کی فرپبلک سروس کمیشن کا مقابلہ کا امتحان ماٹھ کامیاب ہو کے ایس ڈی ایم تعینات ہوا۔ اپنی لیاقت تے دیانت داری کے سبب جلدی ڈپٹی کمشنر ہو گیا۔ آج کل بیہواں گریڈ ماٹھ کمشنر امور منگلہ ڈیم ہیں۔“

گوجری ماٹھ مد، نعت، مرثیہ، غزل، نظم تے گیت بہت ہی سؤنی سٹھری کہیں۔ گوجری ڈراموں لہو کی خوشبو وکالت کے سسے لکھی تھو جہڑ و شیرازہ گوجری ماٹھ شائع ہوؤ۔ گیت کہانی تے مچ سار لہو لکھی جہڑا تراز کھل ریڈیو تیں اکثر نشر ہوتا رہیں۔ ملازم ہون تیں بعد مصروف ہو گیا تے فر کچھ نہ لکھ سکیا۔ انکی شاعری کو مجموعہ ’سناٹھ‘ کے نامے طبع ہون آلو ہے جس میں میرا بڑا بھائی چوہدری امیر حسین شہید کا سپوت تے گوجری شاعر چوہدری شاہ محمد شاہباز ہوراں کی گوجری شاعری وی شامل ہوئے گی۔“

کلام کا نمونا:

غزل ۱:

یاداں کا دلِ دل دیا تمکین آساں کا دلِ سُننا
سُنکیاں کا کچھ گیت پرانا یاراں کا کچھ سُننا

چارے کونٹ اندھیر پھریا رُٹھا راہ نہیں دستا
اپنا ہاڑا کون سنے گو کون سنے گو دُکھنا

چڑھیا ہڑھ سیلاب ماں سٹ کے آپے ہو یا کنارے
ہن کیوں رُڑھتو دیکھ کے نم ہیں تھارا نین سلکھنا

ہوں بے دوس نما نو فر وی تم نا دوس نہیں دیسوں
ہتھیں دتیں دندیں کھولوں دُکھڑا دسوں کس نا

بند زبان ہوئی ہن گنگئی بند منیر کا ہاڑا
ہوٹھیں چاڑھیو چُپ کو چندرو گُوڑ کریں ات سچ نا

غزل ۲:

جاگ اکھاں بچ رات گذاری	تارا لے گیا نیند ادھاری
چن کا چانن کی آساں ماں	بیت چلی کائے رُت بہاری
مٹھیاں مٹھیاں خاباں کے بچ	من اندر کائے صورت پیاری
دل کا کھوہ ماں درد چھپایو	فر دی جانے دنیا ساری
مرن تے جین منیر بروبر	اس کے صدقے زندگی ہاری

محمد امین بانہالی

پیدائش: 18 مئی 1953ء بانہال

امین بانہالی اُردو، ڈوگری تے گوجری کا معتبر شاعر ہیں۔ وہ ۱۹۵۳ء میں بانہال ماں پیدا ہويا۔ اُنکا بزرگ پہلاں جموں کا سچواں گراں کارہن آلا تھا پر ۱۹۴۷ء توں بعد وہ بانہال چلے گیا جت امین ہوراں کی پیدائش ہوئی۔ ۱۹۸۰ء میں والد صاحب کی وفات تیں بعد وہ اپنا دو جا بھائییاں سمیت واپس جموں آ گیا تے اج تک اتے مقیم ہیں۔ امین بانہالی ہوراں نے میٹرک تک کی بنیادی تعلیم بانہال مانہ ہی حاصل کی تے فر ۱۹۷۹ء میں بھڑ بکریاں کا سرکاری محکمہ مانہ ملازم ہو گیا تے ا جکل نوکری کا سلسلہ مانہ جموں ہی تعینات ہیں۔

ادبی دُنیا مانہ امین بانہالی نے سب تیں پہلاں اُردو مانہ شاعری شروع کی تے فر ڈوگری تے گوجری لکھنی شروع کی۔ ۱۹۹۰ء کے قریب گوجری ادب مانہ آن تیں بعد وہ ہر مجلس مانہ وی باقاعدگی نال شامل ہوتا رہیا ہیں۔ اُن کی گوجری شاعری شیرازہ گوجری مانہ شائع ہون تیں علاوہ ریڈیو کشمیر تے دوردرشن تیں وی نشر ہوتی رہی ہے۔ گوجری شاعری مانہ امین بانہالی ہوراں نے غزل کو میدان پسند کیو ہے تے گوجری ادب کی جھولی مانہ کچھ کچھ ہی سؤنی تے معیاری غزل باہی ہیں۔

۔ اپنی کمزوریاں ناگن بے شک خوبیاں گوگر حساب نہ کر

ق:

نہ رستو ملے گو نہ منزل گھٹے گی ہے تقدیر میری سفر زندگی بھر
میرو گب نہ دیکھو میری چال دیکھو نہ کر پایو سدھی کمر زندگی بھر

ق:

مر کے جیتو رہو جی کے مرتو رہو
اپنی کرنی تے بھرنی تھی سجا مگر
ہوں تیرا غم مانھ کے کجھ نہیں کرتو رہو
ہوں تیری کرنیاں ناوی بھرتو رہو

غزل: ۱

چار دناں کو حُسن جوانی
سب تیں سوہنا سب تیں پیاری
یوہ وی فانی واہ وی فانی
اکھ کا اتھروں یاد پُرانی
سب غزلاں مانھ میرو قصو
سب نظماں مانھ تیری کہانی
دُشمن ہو یو جان کو دل کو
جس نا کہوں تھو ہوں دل جانی
ہر انسان امین مسافر
ہر شے ات کی آنی جانی

غزل: ۲

ان کا دھوکھا مہارا دھوکھا
جھانسا مانھ نہ آئیے بالکل
اک دو جا توں پیارا دھوکھا
جھوٹی نظر نظارا دھوکھا
ان تیں چٹکیں مہاریں گلے
اچا محل منارا دھوکھا
کامل ذات خدا کی بندیا
سورج چن تے تارا دھوکھا
ہن کوئے رانجھو ہونہیں سکتو
اج کا تحت ہزارا دھوکھا

غزل: ۳

مہاری خاطر کال برابر
سارا چنگا ہم ہی ماڑا
باقی سب خوشحال برابر
گھر کی کگڑی دال برابر
وہی چہرا وہی لیرا
بدلیو نہیں کجھ بال برابر
میرا شعر تے ہونہیں سکتا
غالب یا اقبال برابر
ساتھ امین اگر نہیں دیتو
فر وی تھارے نال برابر

غلام سرور چوہان

پیدائش: 1955 کالابن مہنڈر پونچھ

چودھری سرور چوہان ۱۹۵۵ء ماٹھ پونچھ مہنڈر کا گراں کالابن ماں پیدا ہويا۔
بنيادی تعليم مہنڈرتیں حاصل کی تے فر ڈگری کالج پونچھ تیں بی اے کی ڈگری لئی۔ جموں
یونیورسٹی تیں سیاسیات تے اُردو ماں ایم کر کے وی انکی علمی تہس پوری نہیں ہوئی تے انھاں
نے اپنی تعلیمی سلسلو جاری رکھتاں قانون کی ڈگری (ایل، ایل، بی) وی حاصل کی۔ اسے
طرح انھاں نے محکمہ، تعلیم، صحافت تے وکالت کی رسیں توڑی تے آخر ۱۹۸۴ ماٹھ ریاستی سرکار
کو کے اے ایس کو امتحان پاس کیو تے ۱۹۹۲ء ماٹھ محکمہ پولیس ماٹھ ایسا قدم رکھیا کہ ہن کسے
نواں تجربا کی گل وی نہیں سوچ سکتا۔ بھاویں ہن ویہ ترقی کرتا کرتا ایس ایس پی بن گیا ہیں پر
یہ بیڑیں انھاں کے اندر کا قلم کارنا جکڑ نہیں سکلیں۔

انھاں کی ادبی سرگرمی یونیورسٹی ماں تعلیم کے دوران شروع ہوئیں۔ اتفاق کی گل
ہے جے اُسے دور ماٹھ کلچرل اکیڈمی ماں گوجری شعبو وی کھلو تھو۔ شروعات شاعری تیں کی تے
بعد ماٹھ افسانہ انشائیہ تے ڈراما وی لکھیا جہڑا گوجری شیرازاں ماں شائع ہون تیں علاوہ ریڈیو
کشمیر جموں تیں وی نشر ہوتا رہیا ہیں۔ کجھ دیر تک انھاں نے جموں تیں وادی گلنار شائع کر
کے صحافت کی شروعات وی کی پر سیمابی طبیعت نے یوہ سلسلو زیادہ دیر تک نہ چلن و تو۔
گوجری کی ادبی مجلساں ماں ویہہ مصروفیات کے باوجود باقاعدگی نال شامل ہوتا
رہیا ہیں تے اس سفر ماں انھاں نے کجھ سوئی تے مٹھی یاد ادبی کارواں کے حوالے کی ہیں۔
یکی بحر ماں ویہ سوئی غزل لکھتا آیا ہیں تے ۲۰۰۰ء ماں شائع ہون آلی انکی شاعری کی کتاب

نمین کٹوراوی ادبی حلقاں ماں پسند کی گئی ہے۔ اگلے ہی سال انہاں نے اپنی پسند کی گوجری شاعری وی شائع کی تے فر سال ۲۰۰۳ء ماںھ انکی نثری کتاب کھولنا سکا وی شائع ہوئی جس ماں انکی کہانیاں، انشائیہ تے ڈراما شامل ہیں۔ انکو یوہ ادبی سفر جاری ہے تے انکی تحریر کا کجھ نمونا تبصرہ تیں بغیر حاضر ہیں تا نچے پڑھن آلا انکا فن کواندازو تے سواد آپ لاسکیں۔ کلام:

غزل ۱:

آپے بول پیا اتھروں	بھیت کھول گیا اتھروں
یہ اتھروں نما ناں ہیں	چند رول گیا اتھروں
اتھروں نہیں موتی ہیں	انمول گیا اتھروں
اتھروں تیری یاداں کا	گول گول گیا اتھروں
جھوا نہیں ڈلیا آپے	غم گھول گیا اتھروں

غزل ۲:

خیالاں کی بستی ماں آ بلیں بلیں	میری جان مناں ستا بلیں بلیں
محبت کی پہلیں ادا بلیں بلیں	اک واری مُرد فر دکھا بلیں بلیں
یہ بل کھاتی ندیں مچلتا وا دریا	زلفاں کی چوٹی بنا بلیں بلیں
اجاں لچ آوے اجاں شرم آوے	ہو جاں گا ہم آشنا بلیں بلیں
چن کے کرے گو تیرا حُسن اگے	متھتا تیں جھنڈ نا ہٹا بلیں بلیں

غزل ۳:

سوخی رُت بہار نا تر سے	میرو دل وی یار نا تر سے
ایکلاں چینو اوکھو دے	نچھودی کونج اڈار نا تر سے
کوہ طور نا مُرد مُرد دیکھے	عاشق یوں دیدار نا تر سے
دُنیا کی تصویر کو رنگ ہے	بوہٹی ہار سِنگار نا تر سے

سینے لاؤن مر مر جاؤں
ہوں بھی ترسوں حبیب اُسے نا

بجن ہتر یار نا تر سے
جسراہ گل گلزار نا تر سے

غزل ۴:

ہوں کئی بھلیکھا کھا بیٹھو
میں چاہو اک بنا پو تھو
یاہ کہڑی فصل جی ہے
میں امن کی گل کہی تھی
لوک ڈھونڈیں بچ سمندراں کے

گل اپنے لا کے پھاہ بیٹھو
جہڑو آپے ہی ہوں ڈھا بیٹھو
یوہ کہڑو بیچ ہوں راہ بیٹھو
توں ایٹم بم بنا بیٹھو
ٹوں ہتھیں لعل کھڑا بیٹھو

غزل ۵:

نہیں مر یو شیطان میرے اندر گو
کت کت کتیں لاٹ تیرا لشکاراگی
گجھ ہاڑا گجھ ساڑا تیری یاداں گا
کے پی نظر چھوہاتی اُس پاسے
اک لحظہ ماں گنجی حوالے چوراں گے
کیوں سوالیں سستی دی حیاتی نا
کر کر انکی صفت لوکاں ماں حبیب

کے ہو یو انسان میرے اندر گو
بُت ہو یو انسان میرے اندر گو
یوہی تھو سامان میرے اندر گو
دل ہو یو بے ایمان میرے اندر گو
کر گیو نادان میرے اندر گو
جاگے گو انسان میرے اندر گو
اُچو کیو مان میرے اندر گو

انور حسین انور

پیدائش: 9 دسمبر 1955ء فتح پور راجوری

ریڈیو کشمیر جموں کا گجری شعبہ میں دھوئی دھائی وی گجری اواز انور حسین کی پہچان ہے۔ وہ ۱۹۵۵ء میں راجوری کا گراں فتح پور ڈنہ ماٹھ اک جٹ خاندان ماٹھ پیدا ہوا۔ بیادلی تعلیم میں بعد ریاستی محکمہ تعلیم ماٹھ استاد کے طور ملازم ہو گیا تے مدت توڑی پڑھان کی ذمہ داری کے نال نال اپنی پڑھائی کو سلسلووی جاری رکھیوتے اُردو ماٹھ ایم اے کی ڈگری لئی۔ ۱۹۸۷ء ماٹھ ریڈیو کشمیر جموں کا گجری شعبہ ماٹھ اناؤنسر کی حیثیت نال گیا جت وہیاج توڑی یاہ ذمہ داری بڑی ذمہ داری نال نبھوویں لگاوا۔ گجری زبان تے ادب واسطے ریڈیو کی طرفوں کی جان آلی کوششاں ماٹھ اُن کو بڑو حصو ہے۔

گجری ادب ماٹھ وہیہ ۱۹۹۰ء کے قریب مقالہ نگار کی حیثیت نال داخل ہویا۔ پر بعد ماٹھ غزل کا میدان ماٹھ نوں قدم رکھیو جے غزل ہی اُن کی پہچان بن گئی۔ جدید گجری غزل ماٹھ انور اک معتبر ناں بنتو جائے لگووو۔ اُنکا کلام ماٹھ فنی پکنتیت کے نال نال ایسو خالص گجرو لہجو ہے جس ماٹھ نواں نواں مضمون تے پرانا پرانا گجری محاورا بڑی اٹھکل نال گنیاوا ہونئیں۔ گجری غزل کا حوالہ سنگ نویں صدی نے انور حسین نال بڑی امید لائی ہیں۔ اللہ کرے جے وہیہ باقاعدگی نال لکھتا رہیں تے گجری آلاں کی تس بھاتا رہیں۔ کلام:

غزل ۱

کھلی اکھیں نظر نہیں آتا، خواباں مانھ تڑفادیں لوک
ہور بدھاویں بیتابی نا، ایسو دل پرچاویں لوک

پہلاں اپنی میت بناویں فر دیں داغ جدائی کا
خورے کس تقصیر کو بدلو مہارے نال مکاویں لوک

بھاویں اکھاں کی بولی مانھ اک اک گل سمجھا چھوڑیں
دل کو حال زبانی اپنی، دن تیں شرماویں لوک

یوہ ان کو دستور سہی پر اپنا بس کی بات نہیں
ہم انھاں نا بھل نہیں سکتا ہمنہ لکھ بھلاویں لوک

ڈبن چلی آپ تے دسے ترنو آٹھ گمانڈی نا
اپنی ہوش وی نہیں کر سکتا، ہمنہ کے سمجھاویں لوک

غزل ۲:

بھروسو تک لیو یاراں کی یاری دیکھ لی ہم نے
محبت دوستاں کی بار باری دیکھ لی ہم نے

سماں کے نال بدلن آلیو یارو بدل جاؤ
دھیلاڑا چار تھاری چاریاری دیکھ لی ہم نے

جہاں نے جان وارن کی قسم کھاہدی تھی مہارے تیں
ضرورت پین وراکی عیاری دیکھ لی ہم نے

بڑو ارمان تھو اک دن خوشی کو دور دیکھاں گا
مگر اس آس مانھ ہی عمر ساری دیکھ لی ہم نے

پتو نہیں ہور کے کچھ دیکھو باقی ہے قسمت مانھ
بہتیری زندگی مانھ خواری دیکھ لی ہم نے

غزل ۳:

یاری بھاویں کھیر تے کھنڈ ہے	منہ بھر منہ ہے کنڈ پھر کنڈ ہے
حرص کو پالو کس نے پٹیو	چتا پلا اتنی ٹھنڈ ہے
اپو محرم حال نہیں ملتو	نوں تے یاراں کو ترنڈ ہے
پلو اپو سام کے رکھیے	یاہ دُنیاں پیری کو جنڈھ ہے
خواب ماں دیکھوں ہوں محشر ماں	سر پر پاپاں کی اک پنڈ ہے

غزل ۴: (ڈاکٹر فیض انجم کے ناں)

تیر و خلوص دیکھ کے دل نا خوشی ملی	کر نہ سکوں بیان مسرت جھڑی ملی
تیر و سلام آجو میرے ناں زہے نصیب	پیار حسرتاں نا نویں زندگی ملی
خوشبو مثال یاد تیری دل مانھ مہک اٹھی	سدھراں کی کونپلاں نا عجب تازگی ملی
تیرا ملن کی خیر تمنا رہی مگر	اے دوست تیرا درد مانھ لذت بڑی ملی
انور نا ہور چاہیے کے اس جہان مانھ	ہوں خوش نصیب ہاں کہ تیری دوستی ملی

ابرار احمد ظفر

پیدائش: 4 جنوری 1956ء ایبٹ آباد وفات: 25 مارچ 1998ء جموں

چوہدری علی محمد گوری علاقہ گول گلاب گڑھ کا ذیلدار، عالم تے سیاسی بصیرت رکھن آلا بزرگ تھا جسماں ناملکی تقسیم کا عذاب پوٹنا پیتا تے اپنوتخت تاج چھوڑ کے ایبٹ آباد مانھ مہاجراں آلی زندگی گزارنی پئی۔ ابرار احمد ظفر سے پردیس مانھ پیدا ہو یا پر پنج سال کی عمر مانھ ہی یتیم ہو گیا تے نوں شروع تیں ہی زندگی کا سارا سیک ننگے سر برداشت کرنا پیا۔

علمی ادبی خاندان ہون کی وجہ تیں ظفر مانھ ادبی ذوق موجود تھو جس نا وقتی حالات نے یوں سگ لائی جے نظماں، گیتاں تے غزلاں کی پیہری پیہرن لگ پئی تے اُس فصل کو کیمقا بلو ہو سکے جس کی پال پوس تے گوڑی تالی کی ذمہ داری رانا فضل حسین جیہا ادیب تے شاعر نے قبولی ہوئے۔ ابرار ظفر کا سارا کلام مانھ وطن کی محبت، پردیس کا دکھ درد تے اپناں کی بے مہریاں کو جھڑوڈ کر ہے اُس مانھ رانا فضل کی تربیت نمایاں دے۔

بنیادی تعلیم تیں بعد ابرار احمد ظفر کافی عرصہ تک ریڈیو تراڈ کھل نال جو یار ہیا بخت اُنکے اندر کو تخلیق کار جوان ہووے پر وطن کی تاہنگ اُنھاں نا آخر 1981 مانھ واپس چھک لیائی تے وہ آکے گول گلاب گڑھ مانھ بس گیا۔ پر ارات آکے اُن کی کے کے رتجھ پوری ہونیں تے کتنا خواب ریزہ ریزہ ہو یا اسکو اندازو اُنکا کلام توں ہی لایو جاسکے۔ کیونجے اُن کی حیاتی کی کشمش، دکھاں درداں، محرومیاں تے مایوسیاں کو چھاملوانگی شاعری ماں وی موجود ہے۔

ظفر نے بھاویں ہر صفت مانھ شاعری کی کوشش کی ہے پر وہ اپنا اندرون کو درد نظماں مانھ کھل کے بیان کر سکیا ہیں۔ تے اُن کی نظم ہی اُن کی شاعری کی جان ہیں۔

سدہراں کا موتی، ڈھول اواز ادوروں سوہمیں، درد کا اکھر، تے ہوں نہیں ہوسوں، اُن کی شاہکار نظم ہیں۔ اُنھان نے کئی درد یلا گیت وی لکھیا ہیں تے کجھ خوبصورت غزل وی مگر ہر صنف مانھ ان کو اک اپنوں لہجوں تے نمیکلو رنگ ہے۔ اُنھان نے جس خوبصورتی نال ٹھیٹھ گوجری لفظ تے محاورا اپنی شاعری مانھ برتیا ہیں اُس تیں اپنی مادری زبان پر اُن کی پوری قدرت کو اندازو ہو سکے۔

ان کو کلام گذشتہ سال 2003 مانھ ریاستی کلچر اکیڈمی نے ”گنھمن گھیر“ کا ناں نال شائع کیو ہے جہڑو بلاشبہ گوجری ادب مانھ اک اہم اضافوی ہے تے نوجوان لکھاڑیاں واسطے پات وی۔ وطن تے انسانیت نال محبت کرن آلو پوہ شیر جوان اک سڑک حادثا کی وجہ تیں 25 مارچ 1998 نا ساراں تستیاں تیں ازاد ہو گیو۔ تے نوں گوجری زبان اک درد ملی اواز تیں محروم ہو گئی۔ کلام:

غزل

کجھ پیار کا دھوکھا کھا تکیا	میں گیت وفا کا گا تکیا
کر ترلا منت منا تکیا	ویہ اسراں اج کجھ رُٹھا ہیں
میں سوسو وار بھلا تکیا	ویہ دل تیں ڈیرو پٹنا نہیں
تن من کا لعل کھڑا تکیا	ہتھ عشق کو موتی آوی نہ
ڈکھ وی میں گل لا تکیا	سکھ وی ظفر ناراں نہ آوی

غزل

ہجر کی چچیا چاڑھ گیو کوئے	دل میرا نا ساڑ گیو کوئے
گھل غماں کا پہاڑ گیو کوئے	نین ملا کے اکھ چھوہا کے
دل کو ورقو پاڑ گیو کوئے	لکھ کے پیار کی پریم کہانی
ادھ ایشانوں جھاڑ گیو کوئے	لارا لا کے عشق نگر کا
آس کو شہر اجاڑ گیو کوئے	جین کی ظفر آس نکھی

غزل

رات گذری میری عذاباں کی
بُجھ لے اپنو سوال اکھاں تیں
زلف کھولی ہے تیں کدے جانیں
اپنو سب کُجھ میں تیرے ناں کیو
مہربانی بڑی جناہاں کی
غرض کے ہے بھلا جواباں کی
خوشبو آئی منا گلاباں کی
ہن غرض نہ رہی حساباں کی
بیت جانی یاہ رُت شباباں کی
کد تیں آنو سنا او میری غزل

غزل

ستھرا ہی رہ گیا ہیں ڈیرا چلے گیا
ہوں رہ گیو تھو سکھنی گٹھڑی نا تو ستو
میرا نصیب مانہ رہی یاہ شام غم کی شاید
میرا خلوص کو منا انعام کے دتو
دل مانہ میرے تھا جنکا بسیرا چلے گیا
سرمایو سارو لیکے لئیرا چلے گیا
سنگ اپنے لے خوشی کا سویرا چلے گیا
دے کے ویہ غم گھنیرا گھنیرا چلے گیا
عاجز وہ کر کے بھاویں نصیرا چلے گیا
ہوں دے نہ سکیو کائے ظفر بدعا بھلیں

غزل:

غم اتنا توں جریا نہ کر
لیکھ کو لکھیو ہو کے رہنو
بھوگوں گو ہوں آپے ہونی
نہیں مرتو کوئے ہجر مانہ اڑیئے
دُکھ کو پانی بھریا نہ کر
سوچ متی مچ کریا نہ کر
رو رو کے توں مریا نہ کر
دوری تیں مچ ڈریا نہ کر
دل چھوٹو توں کریا نہ کر
نہ ملیا ات حشر ملاں گا

غلام سرور صحرائی

پیدائش: 3 فروری 1956ء پروڈی گجراں راجوری

سرور صحرائی ناپردیس کو احساس، پیر پنجال کی ہڈک تے شاعری وراثت مانھ لہھی ہے۔ ویہ گوجری ادب کا پیر پنجال رانا فضل حسین راجوری کا سپوت ہیں۔ جہاں نے ملکی تقسیم کے دوران، ہجر کا درداں کی پنڈو کلی قدروں باہری بنھ لئی تھی تے ویہ سنگیاں ساتھیاں تے وطنیاں کو ہصو اج توڑی شاعری کی زبان مانھ پچکاوین لگاوا۔ سرور صحرائی نے وی اس بچوں اپنا حصہ کی بنڈ پٹن کے لئی ہے۔ ویہ ۱۹۶۵ مانھ راجوری تیں ہجرت کر کے میر پور جالبسیا تھاتے تعلیم مکمل کر کے اجکل ادب کے نال نال تدریس کو فرض وی نبھاوین لگاوا۔

گوجری ادب مانھ غلام سرور صحرائی کی طبیعت شاعری آ لے پاسے چلی تے تے رانا فضل ہوراں کی رہنمائی نال اس مانھ ایسوکھار آ تو گیو جے اج گوجری ادب مانھ سرور صحرائی کو اک اپنا سلوب، مقام تے پچھان ہے۔ انھان نے ہر صنف مانھ شاعری کرن کی کوشش کی ہے پر انھان نے روایتی شاعری کا بنیا بنایا اصولاں تیں ہٹ کے گوجری مانھ نواں تجرباوی کیا ہیں۔ جہڑی گوجری لکھاڑیاں تے پارکھاں نے مچ پسند کیا ہیں۔ ان کو گوجری کلام ریاستی کلچرل اکیڈمی نے پہلاں ”سجری سویل“ تے ”رُت زوئی“ کی صورت مانھ شائع کیو ہے جس نال انھان نا پڑھن تے سمجھن آلاں کی تعدا مانھ مچ اضا فو ہونے گو۔ چھوٹی بحر مانھ باراں مانہ لکھ کے انھان نے مولانا فضل پانی پتی کی یاد تازہ کر چھوڑی ہے۔

صحرائی بنیادی طور نظم کا شاعر سی لگیں۔ تے یوں انھان کی تخلیق کچھ خوب صورت نظماں تے ماہیا کی طرز پر لکھیا دا باراں مانہ تے گیتاں کے نال نال غزل مانھ وی نظم آلو

رنگ یوں ڈُل آئی ہے جے ان کی اکثر غزل مسلسل غزل کہی جاسکیں۔ شاعری مانھ چن، وطن تے عید جئی اصطلاح رانا فضل توں مستعار محسوس و ہیں۔ شاید اس گلوں وی جے پڑھن سنن آلاں تا یہ لفظ رانا فضل ہو راں کی زبانی سنن کی عادت جئی ہو گئی وی ہے۔ بہر حال سرور صحرائی کا کجھ نواں تجربا دل نا مچ مچ پرچا ویں تے امید ہے جے نواں لکھن آلا انھاں تیں ضرور رہنمائی حاصل کریں گا۔ کلام:

غزل: ۱

پھلاں ہار ہنار کسے کی	سچی رت بہار کسے کی
رگ رگ بچے تار کسے کی	سرسنگیت اک میت کا چھیڑوں
واہ سندر سنسار کسے کی	دل میرے بسنیک ہوئی وی
پیاری پیار پیار کسے کی	من کی لال پری نہ دسرے

غزل: ۲

ویہ بسیا وا سدھری یادیں	نویں نروئی سجری یادیں
پھلیا کس کی ہگری یادیں	آساں کا پھل دل کے باغیں
ویہ لگیا من سنجری یادیں	اُنکا چیتا رت مُشکاویں
بچپن کی بے فکری یادیں	لاڈ انھاں سنگ پال کے رکھیا
گندل پیار کی ہنگری یادیں	پھلے بیل وفا کی سرور

غزل: ۳

غزل میری وی پھلاں ہار	سجری سویل تے رت بہار
رت نے رنگیو وو سنسار	سماں کا نین تریل نے دھویا
اک چندڑی تے ڈکھ ہزار	دل یاداں کی چنیا چڑھیو
دیکھیں ندیوں پار ارار	کیوں نہیں ملتا دوئے کنارا
حسن کی پٹی پڑھے پیار	عشق اُستاد ہو پورے سرور

غزل: ۴

پہلاں ویہ ارمان بنیں تھا
 بے ہن اکھ پرت نہ دیکھیں
 ارماناں کا مان بنیں تھا
 فرکانہ نادل جان بنیں تھا
 آف کروں تھوتاں ویہ سوہنا
 لوڑ پئی تاں دُڈو دسیو
 ایویں نین پران بنیں تھا
 دیکھ مناں انجان بنیں تھا

غزل: ۵

خبرے خائیں کون آیو رے
 دے گیو تھو کوئے پیار کا لارا
 جاگ آئی تے رون آیو رے
 ایویں دردی ہون آیو رے
 یاداں کی اک برچھی تڑکھی
 دل ناسل پران آیو رے
 تچ دتو اس بے پرواہ نے
 نین سڑیں لہو چون آیو رے
 ہوں سرور ہنگلا تو جاگوں
 من میرے کوئے سون آیو رے

ق:

چن عید کو سانجھو چڑھیو رے یاہ عید ہے روزیداراں کی
 تم دور تے ہم مجبور ہویا کے عید وچھوڑے ماراں کی
 چن سانجھ سنجھیالی اک سانجھی تم چن دیکھیں ہم چن دیکھاں
 تم جدا جدا ہم جدا جدا ہے سا جھ رے دینہہ چن تاراں کی

اشتیاق احمد شوق

پیدائش: مارچ 1956ء، وانگت کشمیر

شوق ناگوجرا لوک اک رسیلاتے سجیلا شاعر کے طور پر پچھانیں۔ تے بڑا گھٹ لوکاں نا پتو ہے جے ان کو ناں اشتیاق احمد ہے تے ویہ میاں نظام الدین لاروی ہوراں کا صاحبزادہ ہیں۔ ویہہ خواہش کرتا تاں مال دولت، ملازمت، سیاست، سب کچھ حاصل کر سکیں تھا۔ پراس شہنشاہی تے روحانی سلسلہ مانہ جمیا پلپا اس گوجری بھرتی ہری سارا کہیں نا تیاگ کے غالب کی طرفداری شروع کی تے گوجری ادیبان، شاعراں تے قدرداناں نے سرا کہیں بسال لیو۔ دیکھ دیکھتاں انھاں نے وہ مقام حاصل کر لیو جے ۱۹۸۰ تیں اُراں کائے گوجری مجلس تے کانفرنس اشتیاق احمد شوق کا ترنم آلا کلام توں بغیر مکمل نہیں سمجھی جائے تھی۔

اشتیاق احمد شوق نے گھٹ شاعری کی ہے مگر صاف سُٹھری تے سؤنی شاعری ہے۔ بنیادی طور پر ویہ غزل کا شاعر ہیں پر انھاں نے گیت تے طنز و مزاح مانہ وی کچھ چنگا اضافہ کیا ہیں۔ خالص گوجراتے ادبی ماحول مانہ جم پل کی تاثیر انکا کلام مانہ وی ٹھیٹھ گوجری کی صورت ظاہر ہوئے جس مانہ جنید نظامی تے اقبال عظیم جیہا نیاں پڑنیا پارکھاں تے ادیباں کی تربیت نے سونا پر سہاگا کو کم کیو ہے۔

شوق صاحب عرصہ توں چُپ ہیں اللہ جانے کیوں۔ اچھاں تک ان کو کلام کتابی صورت مانہ دیکھن واسطے وی متی اکھ تسائی ہیں۔ خدا کرے گوجری غزل کو یوہ شاہسوار فرماہار موڑے تا نچے گوجری زبان تے ادب کا عاشقاں کی تس بجھان کے نال نال ماں بولی کی بتری دھاراں کو حق وی پور و پورا داہو سکے۔

غزل: ۱

چن کے نال یہ تارا چمکیں خوش ارج دُنیا ساری ہے
انگی وی کیوں دل میرا مانہ ایک غماں کی آری ہے

منا بھل کے کے گجھ تھا یو بہانو پیار کو جھوٹھو تھو
یاد توں جد جد آ یو بجنا دُنیا اک بساری ہے

نُٹ پوئے اسان ہی بھاویں ایو وی ہوں سوچوں تھو
ہُن اِس پیار کا نُٹا بُت پر چن کی لوء وی بھاری ہے

دھوکھو کھانہ جائیے صدقے رُت گجھ ایسی بدلی ہے
پھلیں تھاجت پھل خوشی کا غماں کی پھلواری ہے

تاراں کی لو پھکی پھکی چن بھی شوق انگلا یو ہے
رات نہیں گزری گویا بجنا عُمر ایک گزاری ہے

غزل: ۲

نظراں نا یار تیری تد تک تلاش ہے
موٹڈھاں پر زندگی کی جد تک یاہ لاش ہے

منا ہجر کی دھپ بھلا ساڑے گی ہور کے
ڈھکی وی غم کی چھاں چریوں آس پاس ہے

تصور مانھ توں نظر مانھ توں ہر ویلے کول ہے
فر تیرے میرے درمیاں کیوں لفظ کاش! ہے

راتاں کلکھیاں نا توں منا ہی سوپ دے
سرگی کا خوف تیں میرو دیو اداس ہے

اتھروں مانھ شوق ڈھال کے اکھاں تیں کیر نہ
ہر غم نا سہن واسطے ٹھنڈی جی ساس ہے

غزل ۳:

رہیو راز دل مانھ ہوں اج تک چھپا تو
کہڑو میری سنتو تے کس نا سنا تو

ہتھ دل پر رکھ کے توں اتنو ہی کہ چھوڑ
کدے بھی نہ آتو، توں جد جد بلاتو

توں پیارو تھو تاں ہی خدا کی قسم
رہیو تیرا زخماں نا اج تک کھڈا تو

زمانہ کا ٹھہلا نے کت لے پچاپو
اگیرے پھلاں تیں یوہ کنڈاں کو احاطو

تتاں نہیں تھو آنو تے نہ آیو شوق
صبح شام ایویں رہیو کاگ اڈا تو

نذیرُدرانی

پیدائش: ۱۹۵۸ء مظفرآباد

نذیر احمد درانی ہور ۱۹۵۸ء ماں مظفرآباد کا گراں تلی کوٹ ماں پٹھان فتح محمد درانی ہوراں کے گھر پیدا ہويا۔ اتے ہی ایف اے تک تعلیم حاصل کی تے اسے دور ماں شاعری کے سنگ وی دلچسپی پیدا ہوئی۔ پہلاں اردو ماں لکھنوشروع کیو پر چھیکڑ گوجری کا نیا پڑنیا شاعر مخلص وجدانی ہوراں کی سنگت تے رہنمائی نے ویہہ وی گوجری آلے پاسے موڑ آنیا۔ درانی ہوراں نے گوجری ماں نعت، نظم، غزل تے گیت سب کچھ لکھو ہے۔ انھاں کی گوجری شاعری کو مجموعہ ”چھڑی“ کا ناں نال شائع ہو یو ہے۔

کلام کا نمونہ:

غزل:

کسے نہ چٹھو میرو حال	مر منگیو ہوں غم کے نال
ہوں اک لسر کے کرسکوں	سر پر بھارو پیو جنجال
پلے نہیں اے پیسو دھیلو	منا جانے سب کنگال
غم کی دھپ ماں ایسو ستو	گذر گیا کتنا سال
دنیا ماں جد سکھ نیہہ بلیو	کے ہوے گو ات کو حال

منشاء خاکی

پیدائش: نومبر 1959ء کالاکوٹ

محمد منشاء خاکی نومبر ۱۹۵۹ء ماں کالاکوٹ راجوری کا اک گراں مانہ پیدا ہوا۔ گوجرا ماحول کا دکھ درد تے تستیا باند اُنھماں ناوی پوٹنا پیا۔ پھروی ہم دیکھاں کہ تعلیم کی شوق انھماں نا مشکلات کا جنگل تیں کڈھا آئیں تے ویہ ایم اے تک کی تعلیم حاصل کرن مانہ کامیاب ہو جائیں۔ اُن کا اسے تعلیمی دور مانہ ریاستی کلچرل اکیڈمی مانہ گوجری شعبہ کھلیو تے ویہ وی مجلساں تے مشاعر اں مانہ شامل ہون لگا۔ 1983 مانہ توں محقق (ریسرچ اسٹنٹ) کے طور اسے شعبہ مانہ شامل ہو گیا جت اقبال عظیم، نسیم پونچھی تے کچھ عرصہ واسطے مرحوم سروری کسانہ کی صحبت وی نصیب ہوئی۔ کلچرل اکیڈمی تے پہلی صف کا گوجری لکھاڑیاں کی ہمیشاں کی سنگت اُن کا ذوق واسطے بڑی مفید ثابت ہوئی تے انھماں نے اپنا ادبی سفر قدم پھوک پھوک کے دھرتاں شروع کیو۔

بیہہ سالوں کارو کیا واہاڑا اہد کا اُنکا جگر نا لخت لخت کر کے سال 2003ء ماں شائع ہوا ہیں۔ جد کہ ڈاکٹر رفیق اچم سنگ انکی سانجھی تحقیق 'بنیادی گوجری گرائمر' کی صورت ماں سال ۲۰۰۵ء ماں شائع ہوئی ہے۔ منشاء جی کی اواز مانہ گوجرا ماحول کو سا رو در دسمیا پوو سئی لگے۔ ویہ حساس، مخلص تے شرموکل شخص ہیں۔ اُن کی دو خوبی خاص طور پر داد کے قابل ہیں۔ اک تے ساری عمر ادب کا کاروبار مانہ گزار کے وی جھوٹھی شہرت تے راتورات بڑا فنکار بنن واسطے انھماں نے کوئے حربا استعمال نہیں کیا۔ تے دوجے اقبال عظیم جیسی گھوم مھری شخصیت کا سایہ مانہ رہ کے وی ادبی رہنمائی بھاویں حاصل کی ہوئے پرا انھماں نے شاعری تے اسلوب مانہ

اپنی شناخت قائم رکھی ہے۔ یوں کسے لالچ یا کسے کارعب مانھ آن تیں بغیر بنی بنائی شاہراہ پر چلن کے بجائے انھاں نے بلیں بلیں کھنوتر کے اپنوسلکو آپ کڈھیو ہے۔ یوہ کم اکثر لوکاں واسطے سوکھلو نہیں ہوتو۔

منشاء خاکی کو اسلوب نمیکلو ہے۔ شاعری مانھ غزل انھاں کو من پسند موضوع ہے۔ پر روایتی غزل تیں ہٹ کے انھاں نے نواں تے نچھوہ مضمون وی اپنی غزلاں مانھ شامل کیا ہیں۔ چھوٹی بجز مانھ خوب صورت گوجری غزل لکھن آلاں مانھ ویہ مخلص وجدانی تے ڈاکٹر رفیق انجم کے سنگ باوقار کھلائی لگیں۔ کسے باذوق پڑھن آلا کو تھہ پڑیوتاں ان کی کتاب (لخت لخت) پڑھ کے میرا تاثرات کی تصدیق ہو جائے گی۔ نمونہ کلام

اوڑک مرنو قسمت ماں ہے موت کے بہانے یار نا ڈیکوں

غزل: ۱

زُنو وقت اخیر نا زُنو	متھا کی تقدیر نا زُنو
آخر گل تیں لہنی پے گئی	ہوں اس پائی لیر نا زُنو
سارا منا ہستا دسیں	ہوں کہڑا دلگیر نا زُنو
تُو ہے بو ہے بچو بھریو	ہر حیلہ تدبیر نا زُنو
ساراں کا دُکھ سا بچھا میرا	ہوں غریب امیر نا زُنو

غزل: ۲

دل کو ساز بجالے بھاویں	آ منا وی گالے بھاویں
ہوں کد ہلوں اپنی گلوں	سو باری ازما لے بھاویں
بس اکھاں مانھ یا پھر یاہ کر	دل مانھ ڈیرو لالے بھاویں
پیس کے منا سُر مو کر کے	اکھا مانھ توں پالے بھاویں
منتو نہیں تاں یاہ کر منا	دل مانھ یار بسالے بھاویں

غزل: ۳

تنگھٹو نہیں بیمار نظر کو
خوف اکھاں تیں ڈھلتو دے سے
کس نا دیکھے کون سیانے
اتھرواں کی کوٹھی بچوں
تجن پرکھ پریت کی اوکھی
کون پچھانے پیار نظر کو
کون بنے دلدار نظر کو
اٹھ گیو اعتبار نظر کو
گجھ نہیں کہو یار نظر کو
کریو میں دیدار نظر کو

غزل: ۴

دیکھ کہو تھو باہر نہ جانیے
روئے تے پچھتاوے گو توں
تیرو اُنکا دل نہیں لکسیں
کوئے لیرو ٹھگ لئے گو
صدقے ساری زندگی یارا
ماہلی کے اس پار نہ جانیے
زندگی ہے دن چار نہ جانیے
توں میرا دلدار نہ جانیے
تچن دل بازار نہ جانیے
میری گل بسار نہ جانیے۔

غزل: ۵

بھل بھلاوے کوئے آوے گو
آتی رت بہار مُڑے گی
دور کتے پردیسیں ڈیرو
بلیتی اگ مانھ سٹ کے منا
میرا خط نا پڑھ کے خاکی
منا اپنے گل لاوے گو
گمبو جو گجھ فر تھاوے گو
نہ مُڑ پوتاں خط آوے گو
پر لایوتے پچھتاوے گو
پاڑ سٹے گو فر چاوے گو

گلاب دین جزا

پیدائش: تلیلی گریز 1960

گلاب الدین لون ہورن ۱۹۶۰ء مانھ تلیلی گریز (بارہمولہ) مانھ غلام محمد لون ہوراں کے گھر پیدا ہويا، پرویہ بچپن مانھ ہی اتوں نقل مکانی کر کے داگنت کنگن کا گوجراما حول مانھ آ بسیا۔ انکی مادری زبان شینا تھی پر لکھن پڑھن تے گوجراما حول کی تاثیر نال گوجری لکھنی شروع کی جت اقبال عظیم ہوراں کی حوصلہ افزائی نے ویہ اک پُر تاثیر تے مستند گوجری شاعر بنا چھوڑیا۔ انکی شاعری ریڈیو تے ٹیلیویشن تیں نشر ہون کے علاوہ شیرازہ گوجری مانھ وی باقاعدہ شائع ہوتی رہے۔

غزل:

دیو نہ باندے توں بال اج بھی	ہجر کی راتاں نا ٹال اج بھی
میرو یوہ اتھروں اثر تیں خالی	ہوا توں لے جا سوال اج بھی
پیراں ماں بیڑی گھلیں ہیں اس نے	آنو ہے میرو محال اج بھی
میری اکھاں ما آیاوا اتھروں	غماں کی زندہ مثال اج بھی
جزا یہ دل کا میں آلہ مان	ناگ رکھیا ہیں پال اج بھی

غزل:۲

سینے چوٹ کراری دے جا
یا اک غزل ادھاری دے جا

کھلنا پھل کی روک لے خوشبو
بھور نا چار دیواری دے جا

سہن نہیں ہوسیں تیری جدائی
وصل کی اک چنگاری دے جا

بستو رہے گو شہر حسن کو
عشق نا خود مختاری دے جا

گُوڑا قصہ مہر وفا کا
پنڈ غماں کی بھاری دے جا

اتھروں بارش سیک ہجر کو
توں منا اس واری دے جا

ہس کے سب کچھ سہتو رہوں گو
پوڑ جزا مچ ساری دے جا

ارشاد احمد قمر

پیدائش: مارچ 1960ء بابا نگری واگت

حضرت بابا نظام الدین لاروی کا پوتا تے میاں جنید احمد نظامی کا فرزند ارشاد احمد قمر مارچ ۱۹۶۰ء ماٹھ بابا نگری ماٹھ پیدا ہویا۔ بُنیادی تعلیم تے تہذیب اتے سکھی۔ اسا خمیر نا کدے اقبال عظیم، نسیم پونچھی تے غنی عارف جیہی سنگت نصیب ہوئے تاں شاعری کا اُماہ اپنے آپ پھٹن لگ پونیں۔

اس قسم کا ادبی ماحول ماٹھ جمیا پلایا ارشاد قمر پچھلا پندرہ سالوں تیں ریاستی کلچرل اکیڈمی کا گوجری شعبہ ماٹھ ملازمت کریں تے اس طرح اکیڈمی کا مشاعرے تے مجلساں ماٹھ شامل ہون کو کوئے موقوف نہیں ضائع کرتا۔

ارشاد قمر نے شاعری کے نال نال کجھ معیاری تحقیقی مقالاوی لکھیا ہیں پر بُنیادی تے فطری طور پر ویہ گوجری شاعر ہیں جن کا کلام ماٹھ گوجرا درداں کی تپش محسوس کی جا سکے۔ تھوڑی شاعری کی ہے پر اُن کی شاعری صاف سُتھری، دھوئی دھائی وی تے معیاری شاعری ہے۔

نمونہ کلام: غزل: ۱

تیری یاد ما اچ بہاراں نا دیکھوں	ویہ مڑیا نہیں انکا مزاراں نا دیکھوں
توں بیٹی وی رتاں کی یاداں نا کہیے	نشانی ہیں تیری چناراں نا دیکھوں
مٹانا تھا کس نے نصیباں کا لیکھا	پہینگاں کا ٹٹا وا لاراں نا دیکھوں
ہوں لگیا کا جھڑتا کھناراں کے باندے	رتجھاں کی جھگی تے ڈھاراں نا دیکھوں
یہ نہیرا کی بانہہ گھاؤں تے سوچوں	ویہ آیا تے ان کا پیاراں نا دیکھوں

غزل: ۲

اُن ماہلاں پر بول رے پنچھی جن پر درد بندایا تھا
ات کتے تھیں آس کیں ڈھیریں سدھراں نے سمجھایا تھا

روپ نگر ما پیار تیرا نا کت کت ڈھونڈن جاؤں
لماں لارا یار کسے کا سبجرا بول گھمایا تھا

کوئل بولے قمری گائے کوک دلاں کا ہاڑاں نا
اوہ نہیں آہو، مڑ نہیں ڈٹھو جس کا نقش بنایا تھا

ساون کو آس وی گئیں پچھ لے بھاویں بستی نا
پچھلی برہیا آن کسے نے میرا درد جگایا تھا

تیں کد نال نبھائی میرے اوکھی منزل لماں پھیر
بول ندی توں باندے بول تیرا بول ازمایا تھا

غزل: ۳

خبرے کیوں اعتبار نا پرکھے	اج بھی یار پیار نا پرکھے
بھولو کوئے ہونہار نا پرکھے	گھپ نماشاں راہ مانھ بیٹھو
تاں بھی گاہک بزار نا پرکھے	ہر جا ہٹی ہر شے پکے
سسی بیس سوار نا پرکھے	نہ کوئے پٹو نہ کائے ڈاچی
کونجاں کا اڈار نا پرکھے	تاہنگاں کی یاہ ڈور نہ لٹے

غزل:۴

جوگی پھل نا ڈھونڈن جوگی کن کن پتیں پار گیا
 لگ ملگی پی کرلاؤں میرا پچھڑ ڈار گیا

آتی رت مت نال لیائے کھل کھل دیکھوں راہاں نا
 اس تیں اگے سکھنا سارا کتنا بار اتار گیا

دور کتے کوئے جا ٹھکانو پچھ پیپھا بازاں نا
 بستی آلا دس نہیں سکتا مچاں گا ادھار گیا

آس نراس تے رتجھ کولیں کس کس سانجھ نا لوڑوں پی
 تاہنگ نمائی توں ہی دسیئے رٹھو وا دلدار گیا

پوٹوں درد تے سوز ہجر کو میری کجھ نشانی تھیں
 بے پرواہ نا ترس نہیں آہو میرا اجڑ سنسار گیا

ڈاکٹر رفیق انجم

پیدائش: جنوری 1962ء کلائی پونچھ

ڈاکٹر انجم ناریاست کو بچو بچو جانے، شائد اس واسطے وی ہے وہ بچاں کا ماہر نباض تے معالج ہیں۔ پر ان کی اصل پچھان گوجری ادب ہے۔ ڈاکٹر رفیق انجم گوجری کا نامور شاعر، ادیب، کہانی کار، محقق، نقاد تے تاریخ دان ہیں۔ وہ جنوری ۱۹۶۲ء مانھ پونچھ کا کلائی گراں مانھ میاں عبدالکریم اوان کے گھر پیدا ہويا۔ تے دسی توڑی کی تعلیم اتے حاصل کی۔ لوہکی عمر مانھ ہی ماں کی ٹھنڈی چھاں تے باپ کی شفقت تیں محروم ہو گیا تھا۔ بڑا دوائے بھائی ملازمت کا سلسلہ مانھ پہلاں توں ہی کئی کئی تھا۔ اس طرح کچی عمر مانھ ہی وقت نے گھر تے پڑھائی کو جھڑو دو گڑ بھارا انکا منڈھاں پر آن سٹیو تھو وہ انھاں نے بڑی خوب نال نبھایو۔

میڈیکل کالج جموں تیں ۱۹۸۵ء مانھ ایم بی بی ایس کی ڈگری حاصل کی تے ۱۹۸۸ء مانھ ریاستی محکمہ صحت مانھ میڈیکل آفیسر کے طور ملازمت شروع کی۔ پونچھ مانھ چار پنج سال کی خدمت تیں بعد ڈاکٹریٹ واسطے چنے گیا تے کشمیر یونیورسٹی (میڈیکل کالج سرینگر) تیں شعبہ اطفال مانھ ایم ڈی کرن تیں بعد ۱۹۹۷ء توں ۲۰۰۴ء تک راجوری مانھ نکا جانکاں کا ماہر معالج کے طور کم کیو۔ تے اچکل فر میڈیکل کالج کے تحت چلڈرن ہسپتال سرینگر مانھ رجسٹرار کی حیثیت نال ذمہ داری نبھایو لگاوا۔

ڈاکٹر انجم ہوراں نے ذہن تے حساس ہون کی وجہ تیں تعلیمی دور مانھ ہی اردو ادب کو چنگو خاصو مطالعو کر لیو تھو تے اردو مانھ غزل وی لکھنی شروع کر لی تھیں جہڑی ۱۹۹۳ء مانھ ”خواب جزیرے“ کا ناں نال چھاپی جس نادیکھ کے اردو ادب آلاں نے انھاں نال کافی

امید رکھ لئی تھیں پر انہاں ناریاست کا نامورا دیب تے کلچرل اکیڈمی کا سیکریٹری خواجہ محمد یوسف ٹینگ ہوراں کو گوجری لکھن کو مشور و مہندی ہاروں لگو تے یاہ ساعت گوجری زبان تے ادب واسطے بڑی مبارک ثابت ہوئی۔

گوجری مانہ ڈرامہ فنکار کے طور ۱۹۸۰ مانہ داخل ہو یا۔ ادبی سفر کے دوران ۱۹۸۳ مانہ نسیم پونچھی نے کہانی دار حوصلہ افزائی کی، فیض کسانہ نے ریڈیو واسطے انشائیہ لکھایا، اے کے سہراب نے گیت لکھن کی جاچ دی پر ڈاکٹر انجم بلیں بے کھسک کے اقبال عظیم آلی لین مانہ جا کھلیا تے نوں غزل لکھنی شروع کیں جے گوجری غزل مانہ انہاں نے اک اپنا اسلوب تے ناں پیدا کر لیا ہے۔ ٹکی بحر مانہ ویہ خوب صورت غزل لکھیں تے آج کئی نوں لکھاڑی اُن کی پیروی کرتا سئی لگیں۔ بھاویں ویہ پونچھ کی جم پل ہیں پر تحریر کا حوالہ نال ان کو تعلق پوری ریاست نال سئی لگے۔

۱۹۹۳ء مانہ ڈاکٹر انجم ہوراں نے گوجری غزلاں کی پہلی کتاب ”دل دریا“ چھاپی جس ناریاستی کلچرل اکیڈمی نے بڑا مان نال ۱۹۹۵ کو بہترین کتاب کو ایوارڈ دتو تھو۔ اُن کی کہانیاں کی کتاب کورا کاغذ ۱۹۹۶ مانہ شائع ہوئی جہڑی گوجری مانہ کہانیاں کی پہلی کتاب ہے۔ اُن کی جدید گوجری شاعری ”سوچ سمندر“ تے چنام گوجری غزلاں کی تالیف ”غزل سلونی“ گوجری ریسرچ انسٹیٹیوٹ جھوں نے ۱۹۹۵ تے ۱۹۹۶ مانہ چھاپی تھیں۔ ان کو کلام اکیڈمی کی کتاباں مانہ شائع ہون تے علاوہ ریڈیو کشمیر تیں وی گیتاں تے غزلاں کی صورت اکثر نشر ہو تو رہے۔ ڈاکٹر انجم تحقیق پر وی گُوڑھی نظر رکھیں تے نسیم پونچھی کا کہن موجب ویہ پورا ملہ بچوں لگی بڑی اٹھکل نال کڈھ لیا ویں۔ گوجری تحقیق مانہ سائنسی نظریو داخل کرن آلا پہلا لکھاڑی ہیں۔ اس کو ثبوت انہاں نے ۱۹۹۶ مانہ ”گوجری ادب کی سنہری تاریخ“ لکھ کے دتو تھو جہڑی سال ۲۰۰۱ مانہ ریاستی کلچرل اکیڈمی نے شائع کی ہے تے اس موضوع پر پہلی گوجری کتاب ہے۔

ڈاکٹر انجم نے پہلی ”گوجری انگلش ڈکشنری“ بنان تیں علاوہ، ”گوجری گرامر“،

”گوجری کہاوت کوش“ گوجری شاعری کی کتاب ”سوغات“ تے اردو شاعری کی کتاب ”کاش!“ اسے سال شائع کی ہیں جد کہ قدیم گوجری ادب، جدید گوجری ادب، چنام گوجری کہانیں، چنام گوجری غزل تے گوجری شاعراں تے ادبیاں کا تذکرہ آلی کتاب ”لحلاں کا بنجارا“ جھڑی گوجری ادب مانھ اپنا اپنا موضوع پر پہل ہیں، جلدی ہی شائع ہون آلی ہیں۔

گوجری زبان تے ادب کی ترقی واسطے انھاں نے ۲۰۰۰ء مانھ غیر سرکاری تنظیم ’انجمن ترقی گوجری ادب‘ قائم کی جسکا ویہ پہلا سکرٹری جنرل وی ہیں تے اسے تنظیم کے تحت انھاں نے تقریباً دس باراں کتاب شائع کی ہیں۔ ڈاکٹر انجم کو تحقیق تے تصنیف کو یوہ سلسلو جاری ہے تے اجکل مختصر گوجری ڈکشنری، گوجری کشمیری تے گوجری ہندی ڈکشنری ترتیب دین تیں علاوہ دیسی طریقہ علاج پراک کتاب تے بچاں کی عام بیماریاں بارے کتاب کی تیاری مانھ زچھیاواہیں۔

☆ (تحریر: امین قمر، کے ڈی مینی)

- تخلیقات: ۱۔ خواب جزیرے (اردو شاعری) ۲۔ دل دریا (گوجری شاعری)
- ۳۔ غزل سلونی (منتخب گوجری غزلیں) ۴۔ سوچ سمندر (جدید گوجری شاعری)
- ۵۔ کورا کاغذ (گوجری افسانے) ۶۔ گوجری ادب کی سنہری تاریخ
- ۷۔ گوجری انگریزی ڈکشنری ۸۔ سوغات (گوجری)
- ۹۔ گوجری کہاوت کوش ۱۰۔ گوجری گرائمر
- ۱۱۔ کاش! (اردو) ۱۲۔ قدیم گوجری ادب
- ۱۳۔ جدید گوجری ادب ۱۴۔ جدید گوجری شاعری
- ۱۵۔ جدید گوجری غزل ۱۶۔ گوجری افسانہ نگاری
- ۱۷۔ تذکرہ گوجری شعراء ۱۸۔ گوجری ہندی ڈکشنری
- ۱۹۔ گوجری کشمیری ڈکشنری ۲۰۔ نکلی گوجری ڈکشنری
- ۲۱۔ سدھراں سلونیاں (پنجابی) ۲۲۔ انجم شناسی۔

غزل: ۱

دو اتھروں اک خواب کا ہوتا دو اتھروں ارمان کے ناں
دو اتھروں اُس بُت کا ہوتا دو اپنا ایمان کے ناں

وہ تے اوس وی دے نہ سکیو سچ تسائی دھرتی نا
اڈتا پنچھی لیتو جائیے دو اتھروں اسمان کے ناں

ہوں دوہاں نا دیکھ دیکھ کے اندرو اندری سڑتو رہیو
دو گھر کی ویرانی جوگا دو اتھروں مزمان کے ناں

خواباں کی تعبیر وی جانے، یاداں کی جاگیر وی توں
گیت غزل تے شعر میرا سب تیرا اک احسان کے ناں

نیزا کپ کے تینسا جھل کے جس نے توڑ نبھائی ریت
ہوٹھیں سکتا حرف وفا کا، انجم اُس انسان کے ناں

غزل: ۲

آنوں باز نہ آیا اتھروں	کس کس نے سمجھایا اتھروں
خالی دیکھ حویلی دل کی	اُس نے آن بسایا اتھروں
ایسوں لا کے فصل وفا کی	ہم نے خوب کمایا اتھروں
خورے کون میں روٹو ڈٹھو	اج تک فیر نہ آیا اتھروں
یار کی دعوت کر کے انجم	بس ہم نے برتایا اتھروں

غزل: ۳

ان اکھاں نے تارا دسیا دل نے قہر گذشتہ رات
بلیں پو تہائی گو سارو زہر گذشتہ رات

درد فراق دلیل ہزاراں اُبھی تانی بسریں یاد
کس کس حال گذاری ہم نے تیرے شہر گذشتہ رات

اتھرواں کا موتی زلیا گئی رات شریکاں مانھ
نین سمندروں یاد تیری نے کڈھیں نہر گذشتہ رات

پیت نگر ویران بنا کے جاتی ہیر تمنا نا
اک سودائی رہیو بلا تو پچھلے پھر گذشتہ رات

دل پاگل کی ٹھکتاں ٹھکتاں کُوک سمندروں پار گئیں
تھارے مہا بے اس نے کی عرشاں کی سیر گذشتہ رات

غزل: ۴

دیکھی نہ سنی میں کتے خوشحال زندگی
ہوں جانوں میں گذاری ہے کس حال زندگی

لئے خوشی غریب کی فرحین وی نہ دئے
تیری کوئے پرتیت نہ پڑتال زندگی

مجبوری انہاں ساراں کو واحد جواب تھو
پکھے تھی جتنا میرے تیں سوال زندگی

سر پر کسے یتیم کے پلو نہ دے سکے
پتر پریسے بوٹاں تیں ہر سال زندگی

تیرا میرا اصول تے رلتا نہیں اک ذری
شاید نہ چل سکوں ہوں تیرے نال زندگی

غزل: ۵

میری مرضی ہے جو رضا اُسکی
میں قبولی ہے ہر سزا اُسکی

حرف ہوٹھاں کو ساتھ کے دیتا
دل تے میرو تھو پر دعا اُسکی

موم کا پر تے دینہ کے سنگ یاری
خواب میرا تھا کے خطا اُسکی

اُس نے بھل جان کی دعا کی ہے
لاج رکھیے توں یا خدا اُسکی

دل نے انجم ضرور کہو ہے
اج تے کائے غزل سنا اُسکی

گوجری شعر

اپنے نیویں آتا جاتا، ملتا گلتا سینے لاتا
ایسوں عید محرم بن گئی، بجن دل تیں دور اتیراں

اپنی جا پتھر وہیں بھارا سچی کہ گیا لوک سیانا
جا جا سجدا کر کے انجم اپنو آپ گھٹائیے نہ

اج تک فضل خدا کو انجم دشمن اکھ اٹھا نہیں سکتا
اسمتریں نا چھلتا رہیا ہیں اپنا بجن یار ہمیشاں

اتھرواں کو پانی لاکے ارماناں کی لُوٹی نا
سرگی نال کدے تے کرینے دل کو سیک دعا کے حوالے

ایک دل کس کس کا جانیں درد کی کاری کرے
اس قیامت مانھ وی تیرا پیار کی اپنی جگہ

توں دور ہے شاند تیرا فرشتاں نا نہیں پتو
انسان گو لہو پئے اج انسان آکے دیکھ

انہاں موجاں توں ٹپ کے منزلاں تک کون پچھے تھو
کدے مُڑ مُڑ کے میں پچھلا کنارا دیکھیا ہوتا

اوکھے اوکھے چرتا ڈٹھا
میں تیرا غنوار اتیراں

تیرو غم نہ بھلو زمانا کی تنخی
میں چھوڑی ہیں ساریں بھلا بلیں بلیں

تیری خاطر چن کی دھوڑ بٹیلی میں
کہ تھی تارا توڑ لیاوے تاں منوں

اس زمانہ نے میرا اک درد کی کاری نہ کی
ہوں تے لکھاں واسطے کے کے دوا لکھتورہو

آبھلا چھوڑان وفا تیں کس نے کیو سر کھلا
تیری توں جانے میری دیوانگی اپنی جگہ

خورے کون میں روتو ڈٹھو
اج تک فیر نہ آیا اتھروں

جا جا بر نیووں نہ کیو، دُنیا کا احسان نہ لیا
اس درویش نے عُمر گزاری داتا کے دربار ہمیشاں

جگہ جگہ انسانیت کی قبروں کا گُجھ ایئر دسیں
کسے زمانے یاہ دی شانء بستی تھی انسانوں کی

جیتان جی کوئے ناں نہیں لیتو اسمتراں دیوانا کو
جاتی واری نیکی ساری آویں یاد زمانا نانھ

جے تیری کائے نشانی لیکے اج دی عزرائیل آوے
یاہ جان تیری امانت ہے ہوں دے چھوڑوں اشارا پر

چن کی گوگی سینے لاکے تاراں نال بھروں گو گوجھا
دل پاگل نا روز، اولیں پات یہ لاوے خورے کون

خواباں کی تعبیر نہ دتی ہور نووں کوئے خواب سہی
جاتاں جاتاں جاتاں سکلیا نیند میری تے دیتو جا

دُنیا مانھ کوئے اک نہ لہو جس نا اپنو کہ لیتا
جاتاں مانھ ہُن چھیکا لاویں کتنا تند و رشتاں کا

درداں کا میوا دُنیا توں، اک عُمر اُدھارا کھاہدا تھا
اللہ رکھے غم کا ہم نے، ہُن اپنا یوٹا پال لیا

تیری گلہبیں جے نہ رلتا
کتنا شہر بسایا ہوتا

ٹھنڈی تے بیشار وہے محبتاں کی چھاں
اس روگلا چنار نانھ کوئے پالتو نہیں

جس کے ہوتیں قول کیا تھا
اسے نال شکایت میری

جس نے میریں آس اُجاڑیں
اللہ اُسکو شہر بساوے

جے تیرے تیں چنگی کی قربان نہ کی
یارحیاتی کہوے مُجرے آوے گی

حرف ہوٹھاں کو ساتھ کے دیتا
دل تے میرو تھو پر دُعا اُسکی

خالی دیکھ حویلی دل کی
اُس نے آن بسایا اتھروں

سرگی نال بھیاں غماں کا دل مانھ کدے نہ آیا
پچھلے پھر تریل بڑی دہے اس بستی کا رستاں مانھ

صدی گذاریں سکھنے ہتھیں اس راہ کد تک آوے گو
روز کا چناں میرا چن نا، اکدن نال لیاے توں

کائے کھیمی نہ راس آئی یوہ درد تیر ونہ جان لے لے
میں صد نہیں رکھی ہیں کالجہ نال روز گھٹیں تپا تپا کے

کس کس حال زلیخا کولوں دامن آپ بچا کے رکھو
کوئے معصوم تے شہادت دیگوسچا کی سرکار کے باندے

کل جے کوئے کما دوی لاوے فر نہ روئے دھوئے
آپ بسالی ہے تیں دل کی پا جا آلی ڈوگی

کم پیارو چم نہیں اس نا یاہ دنیا دورگی
اس نے تا بھاء نہیں پچھنو اوڑک اک دھیاڑے

کے ہوؤ جے ناں نہیں لیتو قلم دوات سیاہی تیری
غزلاں مانھ تیرا پر چھاواں، گیت مانھ تیرو پیار ہمیشاں

گھڑی بھاویں نزع کی وہے لفظ میرو بدلسین نہیں
توں اج دی آکے جانیں زندگی میری لکھالے جا

خوشی مل نہ جائے کائے گذر گیا زمانہ
زمانہ تیں اتھروں چھپاتاں چھپاتاں

دُشمن لکھ ہزار وہیں بھاویں
سجن بس دوچار بہتیرا

دل دریا نے آس کا ٹاپو
کتی وار ڈبویا وہیں گا

دل درویش نہ راضی ہوو
اٹھیں خیر بہتیریں اکھ

دل درویش نہیں خالی دامن
اُجڑی دیکھ نہ حالت میری

کسے اگے اڈیئے نہ جھولی بندیا
منگنیے تے رب کی ضا منگنیے

میرے نال و فائزہ کی جے ہور کسے نال کرنی کے
یارا جان سلامت تیری میر و پیار خدا کے حوالے

میں تے دُنیا جہان نانھ دسیں تیرا ناں کی یار غزل
کاش کدے توں اپنو کہو منا وی دوچار کے باندے

میں تیری ہر سورۃ آیت رکھی ہے تعویذ بنا کے
فرکیوں میر و حرف حرف تیں غیراں مانھ برتا یو چن

میری اکھاں کی تِس نانھ تیر و ساون نہ پرکھ سکیو
نہ منا جاچ منگن کی نہ تیتا دین کی آئی

وہ ساون کا جھولا مانھ وی تنگیں پیریں آوے تھو
خورے کن اکھاں نے کھاہدو اجنگ فیر نہ آ یو چن

یہ درد محبت کا لیکے دوچار قدم وی خاصا وہیں
منزل نہ لہھی عمراں تک جس نے یہ سگی نال لیا

یہ دُنیا کا دھدا بچنا کدے نہ مُکا، کد منگیں گا
ہوسکیوتاں فر اکواری مل جائیے قربان اتیراں

گُوڑ کا پکا بنگلا بتلیا
سچ کو ڈھارو چوتو ڈٹھو

میرو کم ہے دُعا کرنی دِلوں لیکے زباں توڑی
نکل کے میرا ہوٹھاں تیں دُعا جانے خُدا جانے

میری وفا کو اج تم حساب کے کریں
پتھر وی پوجیا تے خدا کر کے چھوڑیا

میریں اکھ بچنا کا گھر دار
اُن کی ڈنی دھار اتیراں

یاہ مٹی کی ڈھیری کے بڈیار کرے
نیں ہوا مانھ اڈے گی مُڑ آوے گی

نیلے نملوں اوس کی بارش تیرو آنو ایسوں برہیا
پہلا تھا تیں ہو روی کیا کیوں اتنا احسان اتیراں

تیرو غم نہ بھلو زمانا کی تلخی
میں چھوڑی ہیں ساریں بھلا بلیں بلیں

ٹھنڈی تے بیٹار وہے محبتاں کی چھاں
اس روگلا چنار ناھ کوئے پالتو نہیں

خوشی مل نہ جائے کائے گذر گیا زمانہ
زمانہ تیں اتھروں چھپاتاں چھپاتاں

بھوری اُنھاں ساراں کو واحد جواب تھو
پچھے تھی جتنا میرے توں سوال زندگی

کسے اگے اڈیئے نہ جھولی بندیا
منگپے تے رب کی ضا منگپے

☆☆☆

نور محمد مجروح

پیدائش: جون 1965ء گول

نور محمد مجروح گوجری کا نوجوان تے با حوصلہ شاعر ہیں جہڑا گول کی خوبصورت وادی مانھ جون ۱۹۶۵ء مانھ پیدا ہو یا۔ گوجرا ماحول کا قضا بختاں وچوں بچپن مانھ ہی اپنوجھو نکھیڑ لیو۔ دسویں توڑی کی تعلیم حاصل کرن تیں بعد محکمہ پولیس مانھ ملازم ہو گیا۔ سرکاری ملازمت زیادہ دیر انھاں کو دل نہ بھلا سکی تے انھاں نے کلچرل اکیڈمی تے ریڈیو سٹیشن کے ذریعے گوجری لکھاڑیاں نال آن جان شروع کر لیو۔ گوجری ادب کا مطالعہ نے اُنکے اندر کودردوی جگا پوتے تخلیق کاروی۔ تے یوں انھاں نے گوجری مانھ غزل تے گیت لکھنا شروع کر لیا جہڑا شیرازہ مانھ شائع ہون تیں علاوہ ریڈیو تیں وی اکثر نشر ہوئیں۔ اُن کو گوجری کلام ”لہو کا اتھروں“ کا ناں نال شائع ہو یو ہے۔ کجھ پچھاواں کے باوجود اس سوئی کتاب مانھ اُن کا کئی خوب صورت شعر شامل ہیں جہڑا پڑھن آلاں نا متاثر کرنو نہیں رہتا۔ اُن کی شاعری تیں گوجری ادب کا وسیع مطالعہ کی گواہی لھے تے گوجری غزل کا تخلیقی سفر مانھ پہلا راہیاں نال ویہ اُسے اعتماد نال پیش آیا ہیں جس طرح اکثر پولیسا استراں نال سلوک کریں۔

بھاویں مجروح کا کلام مانھ تخیل کی وسعت تے فنی پاکہیت کی گنجائش موجود ہے پر اُن کا دل مانھ درد تے اکھاں مانھ چمک نا دیکھ کے یاہ گل کہی جا سکے جے کدے انھاں نے پڑھن تے لکھن کو سلسلو جاری رکھیوتاں اک دن ضرور ویہ گوجری غزل مانھ اپنومیکو اسلوب وی پیدا کر لیں گاتے مقام وی۔ کلام تیں ان کا ہاڑا تے حیلہ سارا سماج کا محسوس ہوئیں تے

نوں گوجری زبان تے ادب نال محبت کرن آلاں نے کافی آس تے امید لائی ہیں۔ تے ہُن
یاہ گل یقین نال کہی جاسکے جے انور حسین، نور محمد مجروح، جاوید راہی، جان محمد حکیم تے ریاض
احمد صابر کی موجودگی مانھ نوں صدی گوجری غزل واسطے مبارک ثابت ہوئے گی۔

غزل ۱:

آدے یاد ستاویں اتھروں	سُتا درد جگاویں اتھروں
خالی دیکھ حویلی دل کی	غم کو شہر بساویں اتھروں
سوٹی لے کے ڈکوں بھاویں	آنو باز نہ آویں اتھروں
لاکے تیر ہجر کو دل تیں	خون کی نہر بگاویں اتھروں

غزل ۲:

چناں کائے نشانی دے جا	تس ہے بکس پانی دے جا
مٹھا مٹھا پیارا پیارا	بولوں کی قربانی دے جا
پیار پریت کا پھلاں نا فر	نوں روپ جوانی دے جا
خوشیں کل مبارک تنان	وے کجھ درد نشانی دے جا
جاتاں جاتاں تحفو مجروح	واہ اک یاد پرانی دے جا

غزل ۳:

آ جا یار یرانو بنڈاں	وہ دکھ درد پرانو بنڈاں
آپس مانھ سنجھالی کر کے	دھیلو دھیلو آنو بنڈاں
پیار کے چرے پونی کتاں	تندو تندو تانو بنڈاں
پریت کی فصل کما کے مجروح	ریت کو دانو دانو بنڈاں

ق:

ہجر کا موتی چن چن کے میں پو پو ہے اک ہار غزل گو
 میری دنیا اجڑ گئی تے بسو اک سنسار غزل گو
 ان گنیا یہ منکا چن چن کئی کئی لڑیں پروئیں میں
 اس جگت مانھ سب توں بدھ کے کیو میں سنگار غزل گو

غزل ۴:

غم ڈٹھا غم خواری ڈٹھی	حب ڈٹھی لاچاری ڈٹھی
کر کے پیار کو سودو آخر	پل پل بے قراری ڈٹھی
مکر فریب تے دھوکھاں آلی	ہوتی میں سرداری ڈٹھی
یاد کے بوہے ڈیرو لاکے	خالی آس کی ڈھاری ڈٹھی
ظالم درد وچھوڑا جیسی	نہ کائے ہور بیماری ڈٹھی

غزل ۵:

بدلیں رت نظارا کتنا	موسم پیارا پیارا کتنا
زندگی مانھ کے کچھ نہیں ڈٹھو	گھسن گھیر کنا کتنا
رو رو کتنی رات بتائیں	لگا زخم کرارا کتنا
درداں کا اس عالم کے بچ	راتیں گنیا تارا کتنا
کتنا پھیرا مار گیا ہیں	ان گلنیں بنجارا کتنا
کتنا لوک زمانا بدلایا	پھٹھا سنگ سہارا کتنا
کتنی بستیں اجڑیں مجروح	خالی ہو یا ڈھارا کتنا

ق:

بے وقتا بے ملا اتھروں
 آس کے باغیں مٹھلا اتھروں
 ویلا نا جد لوڑ تھی انکی
 اس ویلے نہیں ڈلا اتھروں

ق:

دل مانھ توں اک یار بے رے
 بس اک تیرو پیار بے رے
 ہڈیاں کی اک مٹھی مانھ یوہ
 میرو دل پیار بے رے

ق:

تھارے باجھوں میریں اکھ
 اجکل خوب ہسیریں اکھ
 اپنی وی کائے دسو نا جے
 تم نے کیوں ہن پھیریں اکھ

طارق فہیم

پیدائش: 15 ستمبر 1967ء لمبیدی راجوری

محمد طارق فہیم گوجری کا نوجوان لکھاڑی ہیں تے منیا پڑنیا بزرگ گوجری شاعر محمد اسرائیل اثر ہوراں کاسپوت ہیں۔ ویہ ستمبر ۱۹۶۷ء مانھ لمبیدی مانھ پیدا ہويا۔ تے بنیادی تعلیم تیں بعد ریاستی محکمہ صحت مانھ میڈیکل اسٹنٹ کے طور پر ملازم ہو گیا۔

طارق فہیم نالوہکی عمر تیں ہی گوجر ماحول مانھ اسرائیل اثر جیہی شخصیت کی شفقت تے رہنمائی حاصل رہی ہے۔ اسے تاثیر نال گوجری مانھ لکھن پڑھنوی شروع کیو۔ گوجری مانھ چنگی شاعری کریں جہدی اکثر شیرازہ گوجری مانھ شائع ہوتی رہے۔ اس تیں علاوہ انھاں نے گوجری نثر تے خاص کر کے گوجری ڈرامہ مانھ وی کچھ کم کیو ہے۔ انھاں نا اس سلسلہ مانھ ریاستی کلچرل اکیڈمی کی طرفوں اک سال کو بہترین ڈرامہ نگار کو ایوارڈ وی ملیو ہے۔

طارق فہیم مقامی ادبی تنظیم انجمن ترقی گوجری زبان و ادب دھر مسال کالاکوٹ کا اہم رکن ہیں تے اس تنظیم کی طرفوں شائع ہون آلا رسالہ سجرابول کی ادارت مانھ وی خالد و فانیال شامل رہیں۔ ادب مانھ کسے اک میدان کو انتخاب کر کے لکھتا رہیا تاں ویہ گوجری مانھ ناں پیدا کرن کی صلاحیت رکھیں۔

غزل: ۱

رے کول ہوں بیسوں تے کہانی سناؤں
 کدے نین ڈولہوں تے تینا رواؤں
 کک دل کی ڈنگھی کنارو نہیں لہتو
 محبت کا درداں نا کنگا لے جاؤں
 چکوری دیوانی وی پچھے تھی چن نا
 میرا یار کس نا ہوں سگی بناؤں
 پیپا نے وی سوز میرو چھاپو
 لکیاں کی سانجھاں نا سرکس کے لاؤں
 تیرا سر تیں سدھراں کی دولت گھمائی
 نذرانو تحفو ہوں کے لے کے آؤں

غزل: ۲

بدل چڑھو روز برہے گو	بجن بوہے آن بڑے گو
اپنا اک بڈیار کی خاطر	تیرے سنگ وہ روز اڑے گو
جس دن اسکی نیت بدلی	آپ کھنٹے تے آپ جھڑے گو
ساون گو احساس ہووے گو	شکوہ تیرے سر مڑھے گو
اس بازی نا جتن خاطر	طارق تیرو لہو سڑے گو

خاتقان سجاد

پیدائش: 1967ء بھلیسہ ڈوڈہ

خاتقان سجاد گوجری کا نوجوان تے باصلاحیت لکھاڑی ہیں۔ ویہ بھلیس ڈوڈہ مانھ ۱۹۶۷ء مانھ پیدا ہو یا۔ بنیادی تعلیم ڈوڈہ مانھ ہی حاصل کی تے محکمہ تعلیم مانھ استاد کے طور ملازمت شروع کی۔ اپنی تعلیم وی جاری رکھی تے پرائیویٹ طور پر بی اے کی ڈگری لئی۔ گوجری ادب مانھ ویہ تعلیمی دور مانھ ہی جان محمد حکیم سمیت داخل ہو یا تھا۔ کلچرل اکیڈمی کی گوجری مجلساں تے مشاعران مانھ باقاعدگی نال شامل ہوتا رہیا ہیں۔ تے گوجری پڑھن سنن آلاں نے وی ان کی صلاحیت کی ہمیشاں داد دتی ہے۔

خاتقان سجاد بنیادی طور گوجری غزل کا شاعر ہیں تے طبیعت، باروں ان کی شاعری مانھ وی سنجیدگی باندے باچھ نظر آوے۔ انھاں نے مختصر عرصہ مانھ کچھ چنگی سوہنی غزل گوجری ادب کے حوالے کی ہیں جہڑی شیرازہ گوجری مانھ شائع ہوتی رہی ہیں۔ تخلیق کو سلسلو جاری رہیوتاں ویہ گوجری ادب مانھ ناں پیدا کرن کی صلاحیت رکھیں۔

ق:

روئیں اکھ بجر مانھ میریں لکھیا لیکھ مٹاوے کون
رگ رگ اک عشق نے لائی محرم باجھ بجاوے کون
اکھ اکھ جوڑ بنایا گیت پیارا بیتاں گا
ٹھنڈا ٹھار کورا کا پر بت گالے تے گراموے کون

غزل

تندو تندو کر کے لوئی بیٹھو ہتھ مروڑ نہ یار
بے قیمت ہن سمجھ کے اس نارستا کے بچ چھوڑ نہ یار

کے ہو و جے کسے دھیائیراج کرے تھومو جاں مانھ
قسمت کا یہ لیکھ سمجھ کے اپنو رستو روہڑ نہ یار

عاجز تاجدوی دیکھوں پیڑ جیہی اک جاگے دل مانھ
پنے ہو کے سردب چلتاں سینے برچھی پوہڑ نا یار

اکھ جاں میچے بے بو جھی مانھ منڑی گوتوں مال گنوائے
کھول اکھاں نا دیکھ چو فیرے میچیں میچیں دوڑ نہ یار

سفر لمیرا ڈاڈا اوکھا جیکر رہیو اڈیک کسے مانھ
وقت دوپہر سجاد آئیو ہے، بیسن کی ہن لوڑ نہ یار

ریاض احمد صابر

پیدائش: پہلی مئی 1970ء مڑھوٹ پونچھ

گوجری ادب مانھ خدا بخش زار کو مقام ہمالیہ توں گھٹ نہیں۔ اُن کا بیت کچھلا پنجاہ سٹھ سالوں تیں لوکاں کا دل تے دماغ پر نقش ہیں۔ ریاض احمد صابر اُنکا پوتا ہیں جہڑا مئی ۱۹۷۰ مانھ حاجی ممتاز دیدڑھ ہوراں کے گھر پیدا ہويا۔ ریاض احمد ناں بچپن تیں ہی پڑھائی کے نال نال زار صاحب مرحوم کی صحبت نصیب رہی تے اکثر زار صاحب اپنو کلام ریاض احمد تیں ہی کاپیاں پر لکھا تا رہیا کیوں جے ویہ آپ زیادا لکھا پڑھی نہیں کر سکیں تھا۔ اس مجلس کی تاثیر ہو کے رہی تے دسویں توڑی بچتاں دیہہ آپ وی صابر تخلص کر کے شعر کہن لگ گیا تھا۔ ریاض احمد صابر کا چاچا حاجی غلام احمد غلام تے نکا بھائی ایاز احمد سیف وی شاعری کی بھوم رکھیں تے اس طرح زار صاحب جیہا شیر کی یاہ جھرنگڑی انج وی شعر تے ادب کا حوالہ سنگ اباد ہے۔

ریاض احمد صابر میٹرک کی تعلیم تیں بعد ریاستی محکمہ سماجی بہبود مانھ ملازم ہو گیا تے اجھاں تک اتے سرکاری تے سماجی خدمت کریں لگاوا۔ ریاست کی موجودہ افراتفری مانھ کئی ذاتی نقصان وی برداشت کرنا پیا تے گھروں بے گھروی ہونو پیو۔ خدا بخش زار مرحوم کا اسلوب مانھ ان سب دکھاں دردوں تے تجرباں کو اظہار ریاض احمد صابر کی شاعری مانھ دیکھو جاسکے۔ ریاض احمد صابر نے شاعری واسطے غزل کو میدان پسند کیو ہے تے لوکی عمر تیں ہی جس قسم کا سیانف آلا مضمون اُنھاں نے اپنا شعراں مانھ برتیا ہیں اُنھاں نا دیکھ کے اُن کے نال نال گوجری غزل کو مستقبل وی شاندار سنی لگے۔ تے بلاشبہ جدید غزل بارے صابر تیں چنگی امید رکھی جاسکے۔ کلام:

غزل ۱

رتجھاں کا پھل پھلیں گا پر ہوں نہیں ہوسوں
بھاند کا قضا پھلیں گا پر ہوں نہیں ہوسوں

یہ امید کا ساوا پتر گلایاں مانھ
پیلا ہو کے رلیں گا پر ہوں نہیں ہوسوں

ہٹ جائے گو پردو اس بربادی گو
راز بہتیرا کھلیں گا پر ہوں نہیں ہوسوں

بے عدلی کو طور زمانو چھوڑے گو
مُل وفا کا ثلیں گا پر ہوں نہیں ہوسوں

تیری اکھ بھی پانی صابر ہوئے گی
پل پل اتھروں ڈلیں گا پر ہوں نہیں ہوسوں

غزل ۲

تڑفے بھکھی بھانی آس	میری آس نمائی آس
تیری اک نشانی آس	اپنے پلے سام کے رکھی
کرنی کے بیگانی آس	چھوڑ کے ہو آس تیری گو
پھلتی رہی پُرانی آس	جد جد شاخ امید کی چنگری
کس نے فیہر منائی آس	صدیاں تیں یاہ رُٹھی صابر

ڈاکٹر جاوید راہی

پیدائش: یکم ستمبر 1970ء چنڈک پونچھ

گوجری کا نوجوان شاعر ادیب تے محقق ڈاکٹر جاوید احمد راہی ستمبر ۱۹۷۰ء ماں دنیا پڑنیا گوجری نداحیہ شاعر بابو نور محمد نور کھٹانہ کے گھر چنڈک پونچھ مانہ پیدا ہویا۔ اس آزاد طبیعت شخص نے بچپن کی سوکھتاں تے اوکھتاں کو لطف برور لیو۔ مطالعہ کی شوق نکا ہوتاں تیں تھی تے یوں دسی توڑی پوچھن تیں پہلاں ہی اُردو ادب کی چنگی بھوم ہو گئی تھی۔ پونچھ کالج مانہ تعلیم کے دوران ہی تخلیقی میدان مانہ قدم رکھیو، مجلساں تے مشاعر اں مانہ شامل ہون لگا تے ادبی زندگی مانہ نکھارا تو گیو۔ جموں یونیورسٹی تیں ایم اے کرن تیں بعد ریاستی قبیلان کی زبان بارے اُردو مانہ ڈاکٹریٹ کی ڈگری حاصل کی ہے۔

راہی ہور تعلیم کے دوران ہی ۱۹۹۴ مانہ ریاستی کلچرل اکیڈمی کا گوجری شعبہ مانہ ریسرچ اسٹنٹ کی حیثیت نال ملازم ہویا تے اجکل ترقی کر کے گوجری شعبہ کا سربراہ بن گیا ہیں۔ انھاں نے تخلیقی میدان کو رستو بسار کے گوجری زبان تے ادب یوں کھنگا لئو شروع کیو ہے جے تحقیق کافن مانہ کجھ نواں اضافہ کرن تیں علاوہ ایسی موہی کھولی ہیں جہڑی آن آلاں واسطے دل چھی کو باعث وی بنے گیں۔

چھلا دس سالان مانہ جاوید راہی نے چھ ست کتاب گوجری ادب کے ناں کی ہیں جہاں مانہ ”گوجر شناخت کا سفر“، ”لوک ورثو“، ”گوجری لوک گیت“، ”ہندی گوجری ڈکشنری“، ”گوجری لوک ورثی ڈکشنری“ تے ”گوجرانسائیکلو پیڈیا“ شامل ہیں۔ لوک ادب کا موضوع پر اتنو انفرادی کم کسے ہور شخص نے نہیں کیو تے اس طرح انھاں نا بجا طور پر گوجری

لوک ادب کو ماہر کہہ جاسکے۔ تے یوں وی گوجری ادب مانھ کسے خاص موضوع پر لکھن آلاں
مانھ انھاں تیں اگے صرف ڈاکٹر صابر آفاتی تے ڈاکٹر رفیق اعجم ہی نظر آویں۔ انھاں نے
ڈرامہ تے تحقیق مانھ ریاستی کلچرل اکیڈمی تیں انعام وی حاصل کیا۔

تحقیق تیں علاوہ جاوید راہتی نے کجھ کامیاب ڈرامہ وی کیا ہیں۔ شاعری گھٹ کی
ہے مگر چھوٹی بحر مانھ صاف سُتھری تے معیاری غزل لکھی ہیں۔ تخیل مانھ سرور تے کسانہ تے
خوشد یومینی کے قریب سئی لگیں۔ گوجری ادب ان کی شعری تخلیق کو مدت تیں اڈیکوان ہے۔
ادبی سفر مانھ راہتی ہور، نور محمد نور، ڈاکٹر اعجم، نسیم پوچھی تے اقبال عظیم کے قریب ضرور رہیا
ہوئیں گا پر انھاں نے کسے کی تقلید نہیں کی تے اپنے واسطے آپ رستا تلاش کیا ہیں۔

گوجری ادب تے قوم کی خدمت کو جنون انھاں اک جاکن نہیں دیتو تے ویہنت
نواں موقع تلاش تارہیں۔ اسے جذبہ کے تحت اجکل ٹرانسٹریل ریسرچ تے کلچرل فاؤنڈیشن قائم
کر کے مرکزی وزارتوں کا تعاون نال کجھ نواں منصوباں پر کم کریں لگاوا۔ جے اُن پر سیاست
آلاں کو پچھاووں نہ پوتتاں ویہہ گوجری ماں کو حق انشا اللہ کسے نا نہیں گوپن دیسیں۔

ق:

خوشبو یاد پرانی بندے گھر گھر رات کی رانی بندے
دل درویش نہیں اپنے جوگو لوکاں نا سلطانی بندے

غزل:۱

وہ بدل جے برہو ہوتو آس کو بھانڈو بھریو ہوتو
ہوں دکھ مانھ نہ ڈبوتو جیکر اُن اکھاں مانھ تریو ہوتو
ہوتو میرو عشق وی اُچو جے سولی پر چڑھیو ہوتو
جے ایشانوں اگ نہ برہتی آس گو لُوٹو ہریو ہوتو
مرن تیں بعد ہوں سوچن لگو تیرا در پر مریو ہوتو

غزل: ۲

یوہ احسان وی تم کر دیتا
جے جھولی مانھ سل نہ ہوتا
بھار غماں کو بھارو تھو جے
ہم بے گھر نہ پھرتا جیکر
جے ہم ہار مٹھلاں کا ہوتا
آس کا پنچھی نا پر دیتا
ہوں اڈتو تے ویہ بھر دیتا
ہوں چا لیتو تم دھر دیتا
دل کو سوہنو جو گھر دیتا
ویہ وی ہر نیووں کر دیتا

غزل: ۳

کیسی آفت آن پئی ہے
جد توں تم میرے گھر آیا
ہوں تے چپ ہاں فرکیوں پھاہی
اک دنیا مانھ جا نہیں لہستی
کون سیانے لاش وفا کی
گل بستی سنسان پئی ہے
تد جسم مان جان پئی ہے
میرا گل مانھ آن پئی ہے
اک دُنیا ویران پئی ہے
رستا مانھ انجان پئی ہے

غزل: ۴

کالی رات انھیرا منگیا
اسکے ہتھ وی کلھ نہ لگو
دُنیا دیکھی پر جد منگیا
ہم نا کون خرید سکے گو
تیروسنگ تے موت کی منزل
ہم نے درد انھیرا منگیا
جس نے لو سویرا منگیا
اُن گہلاں کا پھیرا منگیا
ہم تے ہاں بس تیرا منگیا
رستا خوب لمیرا منگیا

غزل: ۵

مڑا مڑ اپنے اندر دیکھوں کتنی وار سمندر دیکھوں
 ہوں سودائی اپنا دل نا تیرے ہاروں کر کر دیکھوں
 توں تے بس میرے گھر آپو تیری خوشبو گھر گھر دیکھوں
 ہوں منصور نہیں ہاں فر وی کیوں نہ ہوں سولی چڑھ دیکھوں
 کد تک تیری آس کو رستو زہر پیالا بھر بھر دیکھوں

غزل: ۶

ناصح کانہہ نا کرے نصیحت اک دن ایسو آوے گو
 دیکھ کے توں وی اُس کافر ور آپ ایمان لیاوے گو

حال میرا پر ہس لے بھادیں پر اتنو بھٹل جاییے نہ
 درد مانھ توں وی غزل میری نا اپنے ہوٹھیں لاوے گو

اپنی گل ہے جہڑی کہ لے یاہی وار ہے تنا
 بے قدراں کا شہر مانھ کہڑو دوجو پھیرو لاوے گو

اج بھادیں وہ میرو نہیں پر جن جن راہیں ٹریا تھا
 تک کے منا ان راہاں پر دوروں ہتھ گھماوے گو

ہر کوئے پیار کو دشمن دسے ہر اک یار زمانہ گو
 کون کسے کا درد نا راہی سینہ کے سنگ لاوے گو

جان محمد حکیم

پیدائش: 11 فروری 1972ء بھلیس ڈوڈہ

جان محمد حکیم گوجری غزل کا نوجوان، سوہناتے سنجیدہ شاعر ہیں۔ وہ بھلیس ڈوڈہ ماہ فروری ۱۹۷۰ء پیدا ہوئے۔ بنیادی تعلیم اُتے حاصل کی۔ تے محکمہ تعلیم ماہ استاد کے طور ملازم ہو گیا پر اپنی تعلیم کو سلسلووی جاری رکھیو تے بی اے تیں بعد سیاسیات ماہ ایم کی ڈگری وی لئی تے اچکل ڈوڈہ کا گوجر ہوٹل ماں نگران (وارڈن) کے طور پر ڈے داری نبھاویں لگاوا۔

تعلیم کے دوران ہی خاقان سجاد کے سنگ گوجری کانفرنساں ماہ شامل ہون لگا۔ تے اقبال عظیم کی پارکھ نظراں نے یہ موتی پچھان لیا۔ دیکھ دیکھتاں انھاں کی تحریر ماہ ایسوکھار آگیو جے ہُن گوجری غزل نے انھاں نال لمی تاہنگ لائی ہیں۔ غزل ماہ رواختی رنگ کے نال نال انھاں نے خالص گوجرا لفظ تے نواں مضمون وی بغیر جھول تیں بڑی مہارت نال اپنا شعراں ماہ پرویا ہیں۔

جان محمد حکیم ہوراں نے جے گوجری غزل نال خلوص قائم رکھیو تے اپنے توں پہلے وارڈن بنن آلا لکھاڑیاں کے پیریں پیر نہ دھریا تاں گوجری غزل وی انھاں کو ناں مدتاں تک نہیں گمن دیسیں۔

کلام:

غزل: ۱

نفس کی خاطر کچھ وی کرنو چنگو نہیں
اپنا آپ تیں مچ ہی ڈرنو چنگو نہیں

کس مانھ جانے سب ہوئے گو بیٹھو دو
ہر اک نہر مانھ ہتھ وی دھرنو چنگو نہیں

راہ بشکاریں سنگت چھوڑ کے ڈبے گو
چن کے نالو نال گزرنو چنگو نہیں

رلیں دو جاں کی کرنی ریت زمانہ کی
پیر بیگانے پیر وی دھرنو چنگو نہیں

کنداں کی وی نظر سٹلر لگے جان
ہر اک شیشے بن سنورنو چنگو نہیں

غزل: ۲

چانن لاواں نہیرا بنڈاں	آؤ درد نصیرا بنڈاں
اس راہ غم بہتیرا بنڈو	میرا غم نا کھا کے پرکھو
کد تک یار اندھیرا بنڈاں	لوء کو کچھ تے سوچو ہن وی
سر بنڈاں کہ سہرا بنڈاں	آپے وقت گواہی دئے گو
ہم ات تیرا میرا بنڈاں	وے اک ہو کے چن پر چڑھیا

غزل: ۳

میرا دی اعتبار ہیں ہوچھا	اُنکا قول قرار ہیں ہوچھا
بستی کا زردار ہیں ہوچھا	دل ناہتم کے رات گذاریں
امبر مانھ بدلا رہیں ہوچھا	خبرے کتنا ہڑھ چاڑ ہیں گا
دریا کا کڑکار ہیں ہوچھا	ست سمندر چُپ کراویں
اُنکے نین خمار ہیں ہوچھا	چپ چپتا سینو چھلیں

غزل: ۴

زخم اندر کا کہو جانے	درد میرا نا کون پچھانے
اوہی جانے جھڑو چھانے	کس نا کے ہے پیڑ کسے گی
میں دی رکھو دل کے خانے	اُس نے درد کو تحفو دو
میت گیو ہے دیس بیگانے	پل پل یاد نا سانجھ کے رکھوں
لوک گنیں بس تھارے بہانے	نہیں تاں منا کون پچھے تھو

چوہدری یونس ربانی، ساج راجوری

غزل: ۱

بھلتی واء وصلوں کی لے کے پھٹلاں کا ہر کار ماں آئیے
اس برہیا ہوں گیت لکھوں گو بولاں کا ٹھنڈیاں ماں آئیے

دھندلی رات غماں کی کالی، من کو ساون یاد کرے
اتھرواں کے برہتے بدل سیویں بوند پھوہار ماں آئیے

راہیں پہرے دار بنا کے رکھے گو دل آساں نا
چند سو وار گھماؤں بچناں، سوئی رت بہار ماں آئیے

تاہنگ تیری تڑفاوے ہر پل ساعت صدیوں لمی دے
نین ہسیریں، دل بھکھیا لو، سہکوں انتظار ماں آئیے

بوٹے بوٹے گاویں پکھنوں، دکھیا اک اک بول کرے
سبز پنجال پہاڑیں بکتا، چھمراں کا شوکار ماں آئیے

غزل ۲

جت دل کا محرم یار بسیں
اس دل دکھیا ماں ہر ویلے
اک پریت کو بوٹو دل میرو
اک دل میرا کا ٹاپو ماں
ات سیال ربائی آنو ہے
جس باغ ماں تیری بہار بسیں
اُت میریں تاہنگ ہزار بسیں
نت سکھیا تھارا پیار بسیں
ہر ڈالی پر گل خار بسیں
کئی دکھ سکھ بن کے یار بسیں
جس باغ ماں تیری بہار بسیں

غزل ۳:

بھاویں کھل کھل تھکیے یار
چادر نال مٹھلا کی اس راہ
بن بن شوئی موٹھا اُپر
نہ تندور کی مٹی ہاروں
یاری لا کے توڑ نبھائیے
میرو راہ فر تکتے یار
سجرا زخم نہ ڈھکنے یار
بھار وفا کو چکیے یار
سیک ہجر ما پکنے یار
دنیا تیں نہ جھکیے یار

غزل ۴:

جیتاں قسمیں دل سڑے گو
گھٹ کلاوا لا کے ملے
سارو جگ ہنر نے تجو
اتنی لمی فرصت لے کے
کیو وہ اک اتھروں پیارو
موئی مٹی نا تاپ چڑھے گو
میرے سنگوں جد پھڑے گو
آزر کتنا بت گھڑے گو
کہو چٹھی روز پڑھے گو
سُسر ماں یوہ لعل جھڑے گو

متفرق شاعراں کی چنام غزل

۱۔ میاں نظام الدین لارویؒ

غزل:

اس جا مانھ وی لگیں ہوئیں تھا تھا را ڈیرا کدے کدے
خوشیاں کی کنیں رات گذاریں ہو یا سویرا کدے کدے

کئی کئی روز ات رل کے ہسیا کئی کئی روز ات رنا وی
وصلوں کا کئی دور لنگھایا، غم کا نہیرا کدے کدے

ہون شکاری روز ات رل کے باز تے تیرا ڈیں تھا
میل ہوئیں تھا اس چن مانھ، میرا تیرا کدے کدے

آس ملن کی پاس امانت اج توڑی میں رکھی ہے
پر تم اس مانھ کیوں کر جائیں ہیرا پھیری کدے کدے

بھل کے وی توں اج نظا می ناں نہیں لیتو میرو کیوں
رت ہوویں تھا میرا ملن نا تیرا پھیرا کدے کدے

۲۔ احمد الدین عنبر

غزل: ۱

ورد تیرا ناں کو کروں گفتی گفتی
خدا جانے کد تک ملاقات ہوئی
میرا کر ختم دن جدائی کا یا رب
مصیبت کا دن میرا تک جانا اک دن
غلطی میری کوئی دسو نا کہوئی
عبرنا کیوں تنگ کروں گفتی گفتی

غزل: ۲

نہ دل دیتو تیناں نہ ناکام ہو تو
نہ لوکاں کی نظراں مانھ بدنام ہو تو
محبت نہ کرتو کدے نال تیرے
جے معلم محبت کو انجام ہو تو
دل میراں مانھ گھر نہ دہے آجے تیرو
وظیفو نہ تیرو صبح شام ہو تو
گیو سڑ ہے عنبر جدائی مانھ تیری
عمر ساری نوکر وہ بیدام ہو تو

۳۔ ملکہی رام کشان

غزل:

چہو چمن کو بہاراں نے لئیو
یوہ کلو کلاپو ہزاراں نے لئیو
رہیو دشمنان توں میں چوکس بہتیرو
میرو قافلو میرا یاراں نے لئیو
منکھتا کا راکھا یا دھرماں کا آگا
ہم بھولا بھالاں نوں ساراں نے لئیو
منوں ہریاں باغاں کا دیکے بھلیکھا
کئی مہریاں ظاہر داراں نے لئیو
کشان دم بھریں تھا پیاراں کا جہوا
ان بھروسہ شکن سیوا داراں نے لئیو

غزل

گیو چھوڑ پر دیس مانھ منا آ دلدارا کدے کدے
یاد آویں تے خوشی نہیں رہتی یار پیارا کدے کدے

تھک گئی یاہ جان بچاری پھر پھر کے ان گلایاں مانھ
جن گلایاں مانھ ہوئیں ہوئیں تھا تھارا نظارا کدے کدے

بولیں تے کئی طعنا جھلیا، جھلیا بول شریکاں گا
دکھاں مانھ کئی رات گذاریں ہو یا سویرا کدے کدے

اُجڑ گیو وہ میلو ربا گئی بہار بیساکھی وی
کنگا گئی واہ پیہنگ وصل کی کھاں تھا لارا کدے کدے

اجکل سنیو تھارے پاسے گا ہک پھریں گل لالاں کا
مہارے دیس وی آویں ہوئیں تھاویہ بخارا کدے کدے

غزل

محبت کا میرا خیالاں مانھ آئیے گھڑی واسطے فر وصالاں مانھ آئیے
 کد تک ہوں بیسوں تے جھلوں تسپیا توں اتھروں تے درداں کا نالاں مانھ آئیے
 اس بستی توں راہاں گا دوئے کنارے توں شنگراں کی جھولی پنجالاں مانھ آئیے
 ہوں ڈیکوں تے دیکھوں ہاں رستاویہ تیرا توں بہکاں تے ڈھوکاں کی ماہلاں ما آئیے
 اُن رستاں نا مانجیں گا گلشن کا اتھروں توں مندر مسیتاں شوالاں مانھ آئیے

۶۔ خلیل احمد بجاڑ، کالا کوٹ راجوری

غزل

درداں کی کائے کاری نہیں تھی دنیا تھی بیزاری نہیں تھی
 سچا پیار کا ٹٹھا ناطا یار تے تھا پر یاری نہیں تھی
 آئی مصیبت آپے ٹل گئی میں تے ہمت ہاری نہیں تھی
 سو باری میں لیکھا دتا اجاں اس کی باری نہیں تھی
 لکھ خلیلؔ وسیلا ڈھونڈے ارج واہ شب بیداری نہیں تھی

۷۔ گلاب الدین طاہر

غزل:

بچھڑی کوچ اڈارنا تر سے	عمر حیاتی یار نا تر سے
رُت نمائی بہار نا تر سے	شرداں کا تت سہ سہ روئی
جان پچھانی نہار نا تر سے	نت بھلیکھا کھا کے جن
پئی ہن بستی پیار نا تر سے	پیراں کا کئی فصل پچا کے
فر طاہر دیدار نا تر سے	اگر نہیں اکھیں حرص نہیں ملتی

۸۔ عبداللطیف فیاض، آورہ کپواڑہ

غزل

سر تلی پر رکھاں اگے	جھولی ڈاہ کے بھٹکھاں اگے
ہوں بھی کے ہاں سکھاں اگے	سکھ بھی کچھ نہیں میرے اگے
کوئے نہ چڑھیو اکھاں اگے	میرے اگے ہر کوئے چڑھیو
سو نہیں سکتو رکھاں اگے	بھانے بھانے ٹٹ پونیں گا
ہوں نہیں ہوسوں لکھاں اگے	میرے چچھے لکھ ہوئیں گا

غزل:

لے جا اکو واری لے جا	او صدقے یاہ ساری لے جا
چند غماں کی ماری لے جا	میرے کو لے بچو کے ہے
توں اپنی ہوشیاری لے جا	رہن دے میناں ساد پونا ماں
آیو تھوک پہاری لے جا	میری سب عمر کی گوچھی
اپنی یاد ادھاری لے جا	وس لگوتے موڑ کے دیئے
رہتی دُنیا ساری لے جا	سنگت اکلاپا کی دے کے
میری اک لاچاری لے جا	تاج تخت کے بدلے شبینم

۱۰۔ فضل حسین کوثر

غزل

سجناں نا ازما تا تکیا	دھیڑا آتا جاتا تکیا
جھوٹھا گھول گھماتا تکیا	دوہرو روپ بناتا تکیا
کے کے گل بناتا تکیا	جہڑو جان کو صدقو دیں تھا
زیادہ آتا جاتا تکیا	گُجھ اک آیا حق کی خاطر
ہوراں سنگ ٹر جاتا تکیا	قسم خدا رسول کی کر کر

غزل

کدے دل کا پردا واہ چاتی ہوئے گی
میری یاد سینے جگاتی ہوئے گی

نصیباں کی تسبیح کا گن گن کے تارا
کدے کاگ پھر واہ اڈاتی ہوئے گی

خیالاں ماں میری واہ بستی بسا کے
نواں نت بھلاوا واہ کھاتی ہوئے گی

میری یاد کا چھاملا لے کے اوپے
اندھیرا ماں بانھ پھر گھماتی ہوئے گی

کائے یاد کیوں اج فدائی نا چھیڑے
یاہ اس نا وی جا کے ستاتی ہوئے گی

غزل

جس دل ماں محبت نہیں اس دل نا مٹا چھوڑو
اک بستی وفاواں کی کوئے تے بسا چھوڑو

کرسیں نہیں کدے شکو و تتلی یاہ نمائی ہے
ہے شرط مگر اتنی نوڑو تے اڈا چھوڑو

رہسیں نہیں سدو موسم ان ٹھنڈی ہواواں کو
کچھ بوٹا چناراں کا رستہ ماں لوا چھوڑو

پوچے نہ کدے کوئے کل سیریاں رسماں نا
گھر گھر ماں خبر اپنی سولی کی سنا چھوڑو

الفت نا طہور اپنی نفرت ویہ پیا سمجھیں
ویہ اپنی نبھا چھوڑیں تم اپنی نبھا چھوڑو

غزل

گیت وصل کا جد وی کوئے گاوے گو
ہجر کے بوہے روح پنچھی کراوے گو

ہیر ترف کے رانجھو رانجھو گو کے گی
جد کوئے جوگی نیلے بین بجاوے گو

ہن ساحباں کا ویراں کی وی لوڑ نہیں
مرزو اپنی موتوں ہی مر جاوے گو

بدل گے بجلی کڑ کے سیالو ٹھنڈ
پیار کو پٹو تنگو کون کراوے گو

عشق ندی کی بازی بڑی انوکھی ہے
جو ڈیو نریندر وہ تر جاوے گو

۱۴۔ محمد رفیق سوز

غزل

اک واری توں ہاں کر لیتو تیناں دل تے جاں کر لیتو
 سیک ذرا نہ لگن دیتو ہوں پلکاں کی چھاں کر لیتو
 سدھراں نا نہ رہتی سدھر ناں اپنو بدناں کر لیتو
 چت کوئے بندو ہور نہ ہوتو ہوں کائے ایسی تھاں کر لیتو
 جے توں پیار کو بدلو مگتی زندگی تیرے ناں کر لیتو

۱۵۔ پرویز ملک

درہال راجوری

غزل

ایسوں سخت سیالو دے زڑھتو آل دوالو دے
 سل کے اُپر ٹھک کھا لپے جے گجھ دال ماں کالو دے
 کوٹ آلاں نا میری گڑتی گھا کے بچ سرالو دے
 لکھ دوپٹاں بچوں میناں تیرو کھیش نرالو دے
 پنچھی مُرد پرویز نہیں آیا خالی ٹاہلو ٹاہلو دے

۱۶۔ محمد ادریس شاد

غزل ۱:

نہ ویہ چن نہ تارا دِسیں نہ ویہ روپ نظارا دِسیں
 خالی نگری آس میری کی سکھنا محل چو بارا دِسیں
 رات دھپاڑی دل پرچاتا تیز ہجر کا آرا دِسیں
 دل کی گٹھیں چھپیا لگیا کہیں ارمان کوارا دِسیں
 اج بھی اُنھیں راہیں رُلتا میرا نین آوارہ دِسیں
 بسے شاد یاہ اُجڑی بستی جے ویہ روپ دوبارہ دِسیں

غزل ۲:

لئے گیو پیار کے ہتھیں سکھنا ہار سنگار کے ہتھیں
 رات ہجر کی پاس بدلتا ڈور وصل دلدار کے ہتھیں
 اوہلے اوہلے جاگ تیں اوہلے دل دتو دلدار کے ہتھیں
 ساون کی رت ڈیک تیری ماں جام وصل کا یار کے ہتھیں
 کس نا شاد ہن حال سناؤں ہوں ویران اعتبار کے ہتھیں

غزل ۱

رو رو کڈھیو سال اتیراں	حال میرو بے حال اتیراں
دکھ ہے میرے نال اتیراں	سکھ نصیبو سنگ نہ تکیو
لے گیا دل کو مال اتیراں	حسن کا تاجر لٹناں لٹناں
غم نے لایو جال اتیراں	ہسن کھیڈن بھلیو میناں
ہوں ہو تو خوشحال اتیراں	سیف پیر کی گل بے ممتی

غزل: ۲

کر گجھ دل کی کاری آجا	آ سچناں اکواری آجا
ہجر کی ڈگی بھاری آجا	لاغر جان تے درد انوکھا
لکھ واری چند واری آجا	دید تیری اس دل کو داروں
رُس گئی دنیا ساری آجا	توں رُسیو اس راہ سئی لگے
تیری یاد پیاری آجا	حدوں بدھ کے سیف کا دل ماں